

San Lucas

Jabojátšama

¹ Ba entšanga Jesusbe historia tmojuábema, ntšamo bēngbeñe ndegombre tojopasacá.

² Chē historia juabemamna, chēnga tmojanuena ntšamo Jesusbe uatsjéndayēnga y inye entšanga chabiamna immencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbioye tmojanabuayená.

³ As, átšnaca sēnjontsé cuedádoca juanotíciana lempe ntšamo Jesusbiamna imojtsichamcá, tojanobojatšentšana mēntscoñe. Mora šontsinýana tšabá yojtsemna acbiamna juabemana ntšamo ndegombre yomncá, uámana taitá Teófilo, chē tijuannoticiá soyēngama, ntšamo ndegombre bēngbeñe tojopasacá.

⁴ Ba soyēnga Jesusbiamna tcmojabuátēmbanga, y atše sēntseboše aca chacotsetátšēmbo, ntšamo tcojouencá ndegombre yomnana.

Canye ángel tojanabuayená Juan chē Ubayaná jónýnama

⁵ Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámana bachnangbe natsana amēndayá).

⁶ Chatna tšabá amata ibnamna Bëngbe Bëtsabe bominiñe, y ntšamo Bëngbe Bëtsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca.

⁷ Básenga tondaye ibonjánabamna, Isabel šešona jtsebomnama ndobena causa, y chatna ya bëtsanáata ibojtsemna.

⁸⁻⁹ Chë bachnanga Bëngbe Bëtsabe bëts yebnentše tmojtso servena ora, sempre imojanamana jabocacayana, nda tšabá tbojtsonyená, Bëngbe Bëtsábioye atschuanaye luaroye cháuama incienso jajuiniyama. Canye, Zacaríasbe entšanga Bëngbe Bëtsabe bëts yebnoca, Bëngbe Bëtsábentše imojtso servena orna, Zacaríasbioye tšabá ibojonyena; y chca, cha ibojotóca jana incienso jajuiniyana.

¹⁰ Zacarías, incienso yojtsejuinyantscuana, ba entšanga shjoca imojtsemna, Bëngbe Bëtsáftaca encuéntaye.

¹¹ Nye ndeolpe, Bëngbe Utabnabe canye ángel tojanonyná chë incienso jajuiniyama altarentša catšbioica.

¹² Zacarías chábioye tbojáninye ora, tojanenjananá y corente uatjana tbojanábuache.

¹³ Chora chë ángel tbojanianyana: —Zacarías, ndoñe matauatjana. Bëngbe Bëtsá tonjouena ntšamo tconjaimpadacá. Acbe shema Isabel canye šešona bochántsebmna, boyabásetema, y chana Juan ca cochjuabaye.

¹⁴ Chama aca corente oyejuayá cochántsemna, y bëtscá entšanga mochanjóyejuaye acbe uaquiñá tojonynama.

¹⁵ Er cha, Bëngbe Bëtsabiamna canye uámana entšá echántsemna. Ndocna te queochaisofsiye vínoye, ni

jabuáchiye. Chë Uámana Espíritu chabe ainaniñe echantsemándaye, cha cabá ndonÿna orscana.

¹⁶ Banga Israeloca entšanga, ntšamo cha chaojayanama mochanjontšé joyeunayana Bëngbe Bëtsá, chëngbe Utabná.

¹⁷ Cha echanjáshjango chë Bëngbe Bëtsabe Uámana Uabuayanabe natsana, y echántsebomna obenana y canÿe espíritu ntšamo chë Bëngbe Bëtsabe juabna oyebuambnayá Elías inabomncá. Chabe natsana echanjáshjango, bëtsëtsanga chëngbe básengaftaca ndoñe chamondëtsentsjanama, y chë nduauenanënga cachiñe chamotsatsjuabnama ntšamo chë Bëngbe Bëtsabe bominÿiñe tšabá amënga mondbetsejuabnaysá. Y chca, entšanga cha echantsapróntaye Bëngbe Utabná jabama orscama ca —chë ángel tbojanaryana.

¹⁸ As Zacarías chë ángelbioye tbojantjá: —¿Ntšamo atše stjobenaye jtsetatšëmbuana chë šcontsatsá soye ndegombre bëtsemnama? Er atše ya bëtsëjema sëntsemna y atšbe shémnaca cachcá ca.

¹⁹ Chora chë ángel tbojanjuá: —Zacarías, atše ángel Gabriel sëndmëna; atše Bëngbe Bëtsábioca sëndoserverna. Cha šonjichmó chë tšabe noticiënga aca jauyanama y juenayama.

²⁰ Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

²¹ Chë ángel Zacaríaseftaca yo-
jtsóyebuambnantscuana, entšanga shjoca
Zacaríasbiana imojtsobátmana, y mëntšá

imojtsejuabnaye: “¿Ndáyeca tša bën Bëngbe Bëtsabe bëts yebnentše ibojtsobiamnă ca?”

²² Zacarías tojtanbocna ora, ndoñe yontsobena chë entšángaftaca jóyebuambayana. Chënga tmojántatšëmbona, chë Bëngbe Bëtsábioye atschuanayentše Zacarías mo otjenayoquécá Bëngbe Bëtsábiocana canye soye tojáninýama, er chëngbioye jatšëmbombonana yojáuyana, ndëbiá yojoquéda causa.

²³ Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtaná.

²⁴ Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinýe cach tsoca yebnentše totanoquedá.

²⁵ Cha mëntsá yojtsichamo: “Bëngbe Utabná mora atšbiana tojtenojuabó, entšángbentše atšbe ngménana jtsebojuánama, básenga tondaye béntsabamna causa ca.”

Canýe ángel tojanabuayená Jesús jónýnama

²⁶ Isabel chnënguana ishinýe ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye,

²⁷ canýe shembása María ca uabainá jauatsétsayama. Mariyna cabá boyabása ndu-abuatmá inamna, pero Joséftaca jobouamayama tbojansbuachená. Y Josena, rey Davídbentšana entšá inamna.

28 Chë ángel Maríybíoye tojána y mëntšá tbojanchuá: —¡Mouena. Bëngbe Bëtsá tšabe bendición acbiana tonjama! ¡Bëngbe Utabná ácaftaca entsemna ca!

29 Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanchuama.

30 Chora chë ángel tbojaniyana: —María, ndoñe matauatjana, Bëngbe Bëtsá entsama tšabe bendicionënga chacotsebomnama.

31 Aca ngomamaná cochanjoquéda y canye šešona boyabásetema cochántsebomna, y chana Jesús ca cochjuabaye.

32 Cha puerta echantsámana, y entsangna Bëngbe Bëtsabe Uaquiñá ca chábíoye mochantsábobuatma. Y Bëngbe Bëtsá chë Utabná, chábíoye canye rey bochanjábema, ntšamo David yojamncá,

33 y Jacóbëbentsana entsanga nyetsca tescama echántsamëndaye, y chabe mándayana ndocna te queochaisopochóca ca —chë ángel tbojaniyana.

34 Chentsana María chë ángelbíoye tbojantjá: —¿Ntšamo chca yochjopása, cabá ndoñe boyá sëntsebomnëse ca?

35 Y chë ángel tbojanjuá: —Chë Uámana Espíritu echanjabo nyets ácheñe, y Bëngbe Bëtsabe obenánaca ngomamaná cochanjoquéda. Chabe obenana mo jantšetëshcá cmochanjabouútsbotse; chíyeca chë echanjónýna šešona Uamaná echántsemna, y chábíoye Bëngbe Bëtsabe Uaquiñá ca mochantsábobuatma.

36 Mouena, Isabel, acbe primá, canye šešona bochantsebomna, masque ya bëtsananá cha entsemna; chë “šešona ndbomná ca”

monjanabobuatmá, mora ya chnënguana ishinÿe ngomamaná entsemna,

³⁷ er Bëngbe Bëtsá lempe jamama endobena ca —cha tojánayana.

³⁸ Chora María chë ángelbioye tbojaniyana: — Bëngbe Bëtsabe oservená atse séntsemna. Bëngbe Bëtsá átseftaca chaoma ntšamo šcojauyancá ca.

Y chentšana chë ángel tojtsatanoñe.

María tojána Isabel jabuáchama

³⁹ Chentšana, María tojanoprontá y tojanochëmo canÿe puebloye, Judeoca tjañenache luarinë.

⁴⁰ Chocna cha, Zacaríasbe yebnentše tojánamashëngo y Isabélbioye tbojanchuá.

⁴¹ Isabel ntšamo María tbojanchuama tojanuena ora, Isabelbe šëšona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe jtsemándayama.

⁴² Chcasna, Isabel jabuache tojánayana: —¡Bëngbe Bëtsá achiamo más tšabe bendicionënga entsama nyetsca shembásengbiama, y chë cochántsebmna šëšonbiámnaca cachcá!

⁴³ Atše merecido taitsatobuajoñe, atšbe Utabnabe mamá chašuabobuáchama;

⁴⁴ er atše sënjouena ntšamo šconjachuá, y cachaora atšbe šëšona oyejuayá atšbe uafsbioye tonjobonjó.

⁴⁵ ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerta oyejuayá cochántsemna ca!

⁴⁶ Chora María tojánayana:

“Nÿets ainánaca Bëngbe Utabná chantsadorana,
 47 y Bëngbe Bëtsá, atšbe Atsbocayabiana corente
 chanjóyejuaye.

48 Bëngbe Bëtsá atšbiana tojtenojuabó, atšbe chabe
 oservénëjema.

Er morscana muentša entšanga nÿetscanga puerte
 oyejuayá ca šmochantsábobuatma.

49 Bëngbe Bëtsá, chë nÿets obenana bomná, chabe
 obenánaca bëts soyënga atšbiana tonjama.

¡Bëngbe Bëtsá puerte Uamaná ca entsabaina!

50 ¡Morsca entšanga y más chcoyënga, chábioye yeu-
 nanëngbiana, cha sempre bochántsengmena!

51 Cha, chabe obenánaca bëts soyënga tojama,
 y chë nÿe cachënga bëtsëtsanga enobiamnayëngbe
 juabna tojtsepochochá;

52 reyëngbioye chëngbe mándayentsana tojtsat-
 satše;

pero chë nÿe cachënga bëtsëtsanga ndenobi-
 amnayëngbioye, uámanënga tojábiana.

53 Chë shëntseca imomnëngbioye, chamosama
 bëtscá cha tojatšatá,

pero chë bomnëngbioyna tondaye tonjatšatá.

54 Cha tojanëjabuache chabe entšanga Israeloca,
 chabe oservénënga,

y ndoñe tbonjánebnatjëmbe jtsalastemánana,

55 nÿetsca tescama chë Abraham y chábentsana
 entšángbioye,

ntšamo bëngbe bëts taitanga Bëngbe Bëtsá to-
 janašebuachenacá ca” —cha tojánayana.

56 Mariyna unga ishinÿe Isabélaftaca
 tojanoquedá, y chentšana cachabe yebnoye
 tojtaná.

Juan chë Ubayaná tojanonýná

⁵⁷ Isabel jtsešócanama tojanóntšabuache ora, canýe šešona boyabásetema tojanonýná.

⁵⁸ Isabelbe juachañe oyenënga y chabe pamíllanga tmojánatatsëmbona ntšamo Bëngbe Bëtsá chábioye ibojalastemama, y chama corente Isabélaftaca tmojanoyejuanga.

⁵⁹ Chë šešona posuftayté yojtsebonna ora, tmojánashjango y chëtëmbioye chë más delicadentše base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá;

⁶⁰ pero chabe mamá tojanéyana: —Ndoñe. Quem šešona echantsabaina Juan ca.

⁶¹ As chënga Isabélbioye tmojanianyana: —Acbe pamíllangbeñe ndocná chca quenatabaina ca.

⁶² Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca.

⁶³ Zacaríasna jatšëmbombonana canýe tablëbé tojanéyá y chiñe tojanábema: “Cha entsabaina Juan ca”. Y chë causa, nyëtscanga ojnanánënga imojtsemna.

⁶⁴ Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana.

⁶⁵ Chë juachañe oyenënga nyëtscanga tmojanëuatjaná, y Judeoca nyëtsca chë tjañenache luariñe entšanga chë soyëngama imojtsencuëntaye.

⁶⁶ Nyëtscanga chë soyëngama tmojánatatsëmbona ora, chëngnaca corente chama imojtsejuabnaye y mëntsá imojtsichamo: “¿Chë básetema, bëtsá

ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

Zacarías, Bëngbe Bëtsábioye jëtschuayama

⁶⁷ Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

⁶⁸ “¡Chë Utabná, chë Israeloca entšangbe Bëtsá matschuanga,

er cha tonjabo chabe entšanga jabújabuachama y jabátsebacama!

⁶⁹ Cha bochanjíchmuá canÿe atsebacayá puerte obenana bomná,

y cha echántsemna Bëngbe Bëtsabe oservená Davídbentšana entšá;

⁷⁰ ntšamo Bëngbe Bëtsá bayté entsemna, chë chabe juabna oyebuambnayëngbiajana,

chë chábenga imomnëngbiajana bënga šojanašebuachenacá, mëntšá:

⁷¹ Cha canÿa bochjanichmuá bëngbe uayayënga y nÿetsca uaboyënjëngbiana bënga jabátsebacama;

⁷² bëngbe bëtsétsangbioye jálastemama,

y jenójuaboyama y jamama chabe uámana trato,

⁷³ ntšamo Bëngbe Bëtsá, bëts taitá Abrahámbioye tbojanšbuachenacá.

⁷⁴ Cha tbojanšbuachená bëngbe uayayëngbiana bënga jabátsebacama,

chca, bënga ndauatjca Bëngbe Bëtsá jaserviama,

⁷⁵ y chabe entšangcá, nÿetsca soyënguiñe tšabá amënga, Bëngbe Bëtsabe delante nÿetsca te bëngbe vidënguiñe jëftsiyenama.

76-77 Y aca, atšbe básetemna, Běngbe Bětsabe juabna oyebuambnayá ca cmochantsábobuatma, entšángbioye Běngbe Bětsabe soyěngama cochtsabuayiynama, Běngbe Utabná cabá ndáshjango ora, bacna soyěnga amana chamuajbanama; as Běngbe Bětsá chěngbe bacna soyěnga echanjáperdonaye, y Běngbe Utabná jabama mochantsoopróntaye.

78-79 Běngbe Bětsá bēnga puerte šualastemánayeca, canya bēngbe juabnēnga binynayá bochanjíchmua, bēnga chē bacna soyěnga causa mo ibetiñcá y obanēngbe luarentšcá vida bomnēngbioye jabátsebacama, y jabuátambama ntšamo natjěmbana jtsiyenana ca” —cha tojánayana.

80 Chē básetema vojontšé jobóchana y chabe espíritnaca puerte. Bayté, entšanga ndoyena luarēnguenache cha yojěftsiyena, Běngbe Bětsá Israeloca entšángbioye cha tojáninyanjěntscuana. Chentšana, chamuábuatmanamna tojanontšé Israeloca entšángbeñe jóyebuambayana.

2

Jesucristo tojanonjñá (Mt 1.18-25)

¹ Chē tempo yojamna canye Romoca běts mandado, Augusto ca uabainá; y cha, chē natsanama tojanmandá njětsca entšanga chamuenábemama.

² Chē soye tojanochñēngo Cirenio ca uabainá Siroca mandado yojamna ora.

³ Chamna, n̄yetscanga tojanotocá jtangana jenábeməngama, cada ona ndémoca chəngbe bəts taitanga imojəftsiyena puebloye.

⁴ As, Josénaca Galilea luarentšana Nazaretocana yojəftsebcna y Judeoye, Belén puebloye, tojtaná. Tempo, Josebe bəts taitá rey David, Belenoca inoyena. Y José, Davídbentšana entsá inámnayecna, choye jenábemama tojtaná.

⁵ Maríaftaca tojána jenábemama, y muana tbojanšbuachená Joséftaca jobouamayama. María ngomamaná yojtsemna,

⁶ y Belenoca ibojtsemnəntscuana, chə ora tbojanóntšabuache jtsešócanama.

⁷ Y chentše María ibojtsebomna chabe natsana šešona, can̄ye boyabásetema. Posadoca tondaye luare yontsemna causna, chata n̄ye uacnəngbe átana tambuentše tbojanoquedá. Y Jesús tojanon̄yná orna, María tbojtanəntsacjuá y can̄ye bachetémiñe tbojanjajó.

Chə angelotémənga y chə oveshənga abujəñyanga

⁸ Belén béconana, chə ibeta, oveshənga abujəñyanga shəntsjoca cachəngbe oveshəngaftaca imojtsemna.

⁹ N̄ye ndeolpe, Bəngbe Bətsábiocana can̄ye ángel tojánebəbuacna, y Bəngbe Bətsábentšana corente yojtsebuashin̄yina chəngbe shəconániñe. Chama chənga puerte imojocochauatjaná.

¹⁰ Chora chə ángel tojanéyana: “Ndoñe matauatjəngana. Sənjabo tšabe soyənga tonjopasama jábuayenama, n̄yetscanga chamóyejuama.

¹¹ Mora chə David tonjanon̄yná pueblentše can̄ye šešona tonjon̄yná. Cha tšəngaftangbe

atsebacayá echántsemna y tšëngaftangbe entšangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná.

12 Ndegombre chca entsemnama mëntšá šmochanjátatsšëmbona: canÿe šëšona ntsacjuaná y uacnëngbe bachetémiñe jajoná šmochanjínÿena ca” –cha tojanëyana.

13 Cachora, celocana mallajta angelënga chë nat-sana ángelbentšë tmojánbocana y Bëngbe Bëtsábioye mëntšá imojtsatschuanaye:

14 “¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiamá, Bëngbe Bëtsá corente entsoyeuá; quem luariñe chëngbeñe puerte tšabá chaotsemna ca.”

15 Chentsana chë angelënga celoye tmojésanshëcuana. Y chora chë oveshënga abujänÿanga tmojanontšë jeniyanana: “Belenoye cuajna, chë quem tojopasá soye jinÿama. Ndegombre, Bëngbe Bëtsá chë soye šojanÿanÿé ca.”

16 As betscó tmojána y tmojánanÿena María, José y chë šëšonatema bachetémiñe jajoná.

17 Chë šëšona tmojáninÿe ora, chënga tmojanacuntá Jesusbe bëtsëtsata y chë ínÿengbioye, ntšamo chë šëšonbiamá chë ángel tojanëyancá.

18 Nÿetscanga chë tmojanuenënga tmojanenjananá ndayá chë oveshënga abujänÿanga imojtsacúntama.

19 Pero Mariyna nÿe cachabe ainanoca quem soyëngama más bën inétsenojuabnañe.

20 Chentšana, chë oveshënga abuajënyanga tmojtaná Bëngbe Bëtsá atschuanaye, ndayá tmojáninyama y tmojanuenama. Nyëtsá tojanopasá lempe ntšamo chë ángel tojanëyancá.

Bëngbe Bëtsabe bëts yebnoye Jesús tmojanamba

21 Posufta te tojánashjache ora, chë basetémbioye chë más delicadentše base bobachtema tmojantëtše, Bëngbe Bëtsabe entšá bëtsemnama chaotsinýnama, ntšamo judiënga imojanamancá; y Jesús ca tmojanabaye, ntšamo chë ángel tbojaniancá, María cabá ndoñe ngomamaná yontsemna ora.

22 Y chë tempo tojanóshjango, ndaye ora José y María yojtsamna jamana ntšamo Moisesbe leyiñe iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šešona tbojtsebomntšana. Asna, Jerusalenoye tbojánata y chë básetema tmojanamba, Bëngbe Bëtsabe bëts yebnoa jinýinyiyama,

23 ntšamo chë Bëngbe Utabná Moisésbioye tbojanianyé leyënguiñe iuayancá, mëntšá: “Canýe yebnentše chë natsana šešona boyabása tojtsemnësna, Bëngbe Bëtsábioye cha jinýinyiyana chábioye chabot-seservénama ca.” Chcasna, chë básetema Bëngbe Bëtsabe bëts yebnoye tmojanamba.

24 Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyiñe yomandancá. Chiñe mëntšá endayana: “Chë natsana šešona chaojonýná ora, boyabásetema tojtsemnëse, janshana

šmochjuamba uta fchetnatémata o uta šešona palomatémata, Běngbe Bětsá jětschuayama ca.”

²⁵ Jerusalenoca inamna canje bacó, Simeón ca uabainá; cha inamna njętsca soyěnguiñe tšabá amá, y yojaniyena ntšamo Běngbe Bětsá yoman-dacá. Cha yojanobátmana chě tempo ndaye ora, Běngbe Bětsá bochjanichmuá canya Israeloca entšanga cháuatsebacama. Y chě Uámana Espiritu chabe ainaniñe yojtsemna;

²⁶ chíyeca, cabá lempe chca ndopása ora, cha yojtsetátšěmbo cha ndoñe yochjanóbanama, chě Běngbe Bětsabe Uámana Uabuayaná ntjěftsinyá.

²⁷ Chě Uámana Espiritu tbojanmandáyeca, Simeón Běngbe Bětsabe běts yebnoye tojána; y Jesusbe bětsětsata chě bášetema tmojanamba ora, ntšamo Moisesbe leyiñe iuayancá chabiamama jamama ora,

²⁸ Simeón tbojanocutsá y Běngbe Bětsábioye tboj-tanchuá. Cha měntšá tojánayana:

²⁹ “Běngbe Utabná, mora šmolesenciá, atše acbe oservená natjěmbana jóbanana,

er ya tconjama ntšamo šconjanšbuachenacá;

³⁰ atše chě entšangbe Atsebacayá sěnjinye.

³¹ Aca cha tcojichmó njęts luarenache entšangbiamama.

³² Cha chě ndoñe judiěngbe juabněnga binynayá echántsemna;

y chábeyeca, njęts quem luarentše mochanjátatšěmbona, chě acbe entšangbiamama, Israeloquěngbiamama ca” —cha tojánayana.

³³ José y María ibojenjanata ntšamo Simeón Jesusbiamá yojtsichámuama.

³⁴⁻³⁵ Chentsana, Simeón Bëngbe Bëtsábioye tbojanimpadá tšabe bendicionënga chata chabotsebomnama chaomama; y María, chë Jesusbe mamábioye tbojaniyana: “Quem soyënga corente cmochanjacochtsetšenaná, mo ainana espadëjaca cuafjenëchnëngcá. Cha Israeloca banga echanjápochochocaye y banga echanjátsebacaye; y chca, ntšamo banga ainaniñe imojuabnacá echantsótatšëmbo. Israeloca banga quem básetema mochantsábotena y chabe palabréngnaca ca” — cha tbojaniyana.

³⁶ Chéntšnaca yojtsemna canye shembása Bëngbe Bëtsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentšá; ya bëtsananá cha inamna. Nye canyësëfta uata cha yojëftsebouamna;

³⁷ y chabe boyá tojanóbanentšana, cha posufta bnëtsana y canta uata viudá inamna. Ndocna te Bëngbe Bëtsabe bëts yebnentsana yonjábocana, y chentše tojanoquedá bnëtë y ibeta, Bëngbe Bëtsáftaca encuéntaye y cha atschuanaye; y chama, ba soye yojanamana tondaye ntjascá jtsemnana.

³⁸ Simeón, María y Josébioye yojtsëtsësnaye ora, Ana chëngbioye yojobeconá, y chë Atsebacayá tojanonynama Bëngbe Bëtsábioye tbojtanchuá chentsana, Jerusalenoca entšangbioye, chë canye atsebacayá Israeloca entšangbiamá imojanobatmanëngbioye tojanëyana, chana Jesús yojëtsemna ca.

Jesús Nazaret puebloca

39 José y María lempe ntšamo chë Utabnabe leyënguifne iuayancá tbojanma ora, Galilea luroye tbojtánata, cachëngbe puebloye, Nazaretoye.

40 Y chë básetema yojtsobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtscá tšabe bendiciónënga chaotsebomnama.

Jesús Bëngbe Bëtsabe bëts yebnoca

41 Chabe bëtseštsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta.

42 Jesús bnëtsana uta uata tojánashjache ora, Jerusalenoye tmojána, ntšamo imojanamancá.

43 Chë fiesta tojanopochocá chentšana, chabe bëtseštsata yebnoye ibojtsataye, y chata ntsetatšëmbcá, Jesusna Jerusalenoca yojtsoquedañe.

44 Chata ibojëtsejuabnaye Jesús chë inye entsángaftaca yojtsataboye ca; chcasna, canye te nyetsá benachëjana tbojánata ora, tbojanontšé chabe pamíllangbeñe y ubuatmëngbeñe jtsenguanguana,

45 pero ndoñe ibonjobenaye jtsinyenana. As, chata chora Jerusalenoye tbojésanshëcona choca cha jetsenguanguama.

46 Unga tianoye chata tbojanobená Bëngbe Bëtsabe bëts yebnentše cha jetsinyenana. Chana chë Moisesbe ley abuatambayëngbe tsëntsaca inétsotbemañe, chëngbioye inayaunana, inatjanaye.

47 Nýetsca ouenanënga imojtsenjnanaye Jesús tša osertaná inamnana, y tša tšabá jojuama cha yojtsobenama.

48 Chabe bëtsëtsata chca tbojáninýe ora, chátnaca ibojenjnaná. Chora, chabe mamá tbojaniyana: —Uaquiñá, ¿ndáyeca chca bëndátaftaca tcojama? Taitá y atše corente enócochinýenata cbondënguá ca.

49 As Jesús tojanëyana: —¿Ndáyeca atše šmonguá? ¿Ndoñe šondétatšëmbo atše šomna atšbe Taitabe yebnentše jtsemnana ca?

50 Pero chë bëtsëtsata ndoñe tonjanësertá ntšamo cha tojanëyancá.

51 Chentšana Jesús chë bëtsëtsataftaca Nazaretoye tojtaná y chata yojtsayaunana. Y chabe mana nýe cachabe ainanoca chë soyëngama más bën inétsenujabnañe.

52 Jesús yojtsobóchaye y más juabna yojtsebomna; y Bëngbe Bëtsá y nýetsca entšanga corente oyejuayënga chabiamana imojtsemna.

3

Juan chë Ubayaná entšanga yojanabuayiyiná (Mt 3.1-12; Mc 1.1-8; Jn 1.19-28)

1 Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey.

2 Anás y Caifás chë bachnangbe más uámana amëndayata ibojamna. Cach tempo, canýe luare entšanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaquiñá.

³ As Juan nÿetsca luarënguëjana Jordán béjaye béconana tojánachnëngo, entsanga mëntsá utsëtsnaye: “Tšëngaftangbe bacna soyëngama ngménaca šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora chochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.”

⁴ Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšaňe yojëftsabemcá. Cha mëntsá tojanábema:

Entsanga ndoyena luaroca canÿa enduáyebuache:
 “Bëngbe Utabná echanjabo ca; mo nda canÿe benache tojtseprontacá canÿe uamana entšá jashjanguama,
 cachcá, tšëngaftángnaca, Bëngbe Utabná jabama ainantšë tšabe juabnëngaca šmochtseprontana.

⁵ Nÿetsca jachaňe echantojútjia, y tjaňe y batsjabenga mochantenájachibiaye.

Chë scundma benachënga ndirichëjënga echántsatsmëna, y chë bacá mana benachënga mochantenájachibiaye.

Mo chë chca tmojtsamëngcá, canÿe benache japróntana canÿe rey cháúashjanguama, tšëngaftángnaca bëtscá šmochtseprontana tšëngaftangbe ainaniňe, Bëngbe Utabná jabama.

⁶ Y nÿetsca entsanga mochanjinÿe chë Atsebacayá Bëngbe Bëtsábentšana jabana ca” –cha tojanábema.

7 Chë entsanga Juan chaubáyama imojánbocana ora, Juan yojanëtsësnaye: “¡Mëtscuaye entsanga! ¿Nda tcmënjáuyana chë echanjóshjango uabouana castigüentšana šmochjotsbocá ca?

8 Bëngbe Bëtsábeñe ndegombre ošbuáchiyënga šmochtsemna, as chca chaotsinýna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiana jayanama: ‘Bëngna Abrahámbentšana entsanga, Bëngbe Bëtsabe entsanga fsëndmëna ca’. Er atše chanjayana, Bëngbe Bëtsá quem ndëtšbéngacnaca Abrahámbentšana entsanga nanjábiana.

9 Tatšnía ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsësnaye.

10 —¿Y as, ndayá jamama šojtsamna ca? —chora chë entsanga tmojantjá.

11 Y Juan tojanëjua: —Chë uta quëfsaíya uabomná bontsemna canýiyá jutštayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

12 Romocama entšángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

13 Y Juan tojanëyana: —Nýe ntšamo chë leyiñe yomandancá entšángbioye crocénana šmochtsayëngacaye ca.

14 Básefta soldadēngnaca chábioye tmojantjá: — ¿Ndayá jamama šojtsamna ca?

Y Juan tojanéyana: —Ndocnábioye tondaye šmatjáboca, ni jauátjanase, ni nýe ndayámnaca bonamente jobuáchēse; y nýe ntsachetšá šmacaná crocenánaca oyejuayēnga šmochsomñe ca.

15 Entšanga chē Bēngbe Bētsabe Uámana Uabuayanabiamama imojtsobátmana, y chēngna Juanbiamama imojétsejuabnaye nderado cha chē Bēngbe Bētsabe Uámana Uabuayaná nanjamna ca;

16 pero Juan tojanéyana: “Ndegombre, atše béjayeca cbondubáyana. Pero chē echanjabá atšbiamama corente más obenana endbomna, y atše mercedo taitatobuajoñe ni mo jotsejbiyana chabe shecochētjonēshentša corriēja jajafjonama. Chē Bēngbe Bētsabe benache chamojtishachēngbiamama, Bēngbe Bētsá echanjama chē echanjabábeyeca, chē Uámana Espiritu chēngbe ainaniñe cháumashēnguama. Pero chē ndoñe chamontishachēngbiamna, Bēngbe Bētsá echanjama chē echanjabábeyeca, chēngna corente castigánēnga chamotsemnana, mo iñeshequécá.

17 Canýe entšá chabe mētštá cucuatšīñe jiyēbana, chabe trigo jtsóbobemama, y chē ndoserverna shácuanēnga jtsejashtsētsana. Chabe trigo chē grano uaquécjnaye tsañe jtsabuájua, y chē ndoserverna shácuanēngna iñeshoye jtsatmetšana. Cachcá, chē átšbentšana echanjabá, chē tšabe entšanga echanjúbuaja, y chē bacna entšangna iñeshiñe echantsacastígaye, y chē iñe ndocna te queochátšfsana ca” —cha tojanéyana.

18 Chca y inýe palabréngaca Juan chē tšabe noti-

ciëngama yojanabuayiyná.

¹⁹ Tempo, Juan Heródesbioye tbojanácacana, cha tojanoubouamama cachabe catsata Felipe shémaftaca, Felipe cabá oyena ora; chana Herodías ca uabainá. Chama Juan tbojanácacana y nyetsca bacna soyënga Herodes tojanmámna.

²⁰ Pero Herodes Juánbioye joyeunaye luariña, cabá inye más bëts bacna soye tojátanma: Juánbioye cárceloye tbojtsanëtame.

Juan, Jesúsbioye tbojanabaye
(Mt 3.13-17; Mc 1.9-11)

²¹ Pero Herodes Juánbioye cabá ndutame ora, Juan ba entsanga tojanëbaye, y Jesúsna tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo,

²² y chë Uámana Espíritu mo canye palomatemcá Jesúsbioye yojtsastjajuana; y celocana Bëngbe Bëtsá tbojaniana: “Acna atšbe bonshana Uaquiñá condmëna. Acbiamna corente sëntsoyejuá ca.”

Jesúsbe bëts taitanga
(Mt 1.1-17)

²³⁻³⁸ Jesús unga bnëtsana uata yojtsebomna, entsángbeñe Bëngbe Bëtsabe soyëngama jóyebuambayama yojontsé ora. Entsanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,

Melqui Janabe uaquiñá

y Jana Josebe uaquiñá.
José yojamna Matatíasbe uaquiñá,
Matatíasna Amosbe uaquiñá.
Amós Nahumbe uaquiñá,
Nahúm Eslibe uaquiñá
y Esli yojamna Nagaibe uaquiñá.
Nagai yojamna Maatbe uaquiñá,
Maatna Matatíasbe uaquiñá.
Matatías Semeibe uaquiñá,
Semei Josecbe uaquiñá
y Josec yojamna Judabe uaquiñá.
Judá yojamna Joananbe uaquiñá
y Joanán Resabe uaquiñá.
Resa Zorobabelbe uaquiñá,
Zorobabel Salatielbe uaquiñá,
y Salatielna Neribe uaquiñá yojamna.
Neri yojamna Melquibe uaquiñá,
Melqui Adibe uaquiñá.
Adi Cosambe uaquiñá,
Cosam Elmadambe uaquiñá,
y Elmadamna yojamna Erbe uaquiñá.
Er yojamna Jesusbe uaquiñá
y Jesús Eliezerbe uaquiñá.
Eliezer Jorimbe uaquiñá
y Jorimna Matatbe uaquiñá.
Matat yojamna Levibe uaquiñá,
Leví Simeonbe uaquiñá
y Simeón Judabe uaquiñá.
Judá Josebe uaquiñá,
José Jonambe uaquiñá,
y Jonamna yojamna Eliaquimbe uaquiñá.
Eliaquim yojamna Meleabe uaquiñá,
Melea Menabe uaquiñá.

Mena Matatbe uaquiñá,
y Matata yojamna Natanbe uaquiñá.
Natán yojamna Davidbe uaquiñá,
David Isaibe uaquiñá
y Isaína Obedbe uaquiñá.
Obed Boozbe uaquiñá,
Booz Salabe uaquiñá
y Sala yojamna Naasonbe uaquiñá.
Naasón yojamna Aminadabēbe uaquiñá,
Aminadab Adminbe uaquiñá
y Admin Arnibe uaquiñá.
Arni Esrombe uaquiñá,
Esrom Fáresbe uaquiñá
y Fáresna yojamna Judabe uaquiñá.
Judá yojamna Jacobēbe uaquiñá,
Jacob Isaacbe uaquiñá
y Isaacna Abrahambe uaquiñá.
Abraham Tarebe uaquiñá
y Taré yojamna Nacorbe uaquiñá.
Nacor yojamna Serugbe uaquiñá,
Serug Ragaube uaquiñá
y Ragauna Pelegbe uaquiñá.
Peleg Heberbe uaquiñá,
y Heber yojamna Salabe uaquiñá.
Sala yojamna Cainanbe uaquiñá,
Cainán Arfaxadbe uaquiñá
y Arfaxadna Sembe uaquiñá.
Sem Noebe uaquiñá
y Noé yojamna Lamecbe uaquiñá.
Lamec yojamna Matusalenbe uaquiñá,
Matusalén Enocbe uaquiñá
y Enocna Jaredbe uaquiñá.
Jared Mahalaleelbe uaquiñá,

y Mahalaleelna yojamna Cainanbe uaquiñá.
 Cainán yojamna Enosbe uaquiñá,
 Enós Setbe uaquiñá,
 Set Adanbe uaquiñá
 y Adán Bëngbe Bëtsabe uaquiñá.

4

Jesús tojanobená Satanás jayëñjanama (Mt 4.1-11; Mc 1.12-13)

¹ Juan, Jesúsbioye tbojanabáyentsana, chë Uámana Espíritu Jesusbe ainaniñe yojtsemádaye. Jesús Jordán bejajoicana tojtaná y chë Uámana Espíritna entšanga ndoyena luaroye tbojanánatse.

² Chentše canta bnëtsana te tbojanjëtana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

³ Chora Satanás tojésanabo y tbojaniyana: —Aca ndegombre Bëngbe Bëtsabe Uaquiñá tcomnëse, momandá quem ndëtšbenga tandëse chaobiama ca.

⁴ As Jesús tbojanjuá: —Bëngbe Bëtsabe uabemana palabrënguiñe mëntšá endayana: “Entšá nÿe tandëseca ndoñe vida ntsebomnana ca.”

⁵ Chentšana, Satanás canÿe bëts tjoye tbojanánatse y betscó nÿetsca quem luarentša amëndayëngbenache tbojaninÿinÿé.

⁶ Chora Satanás tbojaniyana: —Atše nÿets obenana cbochjätsetaye y lempe quem amëndayëngbenache yobinÿna soyëgnaca. Atše lempe chca sënjóyëngacñe y sëntsobena jatsetayama nda stsebošábioye.

7 Aca chacojoshëntsamentšé y chašcojadorase, lempe nÿetsá acbiamá echántsemna ca.

8 Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Acbe Bëtsá, chë Utabná cochtsadorana y nÿe cha cocht-seservena ca.”

9 Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tshanánoca tbojanatsá, y tbojaniana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja,

10 er Bëngbe Bëtsabe uabemana palabrenguiñe endayana:

Bëngbe Bëtsá chabe angelënga echanjichamuá, chacmotsinÿenama.

11 Chënga buacuatsëngaca cmochanjishache, she-cuatše ndocá ndëtsbeñe chacondomama ca —cha tbojaniana.

12 Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

13 Cabana, Satanás tojanajbaná bošana Jesúsbioye bacna soyëngama jacochënguama, y bënama Jesúsbentšana tojtsanojuánañe.

Jesús tojanontšé Galileoca chabe trabajo jama-

(Mt 4.12-17; Mc 1.14-15)

14 Chentšana, Jesús Galileoye tojesaná chë Uámána Espíritbe obenánaca, y nÿetsca entšanga chë luariñe chabiamá imojtsencuëntaye.

15 Jesús yojtsabuátambaye chë judiëngbe enefjuana yebnënguenache, y nyëtscanga cha imojtsatschuanaye.

Jesús Nazaret puebloca
(Mt 13.53-58; Mc 6.1-6)

16 Chentšana Jesús Nazaretoye tojtanashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnëntše tojánamashëngo. Y chocna tojantsbaná Bëngbe Bëtsabe palabra jualíama.

17 Chë Bëngbe Bëtsabe juabna oyebuambnayá Isaíasbe librëša tmojaniyé chauliama. Chë librëša yojutëfjona orna, tojáninÿena mëntšá uábemanentše:

18 “Chë Utabnabe Espíritu átšeftaca entsemna, er atše uabuayaná stsemna chë Bëngbe Bëtsabe tšabe noticiënga chë ndbomnëngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínÿnama;

jamama chë ínÿengbe causa imosufrínënga, tempcá cachcá tšabá chamotsatsmënama;

19 y entšanga jáuyanama ndëmua ora chë Utabná chabe entšanga yochjatsebacaye ca.”

20 Jesús jualíama tojanpochocá y chora chë uajabuachanábioye chëša tbojtaniyé y tojtanótbema. Nyëtsca entšanga chë enefjuana yebnëntše imojtsemnënga Jesúsbioye imojtsobuáuatja.

21 Chora Jesús tojanontsé mëntšá jayanana: — Camënté tšëngaftangbeñe tonjopasá ntšamo quem librěšañe iuabemancá ca.

22 Nÿetscanga Jesusbiamá tšabá imojtsencuéntaye y ojnánänënga imojtsemna tša botamana cha yojtšóyebuambnama. Y chënga imojtsentjanaye: —¿Quem boyabása ndoñe Josebe uaqiñá yondmëna ca?

23 Jesús yojtsetátšëmbo ntšamo cha tojánayaniñe chënga ndoñe tmonjanóšbuachema. As tojanéyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe puebléntšnaca cachcá moma ca”.

24 Y cachora Jesús más tojanoyebuambá, mëntšá: “Ndegombre cbëyana, ni canÿe Bëngbe Bëtsabe juabna oyebuambnayábioye cachabe pueblentše tšabá quematonÿá.

25 Ndegombre cbëyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tséntsañe nÿetšá ndoñe tonjanafté y bëts shëntsana chë luariñe yojtsebinÿna.

26 Pero Bëngbe Bëtsá, Elíasbioye ndoñe tbonjanichmó ni mo canÿe Israelentša viudábioye, y aiñe tbojanichmó ínÿoye, Sarepta ca uabáinoye, Sidón béconana, canÿe chentša viudábioye.

27 Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imo-

jamna bacna nguayanánaca šoquënga, y ni mo canya chentša šocábioye tbonjanshná, pero aínne canye šocábioye, Naamán ca uabainá, cach bacna nguayanánaca, Sirocá ca” –cha tojánayana.

28 Chë judiëngbe enefjuana yebnentše imojtsemna entsanga chca tmojanuena ora, puerte tojánetëna.

29 As, chora chënga tmojantsbaná, chë pueblentsana Jesús imojtábocna y más tsjuanoye canye peñëšëjana imojuánatse. Chënga imojanajebna cach peñëšiñe, y chë entsanga imojtseboše Jesús chocana jtsajuatsëntšana.

30 Pero Jesusna chëngbe tsëntsajana tojánachnëngo y ínjoye tojtsanoñe.

*Jesús, bayëjbe juabna cányabioye tbojanbojuaná
(Mc 1.21-28)*

31 Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentše entsanga jabuátambana.

32 Entsanga imojtsenjnanaye ntšamo Jesús yojtsabuátambama, er chamna mo canye mando bomnacá yojtsóyebuambnaye.

33 Chë enefjuana yebnentše, canye boyabása bacna bayëja uambayá yojtsemna, y chabe causa chë boyabása tojanontsé mëntšá uayebuáchana:

34 —¡Cachcá šmonýá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndëtatšëmbo nda aca comnama, aca chë Bëngbe Bëtsabe Uamaná ca.

35 Chora Jesús chë bacna bayëjbioye tbojt-sanácacana y tbojaniyana: —¡Iytëca móbema y chábentšana maisebocna ca!

As chora chë bayëja entšanguentše chë boyabásabioye tbojanshajayé, y ndocá ntjëftsemcá chábentšana yojésebocna.

36 Chë soyama nyetsca entšanga imojénjanaye y mëntšá imojtsenatsëtsnaye: “¡Tša chca palabrënga! ¡Quem entšá mandayacá y obenacá chë bayëjënga entsamënda, y chënga montsaisebocana ca!”

37 Y Galileoca nyetsca pueblënguiñe Jesusbiana yojtsótatsëmbo.

Jesús, Simón Pédrëbe uambén mamábioye tbojan-shná

(Mt 8.14-15; Mc 1.29-31)

38 Chentšana, Jesús chë judiëngbe enefjuana yebnentsana tojëftsanbocna y Simonbe yebnentše tojánamashëngo. Simonbe uambén mamá šocá in-ajájona jabuache calentóraca, y chë chentše imojtsemna entšanga chabiana Jesúsbioye tmojanimpadá.

39 Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontšë chënga jobuácuedana.

Jesús ba šoquënga tojanashná

(Mt 8.16-17; Mc 1.32-34)

40 Shinÿe yojuenatjëmba ora, banga inÿe y inÿe šocana bomnënga Jesúsbioye tmojanënatse, y cha nyetsca šoquëngbeñe cucuatšënga tojanajájó y tojanashná.

41 Chora, ba šoquëngbentšana bacna bayëjënga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtsëcácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnama.

Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiná (Mc 1.35-39)

42 Yëfsana tojanbinýna ora, Jesús chë pueblentšana tojëftsanbocna, y canýe luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnoye tmojánashjajna. Chënga imojétseboše Jesús cach pueblentše chaotsoquedáñama,

43 pero Jesús tojanëyana: “Atše šontsemna chë tšabe noticiënga Bëngbe Bëtsabe amëndayama inýe pueblënguenáchnaca jábuayenana. Chama Bëngbe Bëtsá šonjichmó ca.”

44 Y chentšana, Jesús yojánana Bëngbe Bëtsabiamama entsángbioye abuyayinaye, chë judiëngbe enefjuana yebnënguenache Judeoca.

5

Canýe te mallajta beonga ashebuánaye te (Mt 4.18-22; Mc 1.16-20)

1 Canýe te, Jesús, Genesaret ca uabaina uafjajónaye tsachañe yojtsemna ora, ba entsanga tmojánashjajna, y chënga tša imojtsenajuatsëntšnaye Bëngbe Bëtsabe palabra jounama.

2 Jesús, chë uafjajónaye tsachañe bécoñe tojáninÿe uta ena barquëshá; chë beonga ashebuánayëngna barquëshanguentshana tmojëftsanbocna atarraïëshangá jetsáboshabiama.

3 Jesús canÿe barquëshañe tojánamashëngo; chësha Simónbeshá inauamna. Chora Simónbioye mëntšá tbojanianyana: “Quem tsacháñentshana chcoye mëyamba ca.”

4 Tojanótbema ora, Jesús chë barquëshoicana tojanontšé entsanga jabuátambama. Jabuátambama tojanpochocá orna, Simónbioye tbojanianyana: —Shbuatsëntsoye barquëshá mëyamba y tšëngaftangbe atarraïëshangá šmochjushbuetše, beonga jashebuáyama ca.

5 Pero Simón tbojanjuá: —Buatëmbayá, nÿets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraïëshá chantëtëshbuetše ca.

6 Tmojanëshbuetše orna, bëtschá beonga tmojánishëche y chëngbe atarraïëshangá tojanontšé jtsatanëcanana.

7 As, chë inÿe barquëshañe imojtsemna enutëngbioye tmojánëfjatsëmbo, jabújabuachama chamuábama. Chora chënga tmojánabo, y nÿets uta barquëshá beóngaca tmojanajutjé. Tša chëftanga causa, tojanontšé chë uta barquëshá jtsenatjëmbambana.

8 Simón Pedro chca tojáninÿe ora, Jesús bëntše tojanoshëntsamentšé y tbojanianyana: —¡Bëngbe Utabná, atše bacna soye amá sëndmëna, chíyeca átšbëntšana mojuaná ca!

9 Chë tša beonga jashebuáyama Jesús tojanmama, Simón y chë cháftaca imojtsemnënga imojuatjaná.

10 Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: — Ndoñe matauatjana. Morscana, entsanga Bëngbe Bëtsabiamá cochántsanguaye, y nÿe beonga ashebuanayá ndoñe quecochátsmëna ca.

11 As chora chë barquëshangá tsachoye tmojtanëyamba y lempe jéseboshjonëse, Jesús tmojanasto.

Jesús, canÿa bacna nguayanánaca šocábioye tbojanshná

(Mt 8.1-4; Mc 1.40-45)

12 Jesús canÿe pueblentše yojtsemna ora, chentše tojánashjango canÿe entsá bacna nguayanánaca šocá. Chë šocá Jesúsbioye tbojáninÿe ora, tojanoshëntsamentšé y jubiaca fshantsóntscoñe yojotsejbéna y tbojanimpadá: — Bëngbe Utabná, aca tcojtsebošëse, aca catjobenaye atšbe šocana jtsebojuánana ca.

13 As Jesús cucuátšeca tbojánbojajo y tbojaniyana: —Aíñe, sëntseboše. ¡Šocana cbotsebojuaná ca!

Y cachora chë šocana tbojtsanóbojuanañe.

14 Chora Jesús tbojanmandá: —Ndocnábeñe chë soye cattsecuëntaye; nÿe Jerusalenoca báchnëbioye motsa, y cha cochjinÿinÿiye aca mora ya tšabá cojtsatsmënama; y chora cochjuátšëmbona ntšamo Moisés chabe leyinÿe tojanmandacá, Bëngbe Bëtsábioye chama jëtschuayama, chca, nÿetsca

entsanga chamotatsëmbona mora ya tšabá cojtsatsmënana ca.

¹⁵ Pero ndayá Jesús yojtsamama más entsanga imojátatsëmbona, y ba entsanga imojtsójoye chábioye joyeunayama y chëngbe šocanëngama chauashnama.

¹⁶ Pero Jesús yojanamana jtsoñana entsanga ndoyena luarëngoye y choca Bëngbe Bëtsáftaca ibnéncuentaye.

*Jesús, canye jama ndobenábioye tbojanshná
(Mt 9.1-8; Mc 2.1-12)*

¹⁷ Canye te, Jesús yojtsabuatambá ora, chentše básefta fariseunga y ley abuatambayënga imojtsetbiámama, Galileoca nyetsca pueblënguentsana áshjajnënga, Judeoquënga y Jerusalemquënga. Y chora Jesús šoquënga yojtsashnaye, Bëngbe Bëtsabe obenánaca.

¹⁸ Chora tojanopasá, básefta boyabásenga canye šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye,

¹⁹ pero jamashjnama ndoñe tmonjanobená, tša entsanga causa. Chcasna, gradasëšënguëjana chë yebnentša tsbanánoye tmojánasëngo y batšá tejëshe tmojtsanjuaná. Chorna, chë atëfjnëjana chë šocá tjuashiñe tmojanéstjango, entsangbe tsëntsaca, Jesusbe natsanoica.

²⁰ Jesús tojáninye cha chë šocá jáshnama bëtsoyobenama chënga puerte imojtsošbuáchema. As, chë jama ndobenábioye tbojaniyana: “Bacó, acbe bacna soyënga tcbontseboperdoná ca.”

21 Chora chë ley abuátambayënga y chë fariseunga mëntšá tmojanontsé juabnayana: “Quem boyabása ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entšá quenátobena bacna soyëngama inya japerdónana; nýe Bëngbe Bëtsá aíñe ca.”

22 Pero Jesús yojtsetátšëmbo ntšamo chënga imojtsejuabnayama; as tojanéyana: “¿Ndáyeca tšëngaftangbe ainaniñe chca šmojtsejuabná?

23 ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’?

24 Y chca, morna atše chochanjínyanýiye, chë Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojaninyana: “Atše cbëyana, matëtsbaná, tjuashe mesocñe y acbe yebnoye motsatoñe ca.”

25 Cachora chë jama ndobená tojtantsbaná entšangbe delante, chë cha inajájona tjuashe yojesocñe y Bëngbe Bëtsábioye atschuanaye chentšana yojtsatoñe.

26 Chama nýetsca entšanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinýe ca.”

*Jesús, Levíbioye tbojanchembo chabuastama
(Mt 9.9-13; Mc 2.13-17)*

27 Chca yojochnëngüentšana, Jesús chentšana tojëftsanbocna y canýe entšábioye tbojáninye, Leví ca uabainá, chë entšángbioye impuesto Romocama atjanayentše inétsotbemañe. Chora Jesús tbojaniyana: “Šmasto ca.”

28 Y Leví lempe tojésanboshjona, tojantsbaná y Jesús tbojanasto.

29 Chentšana, Levina bëts fiesta chabe yebnentše Jesusbiana yojama. Y chë fiestentše imojtsemna banga impuesto atjanayënga; y inýe entšángnaca mesëshentše imojtsetbiámana.

30 Chora, chë fariseunga y chë ley abuátambayënga tmojanontsé chë Jesusbe uatsjëndayëngbiana podesca oyebuambnayana; y chëngbioye mëntšá tmojanëyana: —¿Ndáyeca tšëngaftanga impuesto atjanayëngaftaca y bacna soye amëngaftaca šmojtšesá y šmojtsofšëšná ca?

31 Y Jesús tojanëjua: —Salud bomnënga ashnayá ndoñe ntsëjabótana, pero šoquëngna aíñe.

32 Y atše ndoñe chiyátabo chë Bëngbe Bëtsabe bominyiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama

(Mt 9.14-17; Mc 2.18-22)

33 Chora chënga Jesúsbioye tmojaniyana: — Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nýe nýets tempo jesosañana y jesofšëšnañana ca.

34-35 Chora Jesús tojanějua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntšamo chca ndoñe nántsemna? Chë tojobouamá cha chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. Pero ora echanjóshjango y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá cha y chë ofjanëngaftaca endmëncá, cachcá endmëna atše, atšbe uatsjendayëngaftacnaca ca —cha tojanějua.

36 Jesús mëntsánaca tojanacuntá jabuátambama: “Ndocná queonÿbatatëtše basájua tsëm entšayañe, tanguá entšayá jtarmëndama. Chca tcojamëse, chë tsëm entšayá jtsandbemana, y chë tcojuatëtše entšējua chë tanguájuañe ndoñe tšabá ntsinÿnana.

37 Y cach ndoñe, chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana; y chca, chë vínoye y chë jasabenga tondayama ntjatoservénana.

38 Chíyeca co, chë tojtseshayana vínoyna tsëm jasabenguiñe juaftsuámana.

39 Ndocná, chë bóchena vínoye tojatëmo y chentšana játsbošana chë tojtseshayana vínoye jatofšiyana; cha jayanana: ‘Chë bóchena vínoye tša tšabeye ca’.”

6

Jesusbe uatsjëndayënga ochnayté trigo

*tmojanátabebe**(Mt 12.1-8; Mc 2.23-28)*

¹ Canÿe ochnayté, Jesús canÿe jajajana yojt-saye; chabe uatsjéndayënga trigo imojtsaiuatab-naye, imojtsaiúshenëcaye, y imojtsaiuasaye.

² Chë causa, básefta fariseunga tmojanatjaye: —¿Ndáyeca šmojtsama chë ochnayté jamama ndoñe quenátslesenciana soye ca?

³ Y Jesús tojanějua: —¿Ndoñe šmëndualía y šmondétatsëmbo, ntšamo rey David y chabe enutënga tmojanmama shëntseca imojtsemna ora y jasama yojtsëjaboto ora?

⁴ Chca orna, David Bëngbe Bëtsabe bëts yeb-nentše yojámashëngo y chë Bëngbe Bëtsá chentše yojamnama inÿinÿnaye tandëšënga yojase, y chë cháftaca imojánajna entšágnaca yojátšataye. Y chë tandëšna nÿe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canÿe bacna soye to-janma ca —Jesús tojanějua.

⁵ Y Jesús más tojanéyana: “Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca.”

Chë buashana cucuatše bomna entšá
(Mt 12.9-14; Mc 3.1-6)

⁶ Inÿe ochnayté, chë judiëngbe enefjuana yebnoye Jesús tojánamashëngo y tojanontsé jabuátambana. Y chentše yojtsemna canÿe entšá, catšbioica cucuatše buashanëtše bomná;

⁷ y chë ley abuátambayënga y fariseunga chiñe imojtserrondana jinÿama nderado Jesús chë

ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana.

⁸ Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojaniyana: “¡Motsbaná y chentše tsëntsaca motsaca!” Y chë entsá yojotsbaná y entsangbe tsëntsaca yojotsaye.

⁹ Chora Jesús chë ínÿengbioye tojanëyana: “¿Ndayá yojtselesenciana ochnayté jamana, canÿe tšabe soye o canÿe ndoñe tšabe soye? ¿Jatsbocana o jtsepochócana ca?”

¹⁰ Y nÿetscanga chabe chabuajana imojtsemnënga tojanëñyanÿé, y chë buashana cucuatše bomnábioye tbojaniyana: “Macuenÿanëjaná ca.” Y chë boyabása tojanacuenÿanëjaná, y tšabá chëtša yojtsatamna.

¹¹ Pero chë ínÿengna puerte tmojanotjayaná, y tmojanontšé enatsëtsnayana ndayá muanjobenaye Jesusbe contra jamana ca.

Jesús chë bnëtsana uta uatsjëndayënga tojanabacacá

(Mt 10.1-4; Mc 3.13-19)

¹² Chë tempo, Jesús tjoye tojána Bëngbe Bëtsáftaca jencuéntama; y nÿets íbeta cháftaca tbojanen-cuentá.

¹³ Tojanbinÿna ora, chabe ústonënga tojánachembo, y chënguentšana tojanëbuáyana bnëtsana uta uatsjëndayënga, chë ndëmuanÿënga “chabe ichmónënga cánaca” tojanëbobaye.

¹⁴ Chënga imojamna: Simón, chë Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé,

15 Mateo y Tomás, Santiago, Alfeobe uaquiñá; Simón, chë celote ca uabobainá;

16 Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšifne bochjanboshjoná.

Jesús ba entšanga yojanabuatambá y yojánashnaye

(Mt 4.23-25)

17 Chentšana, Jesús chëngaftaca chë tjocana tojtantsmá y canye jachañe tojanoquedá ba chabe ustonëngaftaca y ba inye entšangaftaca. Ba entšanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentšana, Jesúsbioye oído jabuájua y chëngbe šocanëngama chauashnama.

18 Y chábeyeca chë bacna bayëjbe juabna uambayënga tšabá imojtsatsmëna.

19 Njetsca entšanga tša imojtseboše y ndayánaca imojtsama Jesús jabojuama, er chábentšana bëts obenana yojtsóbocana y njetscanga yojtsashnaye.

Chë ndegombre oyejuayana bomnënga y ndëmuanyëngbiam tša lastema yochtsemna

(Mt 5.1-12)

20 Jesús chabe uatsjëndayëngbioye tojanontješé y tojanéyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiam entsemna ca.

21 “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántsaténbiajuaye ca.

²² “Puerte oyejuayënga šmochtsemna, entsanga chacmojtsëbuayënja ora, chacmojtsatëbuacana ora, chacmojtsëyanguá ora, y tšëngaftanga ndoñe tšabá šmonsama ca chënga chamojtsichamo ora, tšëngaftanga atšbe ústonënga bétsemnama.

²³ Chë te puerte šmochjóyejuaye, er celoca canye bëts uacanánana šmochántsebmna. Chëngbe bëts taitanga, cachcá chë Bëngbe Bëtsabe juabna oye-buambnayëngaftaca tmonjanma ca.

²⁴ “Pero ¡tša lastema tšëngaftanga bomnëngbiana, er mora oyejuayënga jtsemnama ya bëtscá šmojóyëngacñe ca!

²⁵ “¡Tša lastema tšëngaftanga chë mora shachanëngbiana, er shëntsana šmochántsebmna ca!

“¡Tša lastema tšëngaftanga chë mora oyejuayëngbiana, er ngménama šmochanjenóbošachna ca!

²⁶ “¡Tša lastema tšëngaftangbiana nyetsca entsanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oye-buambnayëngaftaca ca!” —Jesús tojanéyana.

Chë uayayëngbiana bonshánana jtsebmna
(Mt 5.38-48; 7.12)

²⁷ “Pero tšëngaftanga, átšbioye oue-nanënga cbëyana: Tšëngaftangbe uayayënga šmochtsababuányëshana; chë tcmo-jtsëbuayënjëngbiana tšabe soyënga šmochtsama;

28 chë tšëngaftangbiana bacna soyënga bošëngbiana, Bëngbe Bëtsá šmochtseimpadana tšabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana.

29 Nderado ndánaca cányoica tcmojajueb-jantšetase, cochjomiye chë ínyoica cachcá chacmomama; nderado ndánaca quëfsaiya tcmojuábocana, cachcá cochjonÿaye acbe shabuanguanëjuanaca chauetsácñama.

30 Ndánaca chacmojtjañábioyna, jatšetayana; y nda ndayánaca chacmojefcábioyna, ndoñe catjontšínÿena chacmatoyema.

31 Inÿëngaftaca šmochtsama, ntšamo chë ínÿënga tšëngaftangftaca chamotsamama šmojtsebošcá.

32 “Tšëngaftanga, nÿe chë tcmo-jtsababuánÿeshanënga šmojtsababuánÿeshanëse, ¿ndaye tšabe soye chca šmattsama?; er chë bacna entšágnaca chca mondbétsama.

33 O nderado, nÿe chë tšëngaftangbiana tšabe soyënga tmojtsamëngbiana tšabe soyënga šmojtsamëse, ¿ndaye tšabe soye chca šmattsama?; er bacna entšágnaca chca mondbétsama.

34 O nÿe chë cmochtëchenanguama šmojtsejuabnángbioye šmojúyentsámëse, ¿ndaye tšabe soye chca šmattsama?; er chë bacna entšágnaca mondbetsenántšamiana, chëngbentsana cachcá jtóyëngacñama jtsobátmanëse.

35 Pero tšëngaftangna cmontsamna chë uayayënga jtsababuánÿeshanana; y tšabe soyënga chëngbiana jtsamana y júyentsámiana,

chëngbentsana ndayánaca jtóyëngacñama ntjato-batmancá. Chca, tsëngaftanga uacanánana cuenta canye bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayëngaftaca y bacna entsangaftácnaca tsábia comna.

³⁶ Inyëngbiama lastemadënga šmochtsemna, ntšamo tsëngaftangbe Taitá yomncá ca” —Jesús tojánayana.

Ndoñe ntsichámuana chë inyënga tsabá o ndoñe tsabá tmonjamama

(Mt 7.1-5)

³⁷ “Ndocá inyëngbiama šmattsichamo chë ndoñe tsabá tmonsamama, y Bëngbe Bëtsá ndoñe queochátichamo tsëngaftanga ndoñe tsabá šmonjama ca. Inyëngbiama ndoñe šmattsichamo ndoñe tsabá tmonjama ca, y Bëngbe Bëtsá ndoñe queochátichamo tsëngaftanga ndoñe tsabá šmonjama ca. Inyënga šmochjáperdonaye y Bëngbe Bëtsá cmochanjáperdonaye.

³⁸ Inyëngbiaye šmochjatsataye y Bëngbe Bëtsá cmochántatsataye. Mo nda canye biaco medidiñe bëtsca tojajutjé, uashëshe y cmojtiyecá, Bëngbe Bëtsá cachcá cmochántatsataye. Ntšamo tsëngaftanga inyëngbiaye chašmojábiama, uabouana o ndoñe jabuache soyënga, Bëngbe Bëtsá cachcá tsëngaftangbiaye cmochanjábiama ca” —Jesús tojánayana.

³⁹ Jesús quem cuétnaca tojánayana jabuátambama: “¿Canye jtaná nantsobena inyë jtaná jtsanachayama? ¿Chca ndoñe nyets útata ndaye tbuabentše buanjótsatše?

40 Chë uatsjendayá ndoñe ntsemnana chë buatëmbayabiana más bëtsá. Pero chabe uatsjéndayana chaojapochocá ora, cach buatëmbayacá jtsemnana.

41-42 “Canÿa chabe bominyiñe canÿe niñëfja tojtsebomnëse, cha ndoñe ntsoebenana chabe catšátbioye jauyanana: ‘Acbe bominyëntšana canÿe polvështema jtsebuchjátsëcama šmolesenciá ca’. Natsana cha bontsemna cachabe bominyëntšana chë niñëfja jtšenobuchjátsëcana, tšabá jinÿama jobenayama, chabe catšatbe bominyëntšana chë polvotema jtsebuchjátsëcama. ¡Cachcá entsemna acbiana, bacna entšá chë ntšamo ndegombre tcojuabnacá ndinÿinÿnayá! Chë tša bacna soye cojtsama ca acbe catšátbioye tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jshétsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama ca” —Jesús tojánayana.

Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá (Mt 7.17-20; 12.34-35)

43 “Ndoñe queonÿbatsmëna, chë canÿe tšabe betiyiñe podesca soye jashájonana; ni canÿe ndoñe tšabe betiyiñe tšabe soye jashájonana.

44 Betiyënga jtsabuatmana ntšamo cada betiye tojtseshajcá. Uchmašëshentšana quenátopodena

higuëbé jocñana; ni uvašëša, shëshëntša betiyentšana.

⁴⁵ Chë tšabe entšana, chabe ainanoca tšabe juabnënga bomnentsana jtsóyebuambnayana; y chë bacna entšana, chabe ainanoca ndoñe tšabe juabnënga bomnentsana jtsóyebuambnayana. Er ndayá becá ainanoca tomnama entšá jtsóyebuambnayana ca” —Jesús tojánayana.

Chë uta ucuatjoniñe

(Mt 7.24-27)

⁴⁶ “¿Ndáyeca tšëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamaña?

⁴⁷ Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama:

⁴⁸ Cha endmëna mo canye entšacá, nda canye yebna jajebuamna becá fshantse jashenoye yojajutjo y ndëtsbenguiñe yojúcuatjoye. Béjayënga yojtsóftjajna ora, chë yebnejana yojobuachnëngo, pero ndoñe yonjobenaye juashajayana, er chë ndëtsbenguiñe jabuache yojaúcuatjona.

⁴⁹ Pero nda atšbe palabra tojouena y ntšamo stsichamcá ndoñe tontsama, endmëna mo canye entšacá, nda canye yebna yojajebo nye fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

7

Jesús canye Romano soldadëngbe amëndayabe

bochichnayábioye tbojanshná
(Mt 8.5-13)

¹ Entśángbioye chca jáuyanana tojanpochocá ora, Jesús Capernaum puebloye tojána.

² Chentşe vojyena canye romano soldadëngbe amëndayá. Cha ibnabomna canye bochichnayá puerte bonshaná, y chora cha šocá yojtsemna, ya jtsóbanama.

³ Jesús ba šoquëngbioye yojáshnama encuëntayana chë amëndayá vojouena ora, báseftanga bëtšëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama.

⁴ Chënga Jesúsbioye tmojánashjango y tša imojtseimpadana, mëntśá: “Quem soldadëngbe amëndayá merecido entsebuájona chacotsájabuachama;

⁵ er cha bëngbe luarentša entśángbioye corente endábabuanÿeshana, y cachá chë bëngbe enefjuana posada šonjayentšjebo ca.”

⁶ Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntśá chamuauyanama: “Atšbe Utabná, ndoñe yapa matenócochinÿenana átšbioye jabama. Atše merecido taitatobuajoñe aca atšbe yebnoye chacuamashënguama;

⁷ chíyeca ni mo añemo chiyatentšetá jama aca jajëbenguama. Morna ñe cochjayana y atšbe bochichnayá tšabá echántsatsmëna.

⁸ Er atše sëndábamna átšbioye mándayënga y átšnaca soldadëngbe amëndayá sëndmëna. Atše

canÿe soldádbioye stjauyana ‘motsa ca’, cha cachora jana; y ínÿabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

⁹ Jesús chca tojanuena ora, chë mándayabiana yojenjnana, y jobuértanëse chë ba entsanga cha us-tonéngbioye tojanéyana: “Ndegombre cbëyana, ni mo nÿets Israelentše, ni canÿa quem boy-abasacá tša ošbuachiyá chiyátinÿena ca.”

¹⁰ Y chë ichmónënga yebnoye tmojtana orna, tmojáninÿena chë bochichnayá ya tšabá yojtsatsmëna.

Jesús tojanma canÿe viudabe uaquiñá cháuatayenama

¹¹ Chca tojanopasá chentšana, Jesús yojétsaye Naín ca uabaina puebioye, y cháftaca chabe uat-sjéndayënga y ba entsanga imojtsaye.

¹² Chë pueblo amashjuanoye yojtsebeconá orna, entsanga chë pueblentšana canÿe obaná imojtsábocana jauátbontsama; chë obaná canÿe viudabe uaquiñá inamna y nÿe cha uaquiñá. Bëtsca entsanga chë obanabe mamá imojtsetjëmbamnaye.

¹³ Bëngbe Utabná chë viudábioye tbojáninÿe ora, chabiana tbojanongmé y tbojaniana: “Ndoñe matošachena ca.”

¹⁴ Y jobéconase, chë ataúse tojánbojajo, y chë obaná atambayënga tmojantsá. Y Jesús chë obanábioye tbojaniana: “Bobontse, atše cbëyana: ¡Matëtsbaná ca!”

15 Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tbojtanánatse.

16 Nÿetsca entšanga tša uatjana yojubuache chca tmojáninÿe ora, y Bëngbe Bëtsá imojtsatschuanaye, mëntšá jayanëse: “Bëngbentse canÿe Bëngbe Bëtsabe juabna oyebuambnayá cuatënjonÿná ca.” Y mëntšánaca: “Bëngbe Bëtsá tojabo chabe entšanga jabújabuachama ca.”

17 Y nÿets Judea luarëjana y chë chábuañe luarenache entšanga imojátatšëmbona ndayá Jesús tojanmama.

*Juan chë Ubayanabe ichmónënga
(Mt 11.2-19)*

18 Juan, lempe ntšamo Jesús yojtsamama yojátatšëmbona; er chabe ústonënga chama tmojancuentá. As Juan, chënguentšana útata tojánachembo,

19 y Jesúsbioye yojichamuá jatjayama cha tayojamna chë Cristo, chë jabama ibojanmënë, chë Uámana Uabuayaná, o ínÿabiamama jatobátmama tayojétsamna ca.

20 As chë Juanbe ichmónënga Jesúsbioye tmojanobeconá y tmojanियana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmënë, o šojtsamna ínÿabiamama jatobátmana ca.

21 Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinÿna.

22 Chora Jesús mēntšá tojanějua: –Motsata y Juánbioye šochjauyana ntšamo šojinýe y šojouencá: Chē jtanēnga tšabá entsatēbinýna, chē coshetēnga tšabá montsatana, chē bacna nguayanánaca šoquēnga shnánēnga montsatsmēna, chē tēsmēnga montsuenana, chē obanēnga tmontayena, y chē ndbomnjémēngbioye chē tšabe noticiēnga montsabuayiná.

23 ¡Puerte oyejuayá chaotsemna, nda atše ndoñe bacna soye stsama ca jtsejuabnayēse, átsbeñe ošbuáchiyana ndoñe tontsajbaná cha ca! –Jesús tojanéyana.

24 Chē Juanbe ichmónata chentšana tbojésanbocnentšana, Jesús tojanontšé Juanbiamá entšanga jáuyanana, mēntšá: “Juan jinýama šmojánbocna ora, ¿ndayá jinýama šmojánbocana entšanga ndoyena luaroye? ¿Canýe entšá ainaniñe tondaye añemo ndbomná, mo canýe šēše bínýiaca shatiyeynēšcá?

25 Y ndóñese, ¿ndayá jinýama choye šmojánbocana? ¿Canýe boyabása uámana entšayaca bopormaná? Ndoñe. Tšēngaftanga šmondétatšēmbo chē uámana entšayaca bopománēnga y chē bētscá bomnánaca nýe tondayama ntsecochinýencá vida bomnēnga, reyēngbe yebnēnguiñe mondbétsiyenama.

26 Asna, ¿ndayá jinýama choye šmojánbocana? ¿Canýa Bēngbe Bētsabe juabna oyebuambnayá? Ndegombre; y cbéyana, canýa Bēngbe Bētsabe juabna oyebuambnayabiamá más bētšá.

27 Cha, Juan, endmēna ndabiamá Bēngbe Bētšá chabe uabemana palabrenguiñe tojánayana mo

chabe ichmonacá, mēntśá tojánayana ora:
 Cristo, atśbe entśá natsana sēnjichmó acbiama
 chaóyebuambama,
 entśanga jábuayenama aca jabama ainaniñe tśabe
 juabnēngaca chamotseprontánama ca.

²⁸ Ndegombre cbēyana: Nŷets tempo entśángbeñe,
 ndocná quenátsmēna Juan chē Ubayanabiama
 más bētsá; masque chca, Bēngbe Bētsabe
 amēndayoca chē más batśá uamaná, cha más
 bētsá echántsemna ntśamo mora Juan yomnama
 ca” —Jesús tojánayana.

²⁹ “Nŷetsca entśanga chca Juánbioye
 tmojanóyeunanga y chē Romocama entśángbioye
 impuesto atjanayēngnaca, nŷets ainánaca
 tmojánayana Bēngbe Bētsá nŷetsca soyēnguiñe tśabá
 amá yomna ca; er tmojánenabaye ntśamo jubáyama
 Juan yojanamancá.

³⁰ Pero chē fariseunga y ley abuátambayēnga,
 ntśamo jubáyama Juan yojanamancá
 jóyēngacñama ndoñe tmonjánbošena ora,
 tmojtsanaboté ndayá Bēngbe Bētsá chēngbiana
 jamama yojanjuabnacá.”

³¹ Jesús mēntśánaca tojánayana: “Cbochanjáuyana
 ndayacá morsca entśanga imomna, y ndayēngcá
 chēnga imomna.

³² Chēnga mondmēna mo chē plazēngoca
 mondbetsetbiámama basetemēngcá; chēngna
 mēntśá jabuache jtšenatsayana: “Tśēngaftangbiana
 fsēnjaflautá y ndoñe chešmatslantsá; ngmēnaca
 fsēnjaversiá y ndoñe chešmatenóbošachna ca.’

³³ Juan chē Ubayaná tonjánabo y ndoñe
 quenjatamana bētscá entśángbeñe jtsemnana, ni

tandëse jasana, ni vínoye jofšiyana; y tšëngaftanga šmotsichamo chana bacna bayëjbe juabna uambayá inamna ca.

³⁴ Morna, chë Bëngbe Bëtsá Entsó tbojanbemá tonjabo y chana aíne entsamana bëtsá entsángbeñe jtseyayana y jtsofsëšnayana, y tšëngaftanga chabiamá šmotsichamo: ‘Chana yapa uasayá y vínoye tmoyá entsemna y Romocama entsángbioye impuesto atjanayënga y bacna soyënga amëngbe amigo ca’.

³⁵ Pero Bëngbe Bëtsá endbétsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca” –cha tojánayana.

Jesús, chë fariseo Simonbe yebnentse

³⁶ Canÿe fariseo Jesúsbioye tbojanofja saná jauasama, y Jesús chabe yebnoye tojána y mesëshentse yojótbema.

³⁷ Chë pueblentse yojamna canÿe shembása, bacna vida bomná. Jesús chë fariseobe yebnentse yojtseyesama chë shembása yojátatšëmbona; as cha chë yebnoye tojánashjango y tojanamba canÿe alabastro botellëse, jútjena canÿe botamana uanguëtse béjayeca.

³⁸ Jesusbe shecuatšentse yojoshëntsamentšiyë, šachénaca; shëchbuíyeca chabe shecuatšënga yojtsefchecuacná y cachabe stjënashaca ibojtsatsshéchojuaye. Chabe shecuatšënga yojtonguëtšëntšiyë y chë botamana uanguëtse béjaye ibojtashecbuëscacja.

³⁹ Chë fariseo Jesúsbioye ofjaná chca tojáninÿe ora, mëntšá Jesusbiamá yojtsejuabnaye: “Cha

ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.”

⁴⁰ As Jesús chë fariséobioye tbojaniyana: — Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

⁴¹ Y Jesús tojánayana: —Canÿe entśá crocénana uyentsamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana.

⁴² Pero chë útata tondaye ibontsebomna ndayentsana cha jëtsëntšabuáchiyama; as chë uyentsamianá nÿets útata chë ndebénana yojtsaperdónaye.

Chora chë fariséobioye tbojaniyana: — Mora šmëyana, ¿chë útatentsana nda más chë uyentsamianábioye buantsebobonshana ca?

⁴³ Y Simón tbojanjuá: —Atše šontsinÿana chë más bëtscá ndebená ca.

Y Jesús tbojaniyana: —Ndegombre, ntšamo endmëncá tcjayana ca.

⁴⁴ Jesús, chë shembásabioye jontješiyëse, Simónbioye tbojaniyana: —Minÿe quem shembása. Atše acbe yebnoye sënjamashëngo y aca búyeshe ndoñe chešcatabuatsëtá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshechojó.

45 Ndoñe chešcatámochó, pero cha tonjámashēngo orscana ndoñe ntjájbanana atšbe shecuatšēnga onguētsēntšnaye.

46 “Aca bestšašīñe aceitiye ndoñe chešcatsbuešcja, y chana aīñe botamana uanguētše bėjaye šonjashecbuešcja.

47 Chcasna atše cbēyana, cha šonjinŷanŷé atšbiana corente bonshánana yojtsebomna, er atše chabe bētscá bacna soyēnga sēntseboperdoná; pero nda nŷe básefta bacna soyēngama stjaperdoná chana, nŷe batšatema bonshánana jtsebomnana ca.”

48 Y chora Jesús chē shembásabioye tbojanियana: “Ache bacna soyēngama perdonaná contsemna ca.”

49 Chora chē ófjanēnga chentše immatbiámanēngna tmojanontsé enatsētnayana: “¿Nda quem entšá yojtsemna, chē bacna soyēngámna entšángbioye jtsaperdonayana ca?”

50 Y Jesús más chē shembásabioye tbojanियana: “Aca átšbeñe icošbuachéyeca, atsbocaná cochántsemna; natjēmbana motsatoñe ca.”

8

Chē Jesúsbioye imojanájabuachana shembásenga

1 Chca tojanopasá chentšana, Jesús bēts y base pueblēnguējana yojánana, tšabe noticiēnga Bēngbe Bētsabe amēndayama entšanga abuatambaye y abuyiynaye. Chē bnētsana uta uatsjēndayēngna cháftaca imojtsajna.

2 Básefta shembásengnaca imojtsetjēmbambnaye; chēngbentšana Jesús bacna bayējēnga tojtanēbuacna y šocanēngama tojanashná. Chēnga

imojamna, María chë Magdalena ca uabobainá, ndábentsana Jesús canýsëfta bacna bayëjënga tojtanëbuacna;

³ Juana, Cuzbe shema (Cuza yojamna rey Heródesbe canýe uajabuachaná); Susana y inýe shembásenga; chëngna chë imojánbomna soyëngaca chëngbioye imojanëjabuáchana.

Chë jenabe cuento

(Mt 13.1-9; Mc 4.1-9)

⁴ Ba pueblënguentsana mallajta entsanga tmojánbocana Jesús jinýama. Ba entsanga jouenama tmojanobeconá ora, Jesús mëntsá tojanacuntá:

⁵ “Canýe, canýe jená jénaye jaujquëshama yojëftsebcna. Yojsëjquëshaye orna, básefta jénaye benache juachañe yojuatquécjana; chiñna entsanga imojtsebotájaye, y jaja shloftšënga imojástjajna y imojtsósañe.

⁶ Inýe meshëngna ndëtsbenguiñe yojuatquécjana. Yojuábocna orna, betscó yojtsábojo, chë fshantsiñe ndoñe yapa búyeshe yonjamna causa.

⁷ Inýe meshëngna uchmëshangañe yojuatquécjana y chë uchmëshangá lempe yojtsatscué, chë jénayeca cánýiñe yojuábocna ora.

⁸ Inýe meshëngna, uanguaniñe yojuatquécjana. Yojuájua orna, bëtská yojuashájona; canýe jénayentsana nýa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenamá tmojtsobenënga, šmochjouena ca.”

*Ndáyeca Jesús cuenténgaca yojánabuatambaye
(Mt 13.10-17; Mc 4.10-12)*

⁹ As chora chabe uatsjéndayënga tmojantjá: — ¿Ntšamo chë cuento yojtsayana ca?

¹⁰ Y Jesús tojanéyana: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioyna ndoñe; chë soyëngama chënga lempe cuenténgaca sentsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá quem soyënga chamouena, ndoñe queochátësertana ca.

*Jesús chë jenabe cuentama tojanabuayená
(Mt 13.18-23; Mc 4.13-20)*

¹¹ “Chë cuento mëntsá endayana: Chë jénaye Bëngbe Bëtsabe palabra entsemna.

¹² Chë benache juachañe yojuatquécjana básefta jénaye endayana chë básefta entsanga Bëngbe Bëtsabiamama soyënga tmojouenënga; pero chora Sathanás betesco jabana chënga Bëngbe Bëtsabe palabra jabétsabuajuanama, chca, chënga ndoñe chamondëtsošbuáchema y bacna soyënguentsana ndatsebácanënga chamotsemnana.

¹³ Inÿe entsanga mondmëna mo chë ndëtšbenguiñe yojuatquécjana jenaycá. Chë entsangna Bëngbe Bëtsabe palabra jouenana y oyejuayënga jtsemnana. Pero ndoñe nÿets tempo chana jochchájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inÿenga mochantsëbuayënja y Bëngbe Bëtsábeñe

betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonÿaye.

14 Inÿe entšanga mondmëna mo chë uchmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebonnana yapa jésebošana; chama y ba soyëngama yapa enócochinÿena causa, Bëngbe Bëtsabe soyëngama echantsebnétjomba y ndoñe quemochátama ntšamo Bëngbe Bëtsá tojayancá.

15 Inÿe entšangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canÿe betiye puerta tšabá tojtseshajuancá, chënga bëtscá tšabe soyënga Bëngbe Bëtsabiamama mochántsama. Chca mochántsama, Bëngbe Bëtsábeñe jtsošbuáchiyëse y nyetsca soyënguiñe puerta uantadënga jtsemnëse ca” —Jesús tojanabuayená.

Chë uajuinÿanëshama cuento

(Mc 4.21-25)

16 “Ndocná canÿe uajuinÿanëshama juajuínÿenana, chentšana ndaye sóyeca chësha jtsëstama o jutsnëshama tajsoye jtsajájuama; juajuínÿenana ndayá tsbanánoca juajájuama, chë luarentše amashjuanëngbiamama chaotsebínÿnama.

17 Er ndocna yoiytēmena soye, ntjinýcá queochaisoquéda, y chē entsangbiana ndótatsēmbó soye, ntsotatsēmbcá queochaisoquéda.

18 “Chcasna, botamana šmochjouena, er nda Bēngbe Bētsabe soyēngama tšabá tbojosertá, Bēngbe Bētsá echanjama cha más ba soyēngama chabosertama; pero nda chē soyēngama ndoñe tontsebošá, chē nýe batšá ibosertana soyēngama bochántsebnatjēmba ca” —Jesús tojánayana.

*Chē Jesusbe ndegombre pamíllanguentsēnga
(Mt 12.46-50; Mc 3.31-35)*

19 Chora, chabe mamá y chabe catšátanga chē Jesús yojtsemnentše tmojánashjajna, pero ndoñe imontsobena chábioye jobéconana, yapa entsanga causa.

20 As canýa Jesúsbioye mēntšá tbojaniyana: —Acbe mamá y acbe catšátanga shjoca montsemna y montseboše aca jinýama ca.

21 As Jesús tojánayana: —Chē Bēngbe Bētsabe palabra tmojouenēnga y ntšamo tmojouencá tmojtsamēnga jtsemnana atšbe mamá y atšbe catšátanga, atšbe ndegombre pamíllanguentsēnga ca.

Jesús chē binýia y chē béjaye bonguana yojétsbema

(Mt 8.23-27; Mc 4.35-41)

22 Canýe te, Jesús chabe uatsjéndayēngaftaca canýe barquēshoye tojánamashēngo y chēnga tojanéyana: “Uafjajónaye chenguana cuajna ca.”

As tmojána;

23 y imojtsenachnëjuanëntscuana Jesús yojtso-maná. Ndeolpe, chë béjayiñe corente jabuache binÿia yojóshjango y yojontsé béjaye chë bar-quëshoye jtsobuajútjiana. Y chca, chëngbiana puerte resjo yojtsemna.

24 Chora chë uatsjéndayënga tmojána Jesús jet-sefsenama y mëntsá tmojanianyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binÿia y chë bëts olëshëngoye tojanmandá: “Bonguana šochtsemna ca.” Y chë binÿiayana tojanëjbana y lempe bonguana yojtsatsmëna.

25 Chentšana Jesús chabe uatsjéndayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojnanánënga mëntsá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binÿia y chë béjaynaca joyeunayana ca!

*Chë Gerasa luaroca bacna bayëja uambayá
(Mc 8.28-34; Mc 5.1-20)*

26 Chentšana Gerasa ca uabaina luaroye tmojánashjajna, Galilea ndirichiñe.

27 Jesús fshantsoye tojánastjango ora, chë pueblo-cana canÿe entśá chábioye tojánabo. Cha ya bayté bayëjbe juabna yojtsebomna, ndocna entśayá yon-janichëtjona; y yebniñe ndoñe yonjanianyana, sinó obanëngbe cuevëshënguenache.

28 Chë entśá, Jesúsbioye tbojáninÿe ora, chabe natsanoica yojoshëntsamentšiye y mëntsá yojtsáyebuache: —¿Ndayá átšeftaca cojtseboše, Jesús

chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

²⁹ Chca tbojaniana, er Jesús tojanmandá chë bacna bayëjbe juabna chábentšana chausebocnama. Ba soye chë bayëja yojánama chë entšá ndoñe tšabá chaotsemnama. Chë entšanga imojuamana cucuatšentšana y shecuatšentšana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entšanga ndoyena luarëngoye yojánachana.

³⁰ Jesús chë boyabásabioye tbojantjá: —¿Ntsamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjenga tmojánamashjna.

³¹ Y chë bayëjenga Jesús tmojanimpadá, chë corente uabouana tboye ndoñe chaondíchamuama.

³² Chentša béconana ba cotsënga imnajena, tjoca imnétsosañe; as chë bayëjenga Jesús tmojanimpadá chë cotsëngbeñe jamashjna chaulaesciama, y Jesús aíñe chca tojanalesenciá.

³³ As chë bayëjenga chë entšábentšana tmojésanbocana y chë cotsëngbeñe tmojánamashjna; y chentšana, chë cotsënga batsjocana peñesëjana uafjajónayoye imojtsoshbuetše y yojtsatajo.

³⁴ Chë cotsënga anÿenënga chca yojopásama tmojáninÿe ora, chentšana tmojtsanacheta y tmojána chë soye jacuéntama chë puebloca y chiñe luarenache.

³⁵ Entšanga tmojánbocana ndayá tojanopasacá jinÿama, y Jesús yojtsemnoye tmojánashajna ora, tmojáninÿe chë entšá chë ndábentšana

bayëjenga tmojtanbocna, Jesusbe shecuatšentše yojtsótbemañe, entšayá uichëtjoná y chabe nyets juábnaca. Y chë entsanga chama corente imojouatjaná.

³⁶ Ntšamo yojopasacá tmojáninyëngna entsángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmënana.

³⁷ Chentšana, nyetscanga chë Gerasa luarentše oyenënga Jesúsbioye imojtseimpadana chë luar-entšana ínÿoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe.

³⁸ Chë entsá chë ndábentšana bacna bayëjenga tmojtanbocana, Jesúsbioye tbojanimpadá cháftaca jama chabolesenciamá; pero cha ndoñe tbonjanlesenciá. Jesús tbojanmandá chauatoquedama y mëntšá tbojaniana:

³⁹ “Ache yebnoye motsatoñe y cochjácuntaye lempe ntšamo Bëngbe Bëtsá acbiamá tojamcá ca.”

Chentšana chë boyabása yojtsatoñe, y nyets pueblëjana tojanacuntá ntšamo Jesús chabiamá tojanmcá

*Jesús canye shembásabioye tbojanshná y tojanma Jairëbe bembetema cháuatayenama
(Mt 9.18-26; Mc 5.21-43)*

⁴⁰ Jesús chë uafjajónaye chenguánoica tojtanashjango ora, nyetsca entsanga oyejuayënga tmojtanofja, er nyetscanga chabiamá imojanobátmana.

⁴¹ Chora tojánashjango canye entsá, Jairo ca uabainá. Cha inamna chë pueblentše chë judiëngbe enefjuana yebnentša mandayá.

Jesusbe shecuatšentše yojoshëntsamentšiye y ibojtseimpadana chabe yebnoye cháuama;

⁴² er chë nÿe canÿe bembe cha ibnabomná, bnëtsana uta uata bomná, chora ya jóbanama yojtsemna.

Y Jesús yojtsayëntscuana, chë entšanga chábioye imojtsojuatsëntšenaye.

⁴³ Chë entšanguentše yojtsaye canÿe shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomná ashnayëngbioye atóbocayiñe yojtsepochóca, y ndocná yonjobenaye cha jáshnana.

⁴⁴ Chë shembásana stëtšoicana Jesúsbioye yojobconá y chabe entšayá sibuájua tojanábojajo. Y cachora chë oboftjajuanana ibojtsobojuána.

⁴⁵ Chora Jesús tojanatjá: —¿Nda šjabojajo ca?

Nÿetscanga imojtsichamo ndoñe ca; as Pedro tojánayana: —Buatëmbayá, entšanga cmontsatsëntšená y cmontsayájuatsëntšenaye ca.

⁴⁶ Pero Jesús cachiñe tojánayana: —Pronto nda šojábojajo, er atše sënjasenté obenana átšbentšana jóbocnana, mo nda stjashna orcá ca.

⁴⁷ Chë shembása tojáninÿe Jesús yojtsetátšëmbo cha tbojánbojajuama. As chora, ngmëmnyá tojána y Jesusbe shecuatšentše yojoshëntsamentšiye; y nÿetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama.

⁴⁸ Chora Jesús tbojaniyana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

⁴⁹ Jesús cabá yojtsóyebuambnantscuana, chë judiëngbe enefjuana yebnentša mandayábiocana canÿa tojánashjango, y chë mandayábioye tbojaniyana: —Acbe bembe ya tontsóbana; ndoñe más chë Buatëmbayábioye matébëyabomana ca.

⁵⁰ Pero Jesús chë soye tojanuena; as chë mandayábioye tbojaniyana: —Ndoñe matauatjana. Nÿe Bëngbe Bëtsábeñe cochtsošbuáchiye y acbe bembe tšabá echántsatsmëna ca.

⁵¹ Chë yebnoye tmojánashjajna ora, Jesús ndoñe tonjanalesenciá banga choye jamashjnama, nÿe Pedro, Juan y Santiago y chë shembásetembe bëtsëtsatna aíñe.

⁵² Nÿetscanga imojtsenóbošachiye y ngménaca imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nÿe endëtsomañe ca.”

⁵³ Chë entšanga Jesúsbioye nÿe imojtsáfchaye, er chënga imojtsetátšëmbo chë shembásetema obaná yojëtsemnama.

⁵⁴ Chora Jesús chábioye tbojanábuacueshache y jabuache tbojaniyana: “¡Shembásetema, matëtsbaná ca!”

⁵⁵ Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama.

⁵⁶ Chë shembásetembe bëtsëtsata puerta ojnánánata ibojtsemna; y Jesús tojanamëndá, ndayá tojanopasama ndocnábeñe ntsecuéntayana.

9

Jesús, chabe uatsjédayënga tojanichamó, Bëngbe

Bëtsabe amëndayama jábuayenama
(Mt 10.5-15; Mc 6.7-13)

¹ Chentšana, Jesús chabe bnëtsana uta uatsjëndayënga tojánachembo, y mando y obenana tojanatšatá bacna bayëjënga entšángbentšana jtëbuacanama y šocanëngama jashnayama.

² Tojanichamó Bëngbe Bëtsabe amëndayama jábuayenama y entšángbioye jashnayama.

³ Y mëntsá tojanëyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entšëjua jenotrócama cach ndoñe.

⁴ Canye yebnentše posada chacmojúyentšame ora, chentše šmochjoquéda inye puebloye játantscuana.

⁵ Nderado ndayentše posada ndoñe chacmonjuyentšame, chentšana šmochjësebocana y shecuatšentša polvëshe šmochjësenstoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca” —Jesús tojanabuayená.

⁶ Asna chë uatsjëndayënga tmojëftsanbocana y tmojána, nÿetsca chë base pueblotëmënguenache chë tšabe noticiënga abuayiynaye y entšanga šocanëngama áshnaye.

Herodes y Jesús
(Mt 14.1-12; Mc 6.14-29)

⁷ Jesusbiana y ntšamo vojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentšana tojtanyena ca,

⁸ Ínyenga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y ínyengna canya chë tempo imojanmëna Bëngbe Bëtsabe juabna oyebuambnayënguentšá obanënguentšana tojtanayena ca.

⁹ Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiama chca soyënga jtsóyebuambnayana sëntsuenana ca?”

Chíyeca Herodes yojtsenguaye ntšamo jamëse Jesús jinýama.

Jesús shachna uaranga boyabásenga saná tojanacaredadó

(Mt 14.13-21; Mc 6.30-44; Jn 6.1-14)

¹⁰ Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nýe chënga jëftsëbiatšese ínýoye tojtsanoñe, Betsaida ca uabaina puebloye.

¹¹ Pero chë entsanga chë soye tmojántatšëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtsëtsësnaye, y chë šoquënga imojtsemnëngbioye tojanashná.

¹² Ya jetiñe yojtsobiamná orna, chë bnëtsana uta uatsjëndayënga Jesúsbioye tmojanobeconá y mëntsá tmojanianyana: —Chë entsanga cuantichamuá, jóchnama y saná jonguangoñama chamotsama chë béconana pueblotëmënguenache y luarënguenache; er quem luariñe ndocná quenatiyena ca.

13 Jesús chora tojanéyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nýe shachna tandëse y uta beónata fsëntsebmna; nýetscangbiama saná jabuámiyama nderado nda tojasna, aíñe cuanjacaredádaye ca.

14 Er mo shachna uaranga boyabásenga immamna. Pero Jesusna chabe uatsjéndayënga tojanéyana: —Mamëndá nýetscanga chamotbiama shachna bnëtsátsanënga ca.

15 As chënga chca tmojanma y nýetsca entšanga tmojanotbiama.

16 Chora, Jesús chë shachna tandëse y chë uta beónata tojanca, y celoye tojanontjesé, Bëngbe Bëtsábioye chama tbojtanchuá, tojanjatá y chabe uatsjéndayënga tojanantregá entšangbioye chamuatšatama.

17 Nýetsca entšanga tmojanse jtoshachaye nýetsá, y cabá bnëtsana uta sbarëco tmojanajutjé chë ojamnëtmëngaca.

*Pedro tojánayana, Jesús chë Cristo bëtsemnama
(Mt 16.13-19; Mc 8.27-29)*

18 Canýe te, Jesús canýa Bëngbe Bëtsáftaca ibojsencuëntaye ora, chabe uatsjéndayënga cháftaca imojtsemna. Chora tojanatjá: —¿Nda atše bëtsemnama entšanga imojtsichamo ca?

19 Y chënga tmojanjuá: —Báseftanga montsichamo Juan ca, ínýengna Elías ca, y ínýengna canýe Bëngbe Bëtsabe juabna oyebuambnayá tempscá mora tojtayena ca.

20 As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

Jesús tojánayana cha ibojamna jóbanana y jtayenana

(Mt 16.20-28; Mc 8.30-9.1)

21 Pero Jesús corente chënga tojanamëndá ndocnábeñe chama ntsecuéntayana.

22 Y mëntsá cachabiamna tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtsëjemëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entšanga mochanjóba, pero unga tianoye cha echántayena ca.

23 Chentsana nyetsca entšanga tojanëyana: “Nda atšbe uatsjendayá jtsemnama tojtseboše, cháuyana nye Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonýá atše juastama, y cada te chaotseprontana átšbeyeca jasúfriama, y cruciñe jobanámnaca.

24 Nda tojtsama quem luarentše bëtscá soyënga jtsebomnana y atšbiamna jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojëftsonýá atše juastama, masque chaóbana, chë nyetsca tescama yomna tšabe vida echántsebomna.

25 Er çndayama entšá buanjosérvia nyetsca quem luarentša soyënga jtsebomnana, cha pochocaná

jtsemnana tojtsá y chë nyetsca tescama yomna tšabe vida tojtsoperdese?

²⁶ Er ndëmanye entsá, atšbiana o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiana echantsëuatja, cha chabe bëts buashinÿinÿaniñe chaojésabo ora, chabe Taitabe bëts obenánaca y chabe angelotémëngaftaca adoraná.

²⁷ Ndegombre cbëyana, báseftanga muentše montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjéftsinyá ca” —cha tojánayana.

Jesús inÿetsá tojanobinÿná
(Mt 17.1-8; Mc 9.2-8)

²⁸ Mëntšá tojanopasá: Chca palabrënga tojanoyebuambá chentsana posuftaytese, Jesús tojéftsanëbiatše Pedro, Santiago y Juan, y canÿe tjoye tojánatsjua, Bëngbe Bëtsáftaca jencuéntama.

²⁹ Bëngbe Bëtsáftaca ibojtsencuéntantscuana, chabe jubiá inÿetsá yojtsinÿna, y chabe uichëtjonëjuangá tša uafjantsëjuangá yojtsamna y tša yojtsabuashinÿinÿana.

³⁰ Chora uta boyabásata tbojanonÿná, Jesúseftaca ibojtsencuéntaye. Chata ibojamna Moisés y Elías;

³¹ corente buashinÿinÿaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbanana.

³² Masque Pedro y chabe enutata tša ocnayënga imojtsemna, nÿe imojtsefsna y tmojáninÿe Jesusbe juachañe tša yojtsebuashinÿinÿana y chë uta boyabásata cháftaca ibojtsemna.

³³ Chë uta boyabásata Jesús bentsana ibojoluára ora, Pedro, Jesús bioye tbojaniana: “Buatëmbayá, jtša tšabá bēngbiama cuanmēna muentše jtsemnana ca! Mora fchanjapórma unga tambotémēnga: cányetema acbiama, ínyetema Moisesbiama y ínyetemna Elíasbiama ca.”

Pero Pedro ndoñe yontsetátšēmo ntšamo yojtsichámuama.

³⁴ Y chca yojtsóyebuambnantscuana, canye jantšetēshe yojóbema, y chēngbioye yojáutsbotse, y chēnga chē tsoye imojtsemnana tmojáninye ora, chē uatsjéndayēnga chama imojtsauatja.

³⁵ Chora chē jantšetēshoicana canye oyebuambnayana tojanóbocna, mēntšá: “Mua atšbe Uaquiñá endmēna, atšbe uabuayaná; cha šmochtseyeunana ca.”

³⁶ Chē oyebuambnayana tmojanuenentšana, tmojáninye Jesús canya yojtsemna. Chē uatsjéndayēnga iytēca imojtsemna, y chē tempo ndocnábioye chama imonjueyaye.

Jesús, canye basa bacna bayējbe juabna uambayá bioye tbojanshná

(Mt 17.14-21; Mc 9.14-29)

³⁷ Yēfsana, chē tjocana tmojtantsmá ora, ba entšanga tmojánbocana Jesús jajébenguama.

³⁸ Chora, chē entšanguentšana canye boyabása tojanontsé mēntšá uayebuáchana: —Buatëmbayá, Diosmanda atšbe uaquiñá minye. Nye cha atšbe uaquiñá endmēna;

³⁹ y mora, bayējbe juabna chábioye bontsēsháchichana, y nye ndeolpe jóntšana yoyana, ataque joshachana y uayoicana shashiye

jtsabocanana. Y chábentšana chë bayëja ndoñe betscó ntjéseboconana, y cuerpiñe corente maltrataná jeseboshjonana.

⁴⁰ Acbe uatsjédayënga sënjaimpadá chë bayëja chábentšana chamuatábocnama, pero ndoñe chematobená ca.

⁴¹ As Jesús tojánayana: —¡Nÿetsá ndoşbuáchiyënga y bacna entşanga! ¿Buetayté şojtsemna tşëngaftangaftaca jëftsemnana y jtsëuantánana ca?

Chora chë boyabásabioye tbojanियana: —Moye chë uaquiñá mánatse ca.

⁴² Chë basa yojtsebeconá ora, chë bacna bayëja chábioye tbojanshajayé y inÿe ataque tbojanëshache. Pero Jesús chë bayëjbioye tbojanácacana, chë basetémbioye tbojanshná y chabe taitábioye tbojtanëntregá.

⁴³ Y nÿetscanga puerte ojnanánënga imojtsemna, Bëngbe Bëtsá tşa obenana bomná inamnana.

Jesús cachiñe tojánayana cha ibojamna jóbanana y jtayenana ca

(Mt 17.22-23; Mc 9.30-32)

Nÿetsca entşanga, ndayá Jesús yojsamama ojnanánënga imojtsemnëntscuana, chabe uatsjédayënga cha tojanëyana:

⁴⁴ “Quem soye tşabá şmochjouena y ndoñe chacmondébnëtjomba: Chë Bëngbe Bëtsá Entşá tbojanbemá entşangbe cucuatşíñe mochanjáboshjona ca.”

⁴⁵ Pero chënga ndoñe yontsósertana ntşamo Jesús yojsëtsëtsnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

¿Nda chë más uamaná yomna?

(Mt 18.1-5; Mc 9.33-37)

⁴⁶ Chë tempo, chë uatsjédayënga tmojanontsé enatsëtsnayana, nda chë más uamaná bétsemnama.

⁴⁷ Jesús yojtsetátšëmbo ntšamo chënga imojtsejuabnayama; asna, canÿe básetema tbojánishache, chabe juachaca tbojánbema,

⁴⁸ y chëngbioye tojanëyana: “Nda átšbeñe ošbuachiyá bétsemnama, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemna ca.”

Nda bëngbe contra ndoñe tontsemná, bëngaftaca jtsemnana

(Mc 9.38-40)

⁴⁹ Juan, Jesúsbioye tbojanianyana: —Buatëmbayá, bënga fsënjinye canÿe boyabása y cha aca jótšëmbonëse, entšángbentsana bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

⁵⁰ As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

Santiago y Juánbioye Jesús tojanëcácana

⁵¹ Jesús celoye jtama yojtsobeco ora, nÿets añémoca cha yojtsejuabnaye Jerusalemoye jama.

⁵² Natsana báseftanga tojanichamó, y chënga tmojána canÿe base pueblotémoye Samaria luaroa, posada chabiamá janguangoñama;

⁵³ pero chë luarentša entšanga ndoñe tmonjánbošena posada juantšamiana, er

tmojántatsšëmbona cha Jerusalenoye yojétsayama, chë chëngbe uayayëngbe uámana puebloye.

⁵⁴ Chabe uatsjédayata, Santiago y Juan, chë soye tbojáninÿe ora, Jesús tmojaniana: “Bëngbe Utabná, ¿quectseboše bëndata fchaimandá celocana íñeshe chaótsatše y quem entšanga chaot-sapochóca?”

⁵⁵ Pero Jesús yojobuértana y chátbioye tojtsanëcácana, chca juabna bomna causa.

⁵⁶ Chentsana chënga inÿe pueblotémoye tmojt-sanoñe.

Chë Jesús juastama bošënga

(Mt 8.19-22)

⁵⁷ Benachëjana imojtsajna ora, canÿe boyabása Jesúsbioye tbojaniana: —Atšbe Utabná, atše sëntseboše aca juastana ndëmoye chacojtsá choye ca.

⁵⁸ Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftšetémëngna uajajonëshangá; pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

⁵⁹ Jesús inÿe entšábioye tbojaniana: —Smastoca.

Pero cha tbojanjuá: —Atšbe Utabná, šmoleenciá atšbe taitá chjshesabotbontsañe ca.

⁶⁰ As Jesús tbojaniana: —Chë Bëngbe Bëtsabiana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entšanga cochjabuayená ca.

61 Inyana Jesúsbioye tbojaniyana: –Atšbe Utabná, atše sěntseboše aca juastama, pero šmolesenciá natsana atšbe pamíllangbiana jaisodiósoftama ca.

62 As Jesús tbojaniyana: –Nda cachabe soyəngama tbojtsengmena, Bəngbe Bětsabe aməndayocama ndoñe ntoservénana; er cha jtsemnana mo canye arayacá, chě tojtsetrabája ora, stětsoye tojtsaisantješncá ca.

10

Jesús canyəsěfta bnětsana y uta entšanga tojanichamó Bəngbe Bětsabe soyəngama jábuayenama

1 Chě soyənga chentšana, Bəngbe Utabná Jesús inye canyəsěfta bnětsana y útatnaca tojanabacacá, y utáta chabe natsana tojanichamó, chě cha ibojtsemna jama puebləngoye y luarəngoye.

2 Měntšá chənga tojaněyana: “Canye běts jajañe bětscá játbanama entsemna, pero peonga báseftanga; chíyeca, chentša nduíñbioye jaimpádana ba peonga chauichamó chě jaja saná játbanama. Cachcá, quem luarentše bětscá entšanga montsemna Bəngbe Bětsábioye nduabuátmənga, y chəngbioye chabiana abuayiynayənga nye báseftanga. Chíyeca, Bəngbe Bětsá moimpadanga ba abuayiynayənga chauichamó quem entšanga chábioye júbuajama.

3 Motsajna; šmochjinye, atše tšəngaftanga cbontsichamná mo oveshənga cuenta, tjañe quešəngbeñe.

4 Ndoñe šmattsambaye shecnaja, ni crocénana šmattsaiuábuenana, ni shecochětjoněshe; y nda

chacmojacheuá ora, ndoñe yapa bën chentše šmatjáisenobiamnaye.

⁵ “Ndaye yebnentše chašmojá mashjna ora, nat-sana šmochjayana: ‘Lempe tšabá quem yebnentše chaotsomñe ca’.

⁶ Y chë yebnentše chca juabna bomna entšanga tmomñesna, chë tšabiana ndegombre chentše echántsemna; pero ndoñese, chca tšabiana chentše ndoñe queochátsmëna.

⁷ Canye yebnentše šmochjoquéda, y šmochjase y šmochjofšiye ntšamo chentše chacmojacaredadaycá; er chë trabajayá merecido jtsebuájonana chca juacánama. Canye pueblentše nye inye y inye yebnënguenache ndoñe matajnana.

⁸ “Ndaye pueblentše chašmojá mashjna y tšabá chacmojú buajentše, šmochjase ntšamo chentše chacmojacaredadaycá;

⁹ chentša šoquënga šmochjáshnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’.

¹⁰ Pero canye pueblentše chašmojáshjango y ndoñe chacmonjú buaja, chentša tsashenangoye šmochjábocana y mëntšá šmochjayana:

¹¹ ‘¡Chë tšëngaftangbe pueblentša polvëshe, chë bëngbe shecuatsënguiñe tojuanjëshe, camuentše fšcuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetátšëmbo chë Bëngbe Bëtsabe amëndayana tšëngaftangbeñe entsemnama ca.’

¹² Ndegombre cbëyana, quem luare jopochócama te, chë luarentša entšángbioye Bëngbe Bëtsá puerte jabuache echantsacastígaye,

y Sodoma puebloca bacna entšángbioye ndoñe nÿa nÿetsá jabuache ca” —Jesús tojánayana.

Chë nduauenana entsanga

(Mt 11.20-24)

¹³ “¡Tša lastema Corazín puebloca entšangbiama! ¡Tša lastema Betsaida puebloca entšangbiama! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entsanga ya tempo chëngbe bacna soyëngama ngménaca matmëntenójuabonga y Bëngbe Bëtsabe benache matmëntishache, y chca tmojamama chaotsótatsëmbuama, uajojësha entšayangaca matmëntopormanga y jatinyashiñe matmënjotbiama.

¹⁴ Pero ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebomna, chë Tiro y Sidonoca bacna entsangbe castiguama.

¹⁵ Y tšëngaftanga, Capernaum pueblentša entsanga, ¿celóntscoca atsebánanënga šmochtsemna ca šmojtsejuabnanga? ¡Chë uabouana infiernoye cmochantsësetjango!

¹⁶ “Nda tšëngaftanga tcmojoyauná, chana atše joyeunayana; y nda tšëngaftanga tcmojsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

Chë canÿsëfta bnëtsana y uta entsanga tmojt-anashjajna

¹⁷ Chë canÿsëfta bnëtsana y útatna Jesús yojtsemnoye tmojt-anashjajna, puerte

oyejuayënga; y chábioye mëntsá tmojanियana: —¡Bëngbe Utabná, aca jótšëmbonëse, chë bacna bayëjëgnaca šonjoyauná ca!

18 Y Jesús tojanëyana: —Ndegombre. Y tšëngaftanga Satanásbioye chca šmontseyëjaná ora, entsemna mo Satanás celocana canyë tcuinýcá jtsotsatsšana stjinýcá.

19 Atšna obenana tcbonjatsatá mëtšcuayënga y alacranëngbeñe chašmotsajnama, y bëngbe uayayá Satanasbe nýets obenana jáyëñjanama, tšëngaftanga ndocá ntjapasacá.

20 Pero móyejuanga, ndoñe chë bacna bayëjënga chacmóyaunama obenana šmojtsebomnama, sinó tšëngaftangbe uabaina celoca ya yojtsábemanama, er tšëngaftanga chë nýetsca tescama yomna tšabe vida šmochántsebomna ca —cha tojanëyana.

*Jesús puerte tojanoyejuá
(Mt 11.25-27; 13.16-17)*

21 Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nýe batsá tatsëmbënga tconjanýanyé, chë tša tatsëmbënga y osertánëngbiam tcojaiytëme soyënga. Aíñe, chama cbontsadorana, Taita, aca chca chaotsemnama tcojábošenayeca.

22 “Atšbe Taitá lempe chca šonjatšetá. Chë Uaquiñábioye ndocná corente quebnatábuatma; nýe chë Taitá aíñe. Y chë Taitábioye ndocná corente quebnatábuatma; nýe chë Uaquiñá aíñe, y ndëmuanýengbioye chë Uaquiñá tojtseboše nda chë Taitá yomnama jinýanyiyama, chëngnaca chë Taitábioye mochantsábuatma ca.”

23 Chentsana, Jesús chabe uatsjéndayëngbioye tojanobuértana y nÿe chëngbioye tojanëyana: “¡Puerte oyejuayënga chë ntšamo tšëngaftanga šmontsonÿacá jinÿama tmojtsobenënga!

24 Er atše cbëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonÿá soyënga jinÿana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” –cha tojánayana.

Chë Samarioca tšabe entšabiama cuento

25 Canÿe judiëngbe ley abuatambayá yojontsé Jesúsëftaca jóyebuambayama, y jisháchichiyamna mëntšá tbojantjá: –Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

26 Y Jesús tbojanjuá: –¿Ntšamo leyiñe iuábemana? ¿Ndayá chiñe condbétsaliaye ca?

27 Chë ley abuatambayá tbojanjuá: –“Chë Utabná Bëngbe Bëtsá cochtsebobonshana nÿets ainánaca, nÿets espíritoca, nÿets añémoca y nÿets juábnaca”; y “ndëmua entšánaca cochtsebobonshana, ntšamo cach aca cuenobobonshancá ca.”

28 Chora Jesús tbojaniyana: –Tšabá šconjojuá. Chca cochtsama y chë nÿetsca tescama yomna tšabe vida cochántsebomna ca.

29 Pero chë ley abuatambayá tšabá jenoquédamna Jesúsbioye tbojantjá: –Y ¿ndase chë ndëmua entšánaca yomna ca?

30 As Jesús tbojanjuá: –Canÿe, Jerusalenocana Jericó benache canÿe entšá yojtsetsma, y básefta salteadorënga imojébëbocna. Lempe

imojtsefca, chë entsáyánaca; imojtsejantsetaye y chentsana imojtsatóñenga, y chë entsá batsá obaná imojéseboshjona.

³¹ Ndeolpe, chë benachëjana canye judiëngbe bachna yojt sachnëjuana. Chë entsábioye ibojinýe ora, nýe chabuacá yojtsechnënguañe.

³² Cachcá, canye Levita, chë canye Bëngbe Bëtsabe bëts yebnoca trabajayá chëjana yojt sachnëjuana; y chë entsábioye ibojinýe orna, nýe chabuacá yojtsechnënguañe.

³³ “Chorna, cach benachëjana canye samaritano ináboye. Chë entsábioye ibojinýe orna, ibojóngmia.

³⁴ Chábioye yojobeconá, aceitiye y vínoyeca ibojáshna, y lisianënguiñe entsëjuaca ibojuantsacjuá. Chabe couayiñe ibojëftsensajayiye, canye yebnoye posada uyentsamianoýe ibojuánatse, y chentse chábioye ibojëftsinyena.

³⁵ Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nýetsá, y chë posada nduíñbioye ibojesabuenaye, y mëntsá ibojauyana: ‘Quem boyabása cochtsinyena, y nderado más crocénana muabiama chacojenábojafjonasna, mëjana chaitísachnëjuana ora, cbochjabáisabuenaye ca.’

³⁶ Y chcasna, ¿chë unganguentšana nda cmojtsinyana chë entsabiama yojtsejuabnaye cha cachacá entsá inamnama ca?”

³⁷ Y chë ley abuatambayá tbojanjuá: —Chë entsabiama tbojanongmé cha ca.

Y Jesús tbojanianyana: —Asna, motsa y cachcá cochjama ca.

Jesús, María y Martbe yebnentše

³⁸ Chentsana, Jesús benachëjana vojtsaye y canÿe base pueblotémoye tojëftsanamashëngo; y canÿe shembása Marta ca uabainá, chabe yebnentše tbojanofja.

³⁹ Martna canÿe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama;

⁴⁰ y chëntscuana Marta ba soyënga vojtsama. Cha Jesúsbioye tojanobeconá y tbojaníyana: —Utabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašuájabuache ca.

⁴¹ Chora Jesús tbojanjuá: —Marta, Marta, bëtscá soyëngama contsenócochinÿena y contsenomantšná;

⁴² pero nÿe canÿe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaot-sajbanama ca.

11

Ntšamo Bëngbe Bëtsáftaca cuanjencuénta

(Mt 6.9-15; 7.7-11)

¹ Canÿe, Jesús Bëngbe Bëtsáftaca ibojtsencuéntaye canÿe luarentše. Tojanpochocá orna, canÿa chabe uatsjendayënguentsá tbojaníyana: —Bëngbe Utabná, Bëngbe Bëtsáftaca jencuéntama šmabuatambá, ntšamo Juan chabe uatsjëndayëngaftaca tojanmcá ca.

² Y Jesús tojanëyana: —Bëngbe Bëtsáftaca chašmojsencuénta ora, šmochjayana:

Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

³ Mënté šmiyatsatá, cada te šnetsëjaboto tandëse.

⁴ Bacna soyënga fsënjama: šmotsaperdónaye; er bëngnaca nyetscanga chë bëngbiana bacna soyënga amëngbioye fsëndbetsaperdónaye.

Bacna soyënga jamama šojocochëngo ora, šcochjujabuache chca ndenobuíyama.

⁵ Jesús mëntšánaca tojanëyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tandëse šmotsemná,

⁶ er canye atšbe amigo yebnoca tonjášhjango y tondaye quetsátsbomna cha jonánjama ca.’

⁷ Ndegombre, cha tsocana tcmojojuá: ‘Ndoñe šmatébeyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëse jámnana ca.’

⁸ Ndegombre, chë bacó ndoñe tonjotsbaná chë tandëse jámnama, cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye.

⁹ Chcasna, atše cbëyana: Šmochjotjañe y Bëngbe Bëtsá cmochanjátsataye; šmochjánguango y šmochanjínýena; šmochjachembo y cmochanjébëtafjo.

¹⁰ Er ndánaca ndayá tojtsotjanañá, jóyëngacñana; y tojtsenguá cha, jónýenana; y nda tojtsechembuanábioye jebiatëfjuana ca.

11 “¿Nda tšëngaftanguentšana nantsobena, taitá tojtsemnëse, cachabe uaquiñábioye canÿe mëtšcuaye jatštayana, beona tbojtsotjanañe ora;

12 o canÿe alacránashe joyiyana, shëmnëbé tbojtsotjanañe ora?

13 Y chca, tšëngaftanga, bacna soyënga amënga, tšëngaftangbe basetemëngbioye tšabe soyënga jatsatayama šmojtsamanëse, imás chë celoca Taitá, chë Uámana Espíritu echanjátšataye, chca tmojtsotjanañëngbioye ca!” —Jesús tojánayana.

Fariseunga tmojánayana Jesús Satanásbentšana obenana tojanóyëngacñe ca

(Mt 12.22-30; Mc 3.20-27)

14 Jesús canÿe entšábentšana canÿe bacna bayëja tbojtanábocna. Chë bayëja ndëbiá chë entšábioye tbojánbema, y chábentšana tojésanbocna ora, chë ndëbiá tojtanontsé oyebuambnayana. Y chë entšanga chama imojenjnaná;

15 pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatšetá chë bayëjënga chauatëbuacnama ca.”

16 Y ínÿenga, Jesús jisháchichiyamna tmojanimpadá canÿe bëts soye chaoma, jinÿanÿiyama cha celoca obenana inabomna o ndoñe.

17 Pero Jesús yojtsetátšëmbo ntšamo chëngbe juabna bëtsemnana. As tojanëyana: “Canÿe amëndayábentše entšanga tmojtsenojatá y tmojtsenáyase, cachënga jtsenpochócana; y canÿe yebnentše oyenënga tmojtsenojatá y tmojtsenáyase, chë pamíllanga tšabá nyets tempo ndoñe quemochátsmëna.

18 Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jëftsebmomnana? Chca séntſichamo, er tšëngaftanga šmotsichamo Beelzebube obenánaca chë bayëjënga stſatëbuacana ca;

19 pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebmomna chë bacna bayëjënga jtëbuacnama? Chíyecna, cachënga montſinÿinÿná ntšamo ndegombre yomnana, y tšëngaftanga ndoñe ndegombre soye šmotsichámuama.

20 Y atšna, Bëngbe Bëtsabe obenánaca entšángbentšana chë bayëjënga sëndëtëbuacana; y chë soye entsinÿinÿná, Bëngbe Bëtsabe amëndayana tšëngaftangbioye tojóshjanguama.

21 “Canÿe corente añemo bomna entšá, bëtscá ármangaca chabe yebna tojtſinÿenëse, chë tſoca tomna soyënga ndoñe ntjotšana.

22 Pero inÿa chabiana más añemo bomná tojabo y tbojabetseyënjaná, chë cha yojanašbuaché armangá jtſabocana y chë tobomna sóynaca; y ntšamo chë inÿa tojtsebošcá chë soyëngaca jamana.

23 “Nda ndoñe átſeftaca tontsemná, atšbe uayayá jtsemnana. Y nda átſeftaca ndoñe tontsetrabája, chana atšbe contra jtsetrabájayana ca” —Jesús tojánayana.

*Ndaya inopása chë bacna entšángaftaca
(Mt 12.43-45)*

24 “Canÿe bacna bayëja canÿe entšábentšana tojésebocna ora, bojojo luarënguenache chë bayëja jtſanana, ndayentše jóchnama onguayiñe. Ndoñe

tonjínÿena ora, jenójuaboyana: ‘Atšbe oyenoye, chë ndayentsana sënjëftseboconoye chanjesshécona ca.’

²⁵ Y choye tojtashjango ora, jinÿenana lempe tšabá cha jtesamashënguama, mo tsjajniñe y prontániñe cuaftsemncá.

²⁶ Chora chë bayëja jana y inÿe canÿsëfta bayëjenga, chabiamama más opëjenga jobiatšana, nÿetscanga choye jamashjnama, chë boyabásabeñe joyéanama. Y chca, chë boyabása tempscama más bacna entsá jtoquédana, chora chë natsanama más bayëjenga abamna causa ca” —Jesús tojánayana.

Chë ndegombre oyejuayana

²⁷ Jesús chë soyënga yojttsichamëntscuana, entsanguentše canÿe shembása yojuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

²⁸ As Jesús tbojanianyana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

Chë bacna entsanga Jesús tmojanimpadá canÿe bëts soye chaoma, chabe obenana jinÿama

(Mt 12.38-42; Mc 8.12)

²⁹ Entsanga más imojtsógotoye Jesús yojtsemnentše, y Jesús tojanontšé jáuyanana: “Morsca entsanga puerte bacna entsanga; chënga montsotjanañe atše canÿe bëts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soycá.

³⁰ Er chca, ntšamo Jonás Nínive puebloca entsanga canÿe bëts soye tojaninÿanyé Bëngbe Bëtsá obená yomnama chamotsetatšëmbuama, chë

Bëngbe Bëtsá Entšá tbojanbemánaca entsinÿanÿná morsca entsángbioye, Bëngbe Bëtsabe amëndayana tojóshjanguama.

³¹ Bëngbe Bëtsá ntšamo morsca entsanga tmojanmama yochjayana te, chë Sur luaroca reiná echanjotsaye y morsca entsangbiana echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiana más uamaná endmëna.

³² Chë entsanga tšabá o ndoñe tšabá tmonjamama jayanama te, chë Nínive bëts pueblaca entsángnaca mochanjotsaye y mochanjayana morsca entsanga ndoñe tšabá tmonjama ca; er chënga, Jonás yojsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiana más uamaná endmëna ca” —Jesús tojánayana.

Chë cuerpama uajuinÿanësha
(Mt 5.15; 6.22-23)

³³ “Ndocná canÿe uajuinÿanësha juajuinÿenana, canÿe iytëmena luaroye juajájuama, ni canÿe cajonëshe tajsoye, sinó canÿe tsbanana luaroca juajájuama, chca, chë luaroye amashjuanëngbiana chaotsebínÿnama.

³⁴ Acbe bominÿe tšabá totsomñëse, acbe cuerpama mo canÿe uajuinÿanëshacá jtsemnana; chíyeca aca jtsoybenana, ntšamo tcojtsamcá chë bomínÿeca jtsonÿayana. Chë bominÿe ndoñe tšabá tontsemnësna, chë bominÿe tondaye ntsoybenana

jamana, ntšamo tcojtsamcá chacobená jinýama. Cachcá, acbe ainaniñe tšabe juabnënga tcojtsebomñese, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomñesna, lempe ntšamo chacojtsamcá ndoñe tšabá queochátsmëna.

³⁵ Cuedado šmochtsebomna, tšëngaftangbe ainaniñe nýe tšabe juabnënga chaotsemnama, chca, lempe ntšamo chašmojtsamcá tšabá chaotsemnama, y bacna juabnënga ndoñe chaondëtsemnama.

³⁶ Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canýe uajuinýanësha puerta tšabá tojtsebinýnacá ca” —Jesús tojánayana.

Jesús chë fariseungbiama y ley abuátambayëngbiama tojánayana, chënga ndoñe tšabá montsama ca

(Mt 23.1-36; Mc 12.38-40; Lc 20.45-47)

³⁷ Jesús chca jayanama tojanpochocá ora, chábioye canýe fariseo tbojanofja chabe yebnoye jauasama. As Jesús tojánamashëngo y mesëshentše tojanótbema.

³⁸ Chë fariseo tojanëuatjaná, Jesús ntsacuentšabiacá jasama yojontšé causa, ndoñe ntšamo chë judiënga imojanamancá, Bëngbe Bëtsabe delante tšábënga jtsatsmënama.

³⁹ Pero Bëngbe Utabná tbojaniyana: “Tšëngaftanga fariseunga šmondmëna mo entšangcá ndëmuanyënga chë tazësënga y šcnenënga shjoicajana jtsóbojabiana, pero tsoyna

nÿe cachcá jonÿayana. Tšëngaftanga becá jtsamana entšangbiana mo tšabengcá jtsinÿnama; pero tšëngaftangbe ainanentše jútjena entsemna nÿe jtsatbëbanama y bacna soyënga jtsamama juabnëngaca.

⁴⁰ ¡Juabna ndbomnënga! Tšëngaftanga ndoñe šmondëtatšëmbo, chë tšëngaftangbentsana entšanga ndayá jinÿama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámama ndayá tšëngaftangbe ainanoye yomna soyënga, y chë entšangbe delante šmojama soyënga.

⁴¹ Tšëngaftanga cmontsamna, chë soyënguiñe ndayá ainaniñe yomnentšana ínÿengbioye jatsatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

⁴² “¡Tša lastema tšëngaftangbiana fariseunga! Tšëngaftanga Bëngbe Bëtsabiana jtsequëcjnayana chë jajañentša sananga bnëtsanentšana canÿe soye nÿetsá, y chë binche matatëmënguentsana menta, ruda y nÿetsca binche matatemënguentsánënaca; pero nÿe batšá jtsamana chë nÿetscanga cachca derechënga chamotsebomnama y cha jtsebobonshánama. Quem soyënga cocayé cmontsamna jtsamana, chë inÿe tšabe soyënga ntjajbanacá ca.

⁴³ “¡Tša lastema tšëngaftangbiana fariseunga! Tšëngaftanga tša jtsebošana chë judiëngbe enefjuana yebnënguenache chë más uámama luarënga jtsebomnama, y benachiñe nÿa puerte respétoca entšanga chacmotsacheuanayama ca.

⁴⁴ “¡Tša lastema tšëngaftangbiana! Smondmëna mo obanënga uatbontsaniñcá, ndoñe ntsinÿnana, y

entsanga ntsetatšëmbcá chiñe jtsebotájayana. Chca šmondmëna, er tšëngaftangbe ainana entsemna jútjena bacna juabnëngaca, pero entsangbiama ndoñe chca quešmátinýna ca.”

⁴⁵ Jesús chca tojánayana ora, canýe ley abuatambayá tbojaniyana: —Buatëmbayá, chca palabrënga contsoyebuambná ora, bëngbiámnaca ndoñe tšabá quecátichamo ca.

⁴⁶ Pero Jesús tojánayana: —¡Tša lastema tšëngaftangbiámnaca, chë ley abuátambayënga! Mo canýe entšá, couáybioye canýe uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftanga entšángbioye jtsamëndayana bëtscá mandënga chamotsocumplínama, pero cach tšëngaftanga ni mo batšatëmnaca jtsamana chë mandënga jtsocumplínama ca.

⁴⁷ “¡Tša lastema tšëngaftangbiama! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsanga chamotsemnana, chëngbe cuevëshënga jtsatspórmayëse; pero chë mo chëngcá, canýe buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts taitanga tmojtsanëbaye.

⁴⁸ Chca jtsamëse, tšëngaftanga šmontsinýanýná, ntšamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

49 “Chíyeca, Běngbe Bětsá chabe běts osertanánaca tojánayana: ‘Atše chěngbioye chanjichamuá atšbe juabna oyebuambnayēnga y atšbiana abuayiynayēnga, y báseftangbioye mochantsēbaye y ínŷengbioyna mochantsēcamiye ca.’

50 Y chca, nŷets castigo morsca entsángbeñe echántsemna, nŷetsca Běngbe Bětsabe juabna oyebuambnayēnga tmojóbanama, Běngbe Bětsá quem luare tojanma orscana;

51 Abélbioye tbojanóba orscana, Zacarías tmojanóbantscoñe. Zacaríasna Běngbe Bětsabe běts yebnentše tmojanóba, altar y chě entsanga Běngbe Bětsábioye imojánadorana luariñe. Chcasna, Běngbe Bětsá echanjama chě oyebuambnayēnga tmojanóbanama, morsca entsángbeñe nŷets castigo chaotsemnama ca.

52 “¡Tša lastema tšěngaftangbiana, chě ley abuátambayēnga! Tšěngaftanga jtsamana, Běngbe Bětsabe soyēngama jtsetatšěmbuama entsangbiana yapa totcá chaotsemnama. Cach tšěngaftanga ndoñe quešmátobena chě soyēngama tšabá jtsetatšěmbuana, y chama jtsetatšěmbuama tmojtsebošěngbioyna ndoñe quešmatalesénciaye ca” —Jesús tojánayana.

53 Jesús chě soyēnga tojánayanama, chě ley abuátambayēnga y fariseunga puerte tojánētēna, y cha chentšana yojtsaisebocana ora, tmojanontšé chábioye becá tjanayana, y imojtsama ba soyēngama chaóyebuambama,

54 chca, jisháchichiyama jtsebošěse, cachá ntšamo tojayana sóyeca chēnga jtsebomnama ndáyeca chábioye mal jaquédana.

12

Jesús, chë bacna entsanga ntšamo ndegombre tmojuabnacá ndinÿinÿnayëngbiama tojanabuatambá

¹ Chëntscuana, ba uaranga entsanga chentše tmojanójoto; tša entsanga causa, nÿetscanga imojtsenatsëntšenaye. Chora Jesús tojanontšé jóyebuambayama, y natsana chabe uatsjëndayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entsanga ntšamo ndoñe tšabá tontsemncá chamotsamama.

² Er ndocna yoiytëmena soye, ntjinÿcá queochaisoquéda; y chë ndótatsëmbo soye, ntsotatsëmbcá queochaisoquéda.

³ Chíyeca, chë mora nÿe tšëngaftangbiana šmojtsichamo soyënga, chë entsangbiana mo ibetiñcá cuaftsemna soyënga, entsanga chama botamana mochanjátatsëmbona. Y chë iytëcana šmojtsichamo soyënga, nÿetsca entsángbioye mochántسابuayiynaye, mo nda canÿe yebnentša tsbanánocana noticiënga tojtsayebuachcá ca” — cha tojanéyana.

*Nda ndegombre cuantsebiauatja
(Mt 10.26-31)*

⁴ “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe

cuerpo japochócama imobenëngbiana, pero chentšana más jamana ndoñe ntsobenana.

⁵ Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

⁶ “¿Shachna jaja shloftšetémënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana.

⁷ Y tšëngaftangbiana Bëngbe Bëtsá lempe endëtatsëmbo, y bueta stjënëjënga tšëngaftangbe bestšašinë yomnámna. As ndoñe matauatjëngana; tšëngaftanga ba jaja shloftšëngbiana corente más šmonduámana ca” —Jesús tojánayana.

Ndabiana Jesucristo yochjayana chabe entšá yomna ca

(Mt 10.32-33; 12.32; 10.19-20)

⁸ “Atše cbëyana, nda atšbe entšá yomna ca entšangbe delante tojayanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca;

⁹ pero nda entšangbe delante, atšbe entšá ndoñe yondmëna ca tojayanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

¹⁰ “Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tšabá tontsichamuábioye, pero chë Uámana

Espíritbiamá ndoñe tšabá tontsichamuábioyna ndoñe.

11 “Tsëngaftanga chë judiëngbe enefjuana yebnëngoye, ntšamo entšanga bétsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyeca šmochjenëuyanama, o ndayá šmochjayanama;

12 er chë Uámana Espíritu cmochanjabuayená ntšamo jayanama tojtsemncá, jóyebuambayama chacmojtsamna ora ca” —Jesús tojánayana.

Entšabiamá resjo yomna, nýe yapa bomnana jesejuabayana

13 Chentšana, canýa entšanguentšá Jesúsbioye tbojaniana: —Buatëmbayá, atšbe catšata momandá chë átšbioye otocana soyënga chašuatoyé ca.

14 Y Jesús tbojaniana: —Bacó, ¿nda atšbe šojábema tsëndatbe ujananayá ca?

15 Y entšángbioye tojanëyana: —Smochjinýe y cuedado šmochtsebmna chë nýe yapa soyënga jtsebmnama bošama; er masque bëtscá soyënga chašmotsóbmñe, chca ndoñe quešmochátstatsëmbo aíñe tšabe vida taišmochjónýenama ca.

16 Y chora mëntšá tojanacuntá: “Inamna canýe bomna entšá, y chabe fshantsënguñe tša jaja saná yojtsopodena.

17 Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbmna ndayentše atšbe jaja saná jtsobocjayama ca.’

18 Y mëntšá yojeniyana: ‘Chë grano uaquëcjnaye yebnënga chantsendbiamá, y inýe más bëtš

yebnënga chanjëtsjebo, y chiñe nyëtsca atšbe jaja saná chantsóbocjaye y nyëtsca atšbe soyëgnaca.

¹⁹ Y chora atše chjeniyana: Bacó, bëtscá soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.'

²⁰ Pero Bëngbe Bëtsá chábioye ibojauyana: 'Obëjema, cach quem ibeta cochanjóbana; y asna, chë contsebocjana soye, ¿ndabiamama yochtsemna ca?' "

²¹ Y Jesús chora tojánayana: "Chca endbopása chë nyë chabiamama bomnana tojtsejuabá y bëtscá Bëngbe Bëtsabe soyënga ndoñe tonjëftsashjacháftaca ca."

Bëngbe Bëtsá chabe básenga jtsariyënanana

(Mt 6.25-34)

²² Chentšana, Jesús chabe uatsjëndayënga tojanëyana: "Quem soye cbëyana: Ndoñe šmattsenócochinýëna ndayá šmochjase o šmochjofšiye vida jtsebomnana, ni ndaye entšayá šmochjuíchëtjuama cach ndoñe.

²³ Ndegombre, vida chë sanama más enduámana y cuerpo chë entšayama más.

²⁴ Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcnayeye yebnënga ntsebomnana; pero Bëngbe Bëtsá chënga saná jtsatšatnayana. ¡Y tšëngaftanga chë ftsenga shloftšëngbiama puerte más šmonduámana!

²⁵ Masque chca endmëna, masque canýa tša tojesenócochinýëna, ¿ntšamo nanjobenaye jamana, chë ntsachetšá vida yochtsebomnentsana canýe hora vida más jabotiyana?

26 Chcasna, nÿe chë base soye jamama ndoñe šmontsobenëse, ¿ndayama chë inÿe soyëngama šmochjatenócochinÿena?

27 “Smochjuinÿe chë lirio uantšefjushangá jt-sajuajnana: ndoñe ntsetrabájayana, ni ntsheshabi-amnayana. Pero atše cbëyana, ndegombre ni mo rey Salomón, nÿetsca chabe bomnánaca, chë lirio uantšefjushangacá nÿetšá botamana quen-jatspormana.

28 Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuanaca chca tojamëse, ndegombre tšëngaftangbiámñaca Bëngbe Bëtsá echanjama entšayá chašmotsábomnama, jentšanga Bëngbe Bëtsábeñe nÿe batšá ošbuáchiyënga!

29 Chíyeca, ndoñe šmattsenócochinÿena ndayá jasama o jofšiyama onguayiñe;

30 er chë soyëngama quem luarentša entsanga mondbétsenocochinÿena, pero tšëngaftanga ndoñe. Tšëngaftangna canÿe Taitá šmond bomna, y cha endëtatsëmbo ndayá cmëjabótama.

31 Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaot-semándama, y chë cmojtsëjaboto soyënga nÿe šmochanjóyëngacñe ca” —Jesús tojánayana.

Chë celoca bomnana (Mt 6.19-21)

32 “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínÿnana chabe amëndayana tšëngaftanga jatšatayama.

³³ Lempe ntšamo šmobomncá šmochtsatobuiye y chë ujabotëngbioye šmochtsatsataye. Mo ndotanguánaye shecnajiñe crocénana cuaftacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca;

³⁴ er chë ndayentše tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” —Jesús tojánayana.

Bëngbe Utabná yochjésabama jtseprontánana

³⁵ “Mo chë oservénënga, chë entsáyá uichëtjonënga y uajuinýananéshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama.

³⁶ Chca, tšëngaftanga šmochántsemna mo chë oservénënga, tšabe entsáyaca bopormánënga y uajuinýananéshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservénënga jtebiatëfjuama.

³⁷ Puerte oyejuayënga chë oservénënga, chë nduiño tojtashjango ora tmojtsefšnënga. Ndegombre cbéyana, chora chë mandayá sëndorëche echantásnaye, mesëshentše chë oservénënga echanjâtbiama, y saná echanjujuatšiye.

³⁸ Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínyanoye.

³⁹ Quem soye tšabá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama.

⁴⁰ Tšëngaftángnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená
(Mt 24.45-51)*

⁴¹ Pedro, Jesúsbioye tbojanियana: —Utabná, ¿chë tconjayana cuento nyë bëngbiama o nyëtscangbiama yochtsemna ca?

⁴² Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nyëts juábnaca amá? Cha jtsemnana nda chë nduiño bochjëftseboshjona chë yebnentšënga chaotsanñenama, y jasama tojtsemna ora chaújuatšëma.

⁴³ Puerte oyejuayá chë oservená, chë nduiño tojtashjango ora, cha tbojínñena jtsamëse ntšamo tbojtsemncá.

⁴⁴ Ndegombre cbëyana, chë nduiño chábioye bochanjaimpáda nyëtscá chabe soyënga chabotsinñëñama.

⁴⁵ Pero chë oservená, chabe nduiño betseco ndoñe yochantabo ca tojtsejuabná, y tojontsé chë inñe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana,

⁴⁶ cha ndoñe tontsejuabná te y tontsetátšëmbo ora, chabe nduiño echántashjango y puerta jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

⁴⁷ “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja.

⁴⁸ Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonyëbioyna jauyanana, más bëts trabajo chaoma ca.”

Jesusbe causa, entšángbeñe más jtsentsjanayana (Mt 10.34-36)

⁴⁹ “Atše sënjabo quem luariñe jabojuinÿiyama, y jtša sëntseboše malaye ya ctsangbototjuana!

⁵⁰ Atše šontsemna puerta jasúfriana, y ¡puerte ngménaca sëntsobátmana chca chaotsemnana!

⁵¹ ¿Tšëngaftanga šmojtsejuabná atše tijabo quem luarentše entšanga natjëmbana chamotsiyenama? Ndegombre ndoñe chca queochátsmëna; atše sënjabo causa, entšanga más mochántsejtsjanaye.

⁵² Er mëntescana, canÿe yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna.

⁵³ Taitá uaquiñabe contra echántsemna, y uaquiñá taitabe contra; bebmá, bembëbe contra,

y bembe bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

Ndaye tempo yochtsemnama ntšamo inétsotatsëmbo

(Mt 16.1-4; Mc 8.11-13)

⁵⁴ Mëntsánaca Jesús entšanga tojanëyana: “Tšëngaftanga, chë jantsetëshënga shinÿe uenatjëmbambanoicana tojóbcnana šmojinÿe ora šmondbétsichamo ‘echanjuafté ca’, y ndegombre chca jopásana.

⁵⁵ Y tsmanoicana tojtsebínÿia orna, tšëngaftanga šmondbétsichamo ‘echanjojënyana ca’, y ndegombre chca jopásana.

⁵⁶ ¡Bacna entšanga, chë ntšamo ndegombre šmojuabnacá ndinÿinÿnayënga! Ntšamo quem luarentše yochtsemnama, ndayá celoca šmojinÿama tša tšabá šmojtsetatsëmbëse, ¿ndáyeca ndoñe šmontsobena jtsetatsëmbuana ndaye bëts soye quem tempo Bëngbe Bëtsá cmojtsinÿanÿinama ca?” —Jesús tojánayana.

Chë uayayáftaca natjëmbana jtenbemana

(Mt 5.25-26)

⁵⁷ “¿Ndáyeca cach tšëngaftanga ndoñe šmondbáyana ndayá tšabá bëtsemnana?

⁵⁸ Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndoñese, chë demandayá mandádbioye cmochanjúshjango, chë mandadna josticiëngbe cucuatšiñe cmochanjáboshjona, y chënga cárceloye cmochanjutame.

59 Ndegombre cběyana, chentshana ndoñe quecochtětsbocna, nŷets ndebėnana candesopagantscuana ca” —Jesús tojánayana.

13

Běngbe Bětsabe benache jtishachana

1 Cach ora, báseftanga tmojána Jesús jinŷama, y tmojancuentá ndayá chě mandado Pilato tojanmama; chana básefta Galileoca boyabásenga tojtsanėbaye, y chěngbe buiñe yojenajuabó chě Běngbe Bětsabioye jětschuayama tmojanóba bayěngbe buiñeca.

2 Y Jesús chěnga tojaněyana: “¿Tšěngaftanga šmoptsejuabná, chě Galileoca entšanga chca tmojapasá, chě luarentša inŷe boyabásengbiana chěnga más bacna soye aměnga imojamna causa ca?

3 Ndegombre cběyana, ndoñe. Y cach tšěngaftanga, bacna soyěnga amama ndoñe šmontsajbaná y Běngbe Bětsabe benache ndoñe šmontishachěse, tšěngaftángnaca šmochanjóbana.

4 O, ¿tšěngaftanga šmnětsejuabnaye, chě Jerusalenentša bnětsana posufta entšanga tmojanóbaněnga, chě Jerusalenoca binche uafjajónaye Siloé béconana tsbanana jebna soye tojtsanáshajaye ora, chěnga imojamna chě inŷyenga Jerusalenentše oyeněngbiana más bacna soyěnga aměnga ca?

5 Ndegombre cběyana, ndoñe. Y cach tšěngaftanga, bacna soyěnga amama ndoñe šmontsajbaná y Běngbe Bětsabe benache ndoñe šmontishachěse, tšěngaftángnaca šmochanjóbana ca” —Jesús tojaněyana.

Chë ndëshajona higo betiyama cuento

⁶ Jesús mëntśá tojanacuntá jabuátambama: “Canÿe entsá jajoca canÿe higo betiye inabomna, y yojá nderado nantseshájonama, pero tondaye yonjínÿena.

⁷ Chcasna, chë jajañe bojanÿábioye cha ibojauyana: ‘Mouena, ya unga uata tsabó quem higo betiyoje jaborrepárama, nderado nantseshájonama, pero ndocna te tondaye chiyátinÿena; chíyeca, motsetëtse. ¿Ndayama quem jajañe yochjátsjena ca?’

⁸ Pero chë jajañe inÿená ibojauyana: ‘Bacó, inÿe uata cachcá monÿá, fshantse chanjáboplojua y uan-guanëshe chanjabotboto.

⁹ Nderado chca jamëse, nanjashájona; y ndóñesna, chora cocayé cuantsetëtse ca.’ ”

Jesús canÿe ochnayté, canÿe tséstjona shembásabioye tbojanshná

¹⁰ Canÿe, canÿe ochnayté Jesús yojontsé entsanga jabuátambana, chë judiëngbe enefjuana yebnentse,

¹¹ y chentse yojtsemna canÿe shembása; cha ya bnëtsana posufta uata yojtsešoca. Canÿe bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana.

¹² Jesús chábioye tbojáninÿe ora, tbojanchembo y mëntśá tbojaniana: “Batá, mora ya ndoñe šocá quecátsmëna ca.”

¹³ Chora Jesús chabe cucuatšënga chábeñe to-janjajó, y cachora chë shembása yojtondirícha, y tojanontsé Bëngbe Bëtsábioye jëtschuayama.

14 Pero chë enefjuana yebnentša mándayana tbojánetna, Jesús chë shembása ochnayté tbojan-shnama, y entšanga tojanéyana: —Chnénguana te comna jatrabájama; chora šmochjabo jenóshnama; ochnaytese ndoñe ca.

15 Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinÿinÿnayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema?

16 Chcasna, quem shembása, canÿa Abrahám bentšana entšá, y Satanasbe causa bnétsana posufta uata šocá yojtsemna, ¿ndoñe tšabá yondmëna canÿe ochnayté chë bayëja jtsebojuánana ca?

17 Jesús chca tojánayana ora, chabe uayayënga imojtsëuatja, y nÿetsca entšanga imojtsóyejuaye Jesús tša bëts soyënga yojtsamama.

Chë mostaztiye jenayama cuento

(Mt 13.31-32; Mc 4.30-32)

18 Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nan-jopódia chama jábuayenana ca?”

19 Endmëna mo canÿe mostaza jénaye, canÿe entšá jajañe tojajecá; chiyna jójuana y canÿe bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguñe uaja-jonëtemëngá jauábopormana ca.”

Chë levadurama cuento

(Mt 13.33)

20 Měntšánaca Jesús tojánayana: “¿Ndaye sóyeca chjobenaye Běngbe Bětsabe aměndayama jábuayenama ca?”

21 Endmēna mo lewadurcá; canye shembása chana jenájubana unga medida arninýañe, nýetsana chauabochama ca.”

Chě base utěntśá běśása
(Mt 7.13-14, 21-23)

22 Jerusalenoye benache, Jesús entsanga yojtsabuátambaye běts pueblěnguiñe y base pueblotéměnguiñe.

23 Canya chábioye tbojantjá: —Běngbe Utabná, ¿nye báseftanga imomna chě atsebácaněnga mochtsemněnga ca?”

Y Jesús tbojanjuá:

24 —Puerte šmochtsentšena chě base utěntśá běśásajana jamashjnama; er ndegombre cběyana, banga mochántseboše chějana jamashjnama, pero ndoñe quemochatobenaye.

25 Chě yebnentša nduiño chaojotsbaná y chě běśása chaojtatámentšana, tšěngaftanga chě shjoca chašmojtsemněnga, šmochántsechambuana, měntśá jtsicháměse: “Utabná, šmebětafjo ca.” Pero cha cmochanjáuyana, “Atše ndoñe quetsátstatšěmbo nděmoquěnga tšěngaftanga šmomnana ca.”

26 Chora tšěngaftanga šmochanjontšě ichámuana: “Acaftaca cányiñe fsěnjase y fsěnjofsé, y aca běngbe tsášhenañe tconjabuatambá ca.”

27 Pero cha cmochanjójuaye: “Ya tcbonjáuyana, nděmoquěnga šmomnana ndoñe tstátšěmbo ca. ¡Atšbentšana mojuánanga, bacna soyěnga aměnga ca!”

28 “Chora chentše puerte šmochanjenóbošachna y tsetšanama juatsašënga šmochantsenoftëšjojnaye, Abraham, Isaac, Jacob y nyetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnana chašmojinÿe ora, y tšëngaftanga chentšana cmochtëbuacanama.

29 Y shinÿe bocanoicana y ue-natjëmbambanoicana, tsmanoicana y tsjuanoicana entšanga mochanjabo y juasama mochanjotbiama Bëngbe Bëtsabe amëndayentše.

30 Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

*Jesús tbojanongmé Jerusalemëntša entšangbiama
(Mt 23.37-39)*

31 Jesús chë soyënga tojanëyana ora, básefta fariseunga tmojánashjajna y tmojanियana: — Muentšana motsatoñe; Herodes entseboše aca jtsóbama ca.

32 Y Jesús tojanëjua: —Motsajna y šmochjauyana chë corente studio bomná, mo tjañe mesetca: “Minÿe, mënté y yëfse entšángbentšana bacna bayëjënga sëndëtëbuacana y šoquënga sëndáshnaye, y baseftaytesna chanjapochóca ca.”

33 Pero atše šontsemna mënté y yëfse jtsayana, y baseftaytesna Jerusalemoye jana, er ndoñe tšabá ntsemnana canÿa Bëngbe Bëtsabe juabna oye-buambnayá Jerusalemëntša chábuañe chaóbana ca.

34 “¡Jerusalemëntša entšanga, Jerusalemëntša entšanga, tšëngaftanga chë Bëngbe Bëtsabe juabna

oyebuambnayënga jtsëbáyana, y chë Bëngbe Bëtsabe ichmónëngbioye ndëtsbéngaca jtsatëchënganjana jtsëbáyama! ¡Bueta soye atše sënjábošena tšëngaftanga átšbioye júbuajama, mo canye tuamba chabe bolletotémënga juatëngmiáša tajsoye cuaftajayecá, pero tšëngaftanga ndoñe chešmátsbošena!

³⁵ Y šmochjinýe, mora atše cachcá cbochanjesënyaye, y chca, atšna enánanga cbochanjésabashejuana, mo canye yebna cachcá tcojesonýá y énañe tcojeseboshjoncá. Y ndegombre, tšëngaftanga morscana ndoñe más atše quešmochátinýe; y atše šmochántinýe, chë: ‘¡Corente bendición bomná, Bëngbe Utabnabe obenánaca tojabá ca!’ chašmojtsichamo ora ca” —Jesús tojánayana.

14

Jesús, canye uafshachanánaca šocábioye tbojan-shná

¹ Canye ochnayté, Jesús tojána jasama fariseungbe canye amëndayabe yebnoye; y chë fariseunga yejuana imojtserreparana, er ndayá Jesús nanjama.

² Chéntšnaca, chabe delante yojtsemna canye entšá uafshachanánaca šocá.

³ As Jesús chë ley abuátambayënga y fariseunga tojanatjá: “¿Quenlesenciana canye ochnayté canye šocá jáshnama o ndoñe ca?”

⁴ Chëngna ndocá tmonjanjuá. As Jesús chë šocábioye tbojánishache, tbojanshná y tbojanianyana chaotsatoñe ca.

5 Y chë fariseunga tojanëyana: “¿Nda tsëngaftanguentsá, nderado chabe uaquiñá o uacná canye tboye tojtsótsatse, cachora ndoñe nanjá jetsejásécama, masque ochnayté totsomñëse ca?”

6 Y chënga ndocá tmonjanobená cha jojuana.

Chë casamentoye ófjanënga

7 Jesús tojáninye ntšamo chë ófjanënga quëfseroye imojtsachnëjuana jotbiamama; as mëntsá chënga tojanabuayená:

8 “Canye casamentama nda chacmojojfa ora, quëfseroca ndoñe catjót'bema, er nderado inye ofjaná acbiama más uamaná ústonoye nandaboye;

9 y nderado chë tsëndatbe ofjajaná nanjabo y cmatjauyana: ‘Mua chentse chaótbema, maluaré ca’, y chora cmatjotóca ouatjentse chafjoca jana jatótbemana.

10 Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentse tmojtsetbiámanëngbiama uamaná cochántsemna.

11 Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema ca.”

12 Y chë tbojanofja entsábioynaca Jesús mëntsá tbojaniyana: “Fiesta chacojama o sananga chacojtsebomna ora, ndoñe cattsëbuájajana acbe amiguënga, catšátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétofja, y chca ya acbe uacanana soye cochántsebomna.

13 Chamna, canÿe fiesta chacojama ora, cochjúbuaja ndbomnëjémënga, jama ndobenënga, coshetënga y jtanënga,

14 y aca corente oyejuayá cochántsemna; er chënga ndoñe quemochatobenaye cachcá aca jtëtofjana, pero acna acbe uacanana soye cochántsebmna, chë Bëngbe Bëtsabe bominyiñe tsábënga imomnënga chamojtayena ora ca” –cha tbojaniyana.

*Chë bëts sanama cuento
(Mt 22.1-10)*

15 Chca tojanuena ora, canÿa chë mesëshentse tbemaná tojánayana: –¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

16 Chora Jesús tbojaniyana: –Canÿe bacó canÿe bëts saná yojapróna y ba entšanga yojúbuaja.

17 Juasama ya yojobuache ora, canÿe oservená ibojíchmua chë ófjanënga jáuyanama chamotsajna, ya lempe yojtseprontana ca.

18 Pero chorna nÿetscanga imojontsé jtsoyátsëmbuana. Canÿa yojayana: “Cabá mora canÿe fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.”

19 Inÿa yojayana: “Bnëtsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.”

20 Y inÿa yojayana: “Cabá mora sëntsobouamá, y chë causa, ndoñe quichatobenaye jama ca.”

21 Chora chë oservená yojesshëcona y lempe chabe nduiñbioye ibojauenaye. Chë nduiño tša ibojtsetna, y chë oservenábioye ibojauyana: “Cam ora motsa tsashenangoye y benachëngoye, y moye cochjunatse ndbomnjëmënga, jama ndobenënga, jtanënga y coshetënga ca.”

22 Chentša bënëntscose, chë oservená chë nduiñbioye ibojauyana: “Bacó, ya sënjama ntšamo šconjamandacá, y cabá ínÿengbiamu luare entsemna ca.”

23 As chë nduiño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojutjiamu;

24 er ndegombre chëyana, chë natsana sënjobuajënguentsá ndocná atšbe saná queochatsse ca.”

*Ntšamo yomna Cristbe ustoná jtsemnana
(Mt 10.37-38)*

25 Mallajta entšanga Jesús imojtsëstona; as cha tojanobuértana y tojanéyana:

26 “Nderado nda átšbioye tojabo, y ntšamo chabe taitá, chabe mamá, chabe shema, chabe básenga, chabe catsátanga y uabënganga tuababuánÿeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntsoobenana atšbe uatsjendayá jtsemnana.

27 Y nda, atšbiamu ndoñe tontseprontana jasúfriama y cruciñe jobanámna, y nÿetsca chabe quem luare soyënga ndoñe tonjëseboshjona atše juastama, cha ndoñe ntsoobenana atšbe uatsjendayá jtsemnana.

28 “Nderado nda tšëngaftanguentsá tojtsejuabná canye tsbanana jebna soye japórmama, ¿cha natsana ndoñe nanjót'bema jinýama ntsachetsá crocénana chentše yochjuába, y japochócama nýetsá crocénana tayojtsebomnama?

29 Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nýetscanga chca tmojinýënga, muantsáfchaye y mëntsá muantsichamo:

30 ‘Quemějema jajebuama tonjontsé, y japochócama ndoñe chenatobená ca.’

31 “O ¿ndaye rey inye réyefraca jéntsjava tbojotocase, natsana ndoñe nanjót'bema jajuaboyama, nderado nanjobenaye bnétsana uaranga soldadéngaftaca chë ínýabioye jayénjanana, chë inya uta bnétsana uaranga soldadéngaftaca tojtsabose?

32 Y ndóñesna, chë inye rey cabá bënoca tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

33 “Chcasna, ndánaca tšëngaftanguentsá, lempe ntšamo tobomncá ndoñe cachcá tonjesonýá, cha ndoñe ntsoberenana atšbe uatsjendayá jtsemnama ca” —Jesús tojánayana.

Chë tamó fténana tojtsebocna ora

(Mt 5.13; Mc 9.50)

34 “Tamó tšabe soye endmëna; pero chë tamó fténana tojtsóbemëse, tšëngaftanga ndoñe quešmátobena jamana tempcá sanana cachiñe chaotsatsmënama, ni saná jatamuama. Chë ftena tamó tondayama ntsoservénana, cachcá, chë atšbe

uatsjédayënga jtsemnama tmojtsebošënga, pero lempe jéseboshjonama ndoñe tmontseboše, cach ndoñe chama ntososervénana.

³⁵ Chë ftena tamó ndoñe ntososervénana ni fshantsama, ni uanguanëshama. Nÿe jtsëtšenana. Chë jouenama tmojtsobenënga, šmochjouena ca” —Jesús tojánayana.

15

Chë ótšena oveshabiana cuento (Mt 18.10-14)

¹ Nÿetsca chë Romocama impuesto entsángbioye atjanayënga y inÿe bacna soyënga amënga, Jesúsbioye imojánajna chabe palabra jouenama;

² y chë fariseunga y ley abuátambayënga chama Jesusbiana podesca imojtsoyebuambná, mëntšá: —Mua bacna soyënga amëngaftaca entsenuta y chëngaftaca entsesá ca.

³ As Jesús mëntšá tojanacuntá, chënga jabuátambama:

⁴ —¿Nda tšëngaftanguentsá, canÿe patse oveshënga tojtsabamna, y canÿa tbojtsobuétšëse, chë inÿe esconëfta bnëtsana y esconëfta oveshënga shëntsjañe ndoñe cachcá nanjesënyaye, y nanjá chë otšená jetsenguanguama candëtsónÿeñëntscuana?

⁵ Y tbojtsinÿena ora, oyejuayá chë oveshá jetsotantšájuana;

⁶ y yebnoye tojtashjango orna, chabe amiguënga y juachañe oyenënga jáchembuana y mëntšá jáuyanana: “Atšeftaca móyejuanga, er chë sëntsanobuetše oveshá sëntsinÿena ca.”

⁷ Atše cbëyana, cachcá, celócnaca más oyejuayana jtsebínÿnana, canÿe bacna soyënga

amá tšabe benache tojtishachabiamana, y ndoñe nña yapa, esconëfta bnëtsana y esconëfta tšabe soyënga amëngbiama, chë ndoñe yondujaboto bacna soyënga amana jtsajbanana ca.

Chë crocénana tojetsónyena shembásabiamana cuento

⁸ “O mëntšá, ¿ndëmua shembása, bnëtsana uámana crocénana tojtsebmna y cányana tojtsobuëtsëse, chora ndoñe canye uajuinyanëshana nanjuajuinyená, y cuedádoca chë yebna nantsetsajajo y botamana chë crocénana nantsenguango candëtsónyëñëntscuana?”

⁹ Y tojtsinýena ora, chabe amiguënga y juachañe oyena shembásenga jáchembuana, y mëntšá jáuyanana: ‘Atšeftaca móyejuanga, er chë sëntsanobuetše crocénana sëntsinýena ca.’

¹⁰ Atše cbéyana, cachcá, chë Bëngbe Bëtsabe angelotëmëngbeñe oyejuayana jtsebínynana, nñe canye bacna soyënga amá chë tšabe benache tojtishachabiamana ca” —Jesús tojánayana.

Chë uaquiñá bacna benachiñe ayá

¹¹ Jesús mëntšánaca tojanacuntá: “Canye entšá uta uaquiñata yojánabamna;

¹² y canye, chë ngomënche uaquiñá chabe taitábioye ibojauyana: ‘Taita, atšbe otocana soyënga šmatatšetá ca.’ As chë befta lempe chë uta uaquiñata yojtëjáyate.

¹³ “Chentsana baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocénánaca bën luaroye yojtsoñe, y choca, cha nñe ntšamo ibojocochëngcá, mocá yojenobuiye, y chca, lempe yojtsepochóca.

14 Lempe crocénana yojtsoshañe orna, bēts shēntsana chē luarentše yojóshjango, y chē causa cha ibojotóca shēntseca jtsejétanana.

15 As, cha yojá trabajo jonguangoñama y yojínñena chē luarentša canñe entšábentše; chana, chabe jajoye ibojíchmua cotšēnga jtsanñenama.

16 Chē bobontsna yojtseboše chē cotšbe saná jtsesana, pero ndocná tondaye ibonjanájuatšnaye.

17 “Cabana, botamana yojinñe ntšamo yojtsepasacá, y mēntšá yojenójuaboye: ‘¡Bueta trabájayēnga atšbe taitabe yebnentše bētscá saná mondētsóboñe, y atše muentše shēntsama chanjóbana ca!

18 Chantá atšbe taitabe yebnoye y mēntšá cha chanjauyana: Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá.

19 Mora ya merecido taitatobuajoñe acbe uaquiñá jtsabáinama; nñe canñe acbe trabajayacá Diosmanda šmatofja ca.’

20 Chca jēftsenójuaboyēse, yojontšé cachabe yebnoye jtana.

“Cabá bēnoca yojtsemna ora, chabe taitá chábioye ibojinñe, y chabe uaquiñabiama ibojóngmia, y jajébenguama betscó yojá; ibojajebengo, ibojtotsejcuá y tša yojtsóyejuayayama chē uaquiñábioye ibojtámochó.

21 Chora chē uaquiñá ibojauyana: ‘Taita, šmotseperdoná. Atše tijama ndayá Bēngbe Bētsá ndoñe yondbošcá, y ntšamo aca ndoñe condbošcá; mora ya merecido taitatobuajoñe acbe uaquiñá jtsabáinama ca.’

22 Pero chë Taitana chabe oservénënga yojámëndaye: ‘Betsco chë más tšabe entšayá mauaca y matspormanga, montšabuechëtjo y matsshecochëtjo.

23 Mora chë más minyica uacná šmochjuánatse y šmochjášhua. ¡Mochjase y mochjóboyejuaye ca!

24 Quem atšbe uaquiñá mo obanacá endánmëna y mora bënga montsetátšëmbo cha ainá yotsomñama. Quem atšbe uaquiñá mo otšenacá endánmëna y mora tmontsinyëna ca.’ Y chentšana imojontšé joboyeuayama.

25 “Chë yebnoca fiesta yojtsemnëntscuana, chë mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye.

26 As chora cha canyë oservenábioye ibojachembo y mëntšá ibojatjaye: ‘¿Ndayá bëngbe yebnentše yojtsopasana ca?’

27 “As chë oservená ibojojuá: ‘Acbe uabentsá tontashjango y chama acbe taitá šonjutarié chë más minyica uacná jáshbuama, cha tšabá tojtashjanguama ca.’

28 Pero chë uabóchena catšatna corente ibojtsetna y ndoñe yontseboše tsoye jtamashënguana. As cach befta yojábocna chë catšátbioye jaimpádama chauatamashënguana.

29 Chora cha chë taitábioye ibojauyana: ‘Taita, aca condétatšëmbo bueta uata cbetsajabuáchanama, nÿets tempo cbetseye-unanama, pero ndocna te ni mo canyë chivotema chešcaisatštá atšbe amiguëngaftaca joboyeuayama.

³⁰ Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minyica uacná chabiamatacojášbua ca’ —chë uaquiñá ibojauyana.

³¹ “Chora chë befta ibojojuá: ‘Atsbe uaquiñá, aca sempre átseftaca condétsemna y lempe ntšamo atše tsbomncá acbiámnaca endmëna.

³² Pero mora tšabá entsemna joboyeuayama y joyeuayëngama; er acbe uabentsá mo obanacá endánmëna, y mora bënga montsetátšëmbo cha ainá yotsomñama; mo otšenacá endánmëna, y mora tmontsinyëna ca.’ ”

16

Chë nduiñbe ndoñe tšabe uajabuachaná biamata cuento

¹ Jesús mëntsánaca chabe uatsjëndayënga tojanacuntá: “Inamna canyë bomna entsá, y cha ibnabomna canyë uajabuachaná chabe soyënga chaotsinyenama; y chë nduiño imojuenaye chë uajabuachaná chabe soyëngaca ndoñe tšabá yontsamama.

² Asna, chë nduiño ibojachembo y mëntsá ibojauyana: ‘¿Ntšamo acbiamata šmontsatsëtsnacá ndegombre yojtsemna ca? Mora cuenta šmatatštá ntšamo atsbe soyëngaca tcojamama, er morscana ya ndoñe atsbe soyënga inyëná quecochátsmëna ca.’

³ Chë uajabuachaná yojontsé jenójuaboyana, y mëntsá yojeniyana: ‘¿Y mora ntšamo chtsemna, chë nduiño atsbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sëntsëuatja.

4 Ya sěntsetatšēmbo ndayá chjama, chca, atšbe trabajuentsana chašojtábocna ora, atše jtsabamnana ndēmuanŷenga chēngbe yebnentše chašmofjama ca.’

5 “Chentsana, canŷánŷa chē chabe nduíñbioye ndebénēnga yojáchembo. Cánŷabioye ibojatjaye: ‘¿Ntsachetšá atšbe nduiño icondebena ca?’

6 Y cha ibojojuá: ‘Canŷe patse barrilēšangá aceitiye ca.’ As cha ibojauyana: ‘Muentše acbe recibēcha entsamna; mora mótbema y inŷácha nŷe shachna bnētsana barrilēšangama matapormá ca.’

7 Chentsana ínŷabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canŷe patse medida trigo ca.’ As cha ibojauyana: ‘Muentše acbe recibēcha entsamna; chiñe nŷe posufta bnētsanama mábema ca.’

8 Chentsana, chē nduiño tšabá yojayana chē ndoñe tšabá ama mayordombiama, cha stúdioca yojamama. Chē nŷe quem luarama enójuabnaye entsanga, cachēngbe soyēngaca puerte studio bomnēnga mondmēna; y chē entsangbe juabnēnga binŷnayábenga ndoñe nŷa yapa ca.

9 “Atše cbaruayená, quem luarentše, chē bacna soyēnga amēngbe luarentša bomnánaca amiguēnga šmochjábiamá, ínŷenga jtsējabuáchanēse. Chca, chē bomnana tojtsopochocá ora chašmotsabamna ndēmuanŷenga chē nŷetsca tescama oyenoye chacmúbuajama ca.

10 “Nda básefta soyēnguiñe lempe tšabá tojama, bētschá soyēnguíñnaca lempe tšabá echanjama; y nda básefta soyēnguiñe ndoñe tšabá

tonjama, bëtscá soyënguínaca cach ndoñe tšabá queochatsma.

¹¹ Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanyiye?

¹² Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiama yomncá ca?

¹³ “Ndocná ntsobenana uta mandayata jtsaservénana; er cánÿabioye bochantšáboyënja y chë ínÿabioyna bochantsebobonshana, o cánÿabiamna tšabá echántsetrabajaye, y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebomnama tcojtsebošëse ca” —Jesús tojánayana.

¹⁴ Chë fariseunga, becá crocénana jtsebomnama bošënga innamna, lempe chca chënga tmojanuena, y Jesúsbioye imojtsáboyejuana.

¹⁵ As Jesús tojanéyana: “Tšëngaftanga entsangbe delante mo tšábenga cuaftsemncá jtsenobiamnayana, pero Bëngbe Bëtsá endëtatsëmbo ndayá tšëngaftangbe ainaniñe yomnama; er ndayá entsanga más tojtsebošcá, Bëngbe Bëtsá jtsáboyënjana ca.

Moisesbe ley y Bëngbe Bëtsabe amëndayana

¹⁶ “Moisesbe ley y chë Bëngbe Bëtsabe juabna oyebuambnayënga tšëngaftanga cmonjanabuayiyná, Juan chë Ubayaná quem luaroye tonjánabëntscuana. Cha tonjánabo orscana montsabuaiyná chë tšabe noticiënga

Bëngbe Bëtsabe amëndayocama, y nÿetscanga tša montseboše choye jamashënguama ca.

17 “Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canÿe punto ndoñe chca chaondëtsemnama ca” — Jesús tojánayana.

Ndayá Jesús tojanabuatambá chë bouamnënga tmojtsenëtšenama

(Mt 19.1-12; Mc 10.1-12)

18 “Nda chabe shémbioye cachcá tbojesonÿá y ínÿaftaca tojtóbouamase, cha chë natsana shémbioye ínÿaftaca jtseíngñayana; y nda chë útšena shembásaftaca tojobouamá chana, canÿe uabuatmá jtsebomnana, y chca, chana canÿe bacna soye jtsamana ca” — Jesús tojánayana.

Chë bomná y chë ndbomnjëma Lázaro

19 “Canÿe bomna entšá inamna; cha yojanamana uámana y botamana shbuenda uafjatsenga y lino entšayangá jtichëtjuana, y cada te bëts fiestënga yojánama.

20 Canÿe ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bëšásentše fshantsiñe jótbemana.

21 Quem ndbomnjëma yojtseboše chë bomná yojtsesayentšana yojatquëcjana sanángaca jtoshachayana; y chë quešënga innaboye chabe nguaye cuerpo jajáfuama.

22 Canÿe te Lázaro yojtsóbana, y Bëngbe Bëtsabe angelënga Abrahámioye cha imojtamba, chë

nÿetscanga oyejuayënga mondmëna luaroye. Chë bomnánaca yojóbana y imojuátbontsa.

23 “Chë bomná infiernoca puerte ngmëniñe yojtsesufrina ora, tsbanánoye yojontješiye y bënoca Abraham ibojinÿe, y Lázaro cháftaca yojtsemna.

24 As chë bomná yojuyebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuae, er quem iñeshoca tša sëntsesufrina ca.’

25 Pero Abraham ibojauyana: ‘Uaquiñá, menouabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngmënana contsebomna.

26 Y inÿe soye, canÿe bëts tbuañe entsemna tšëngaftangbiocana mëntscoñe; chca, chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana bëngbioye cach ndoñe ca.’

27 “Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye;

28 choca sëndábamna shachna catšátanga; as chaúyana ntšamo moca atše stsepasana y ntšamo jamëse chënga ndoñe chaondëtsamna quem ngmëñënga luaroye jabama ca.’

29 Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsaná bema soyënga; ¡chëngbioye chamoyauná ca!’

³⁰ Chë bomná ibojojuá: ‘Ndoñe, Taita Abraham; nderado obanënguentšana canya chëngbioye tojase, aínhe chë tšabe benache muantishache ca.’

³¹ Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsábeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” —Jesús tojancuentá.

17

*Resjo yomna, nderado bacna soyënga cuanjama
(Mt 18.6-7, 21-22; Mc 9.42)*

¹ Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, ¡tša lastema chë entšabiamama ndabe causa ínÿënga bacna soyënga tmojama!

² Más tšabá chabiamama nántsemna canye nantsnëbé chamotsetamosëntsbua y mar béjayoye chamotsashbuetše, y ndoñe chë canya Bëngbe Bëtsábeñe ošbuachiyá bacna soye chaomama juanatsana.

³ Cuedado šmochtse bomna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna.

⁴ Masque nÿe canye te, canÿsëfta soye ntšámnaca tmojaborlá, y canÿsëfta soye ‘chca ndoñe más quebochatsbólra ca’ tmojauyanëse, aca cmontsemna cha jtseperdónana ca” —Jesús tojánayana.

Bëngbe Bëtsábeñe jtsošbuáchiyëse, corente obenanajtsebomnana

⁵ Chë uatsjédayënga Bëngbe Utabnábioye tmojaniana: —Ošbuáchiyana šmababuaté ca.

⁶ Y chë Utabná tojanējua: —Tšëngaftanga ošbuáchiyana, batšatema masque nýe mo mostaza jenaycá šmojtsebomněse, quem sicomoro betiyoye šmatjauyana: “quemuentšana mojashtse y mar béjayoca mojó ca”, y quem betiye chca nanjama ca.

Chë oservená ndayá ibomna jamana

⁷ “Nderado canya tšëngaftanguentsá canýe bochichnayá tbojtsebomna, cha jajocana tojtashjango jajañe arayocana o uacnënga anýenocana, ¿chábioye bochjauyana: ‘Matabo y mabose ca’?”

⁸ Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofsiye ca.’

⁹ Y chë bochichnayábioye ndoñe quebochtëtschuaye ndayá tbojuatarieca cha tojamama.

¹⁰ Tšëngaftánagnaca cachcá, lempe ntšamo Bëngbe Bëtsá tcmojutarieca chašmojama ora, cmontsamna jayanana: ‘Nduámana oservénënga fsëndmëna; er nýe ntšamo jamama šuamncá tifjama ca’ ” —Jesús tojánayana.

Jesús, bnëtsanënga bacna nguayanánaca šoquënga tojanashná

¹¹ Jerusalenoye benache, Jesús tojánachnëngo Samaria y Galilea luarëjana.

12 Y canye pueblotémoye tojánashjango ora, bnětsana boyabásenga bacna nguayanánaca šoquēnga chábioye tmojána; chábentšana bēnoca chēnga tmojanoquedá,

13 y mēntšá imojtsáyebuache: —¡Jesús, Buatēmbayá, šmotsalastemá ca!

14 Jesús chēnga tojánanýe ora, tojaněyana: —Jerusalenoca bachnángbioye motsajna, y chēnga šmochjínýanýiye tšēngaftanga mora nděšoquēnga šmojtsemnama ca.

Y tojanopasá, chē bnětsanēnga cabá imojétsayēntscuana, ya shnánēnga imojtoquédaye.

15 Canýa chēnguentšá, shnaná yojtsemnama tojáninýe ora, yojeshēcona Bēngbe Bětsábioye jabuache atschuanaye;

16 y Jesusbe delante yojshēntsamentsiye, jubiacaca fshantsóntscōñe yojotsejbéna, y chábioye ibojtsatschuanaye; y chē boyabásana Samarioca entšá inamna.

17 Chora Jesús tbojaniyana: —Bnětsanēnga mondmēna chē shnánēnga tmontoquédanga. ¿Ndayentše chē inýe esconěftanga imojtsemna?

18 ¿Nýe quem boyabása, inýe luarocana ashjanganá, tojeshēcona Bēngbe Bětsá jětschuayama? ¿Ndáyeca chē ínýenga ndoñe ca?

19 Y chē entšábioye tbojaniyana: —Matětsbaná y motsatoñe; Bēngbe Bětsábeñe aca icošbuachéyeca shnaná contsatsmēna ca.

*Ntsamo Bēngbe Bětsabe amēndayana
yochjóshjango
(Mt 24.23-28, 36-41)*

20 Canÿe, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanëjua: “Bëngbe Bëtsabe amëndayana chaojóshjango ora, tšëngaftanga ndoñe quemochatobenaye chca jinÿana.

21 Chora ndoñe quemochátichamo ‘Muentše entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

22 Jesús chabe uatsjédayënga tojanëyana: “Canÿe tempo echanjóshjango, y chora tšëngaftanga šmochántseboše canÿe te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orcá; pero chora ndoñe chca queochatóshjango.

23 Chora báseftanga mochántsiichamo: ‘Muentše entsemna’ o ‘Choca entsemna ca’; pero choye ndoñe šmatjá, ni šmatjúseto.

24 Er chë tojatcuinÿe ora, ntšamo celoca catoica juachoica tojabuashinÿinÿenacá, chca echántsemna chë Bëngbe Bëtsá Entšá tbojanbemá quem luaroye chaojésabo te.

25 Pero natsana cha bontsemna puerte jasúfriana, y morsca entšangbiana uabotená jtsemnana.

26 “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora.

27 Chë tempo, entšanga imnasaye, imnofšëšnaye, imnóbouamnaye; natjëmbana imojtsiyene, y chca, natjëmbana imojtsomne,

Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojtsanapochocá.

²⁸ Cachcá ntšamo Lot yojaniyena ora tojanopasacá: entšanga imnasaye, imnofšëšnaye, imnóbouamnaye, imojtsena, sananga imnajena y imnajebuana;

²⁹ pero Lot Sodoma bëts pueblentšana tojëftsanbocna ora, Bëngbe Bëtsá tojanma celocana íñeshe y azufre chauaftema, y chentša entšanga tojtsanapochocá.

³⁰ Cachcá echántsemna chë Bëngbe Bëtsá Entšá tbojanbemá chaojtonýná ora.

³¹ “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebomněse, chocana ndoñe chaondétastjango chë soyënga jesabobocnama; y nda jajoca chaojtsemna, yebnoye ndoñe chaondéta.

³² Menójuabonga ntšamo Lotbe shémaftaca tojanopasama.

³³ Nda tojtsentšena quem luarentše bëtscá jtsebomnama y atšbiana jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nyetsca tescama yomna tšabe vida echántsebomna.

³⁴ “Atše cbëyana, chë ibeta, chë Bëngbe Bëtsá Entšá tbojanbemá chaojtonýná ora, útata canýe jutsnéshañe bochántsemna; canýa mochanjesbetše y chë ínýana ndoñe.

³⁵ Uta shembásata cányiñe bochántsejanýcoye; canýa mochanjesbetše y chë ínýana ndoñe.

³⁶ Uta boyabásata jajoca bochántsetrabajaye; canya mochanjesbetse y chë ínÿana ndoñe ca” —cha tojanéyana.

³⁷ Chora chë uatsjéndayënga Jesús tmojantjá: — Utabná, ¿ndémoca chca yochjopása ca?

Y cha tojanjuá: —Chë obanabe cuerpo tojtsemnentse chë gallinacënga jojotana ca.

18

Chë viudá y chë mandadbiama cuento

¹ Jesús mëntśá tojanacuntá, entšanga jabuátambama, Bëngbe Bëtsáftaca nyets tempo jtsencuéntayana yomnama, ainaniñe añemo jtsebonnama ndocna te ntjajbanacá.

² Mëntśá tojánayana: “Canÿe pueblentse canÿe mandado inamna; chana ni Bëngbe Bëtsábioye ndoñe bonjánebiauatja, ni entšanga yonjánayaunana.

³ Chë pueblentse canÿe viudánaca inamna; chana canÿe demanda yojánbomna. As chë mandádbioye yojobeconá y mëntśá ibojauyana: ‘Diosmanda atšbe uayayá motsecastigá ndayá šojaborlama ca.’

⁴ Bayté chë mandado ndoñe yonjábosena chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entšanga ndoñe quetsátayaunana,

⁵ pero quem viudá cada ora endabó causa, aíñe chanjóyeunaye, chabe uayayá chanjacastíga; ndóñesna cada te nandaboye y cabana ya šochanjanamëntša ca.’ ”

6 Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá.

7 Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínÿengbe causa montsesufrina y cada te Bëngbe Bëtsá mondbétseimpadana chaújabuachama. ¿Más chamuatobatmá ca yochjáuyana?

8 Atše cbëyana, Bëngbe Bëtsá betesco tšëngaftanga cmochanjátsebacaye, tšëngaftanga chë ínÿengbe causa mora šmojtseufrínënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entšanga yochjánÿena ca?” —Jesús tojánayana.

Chë fariseo y chë Romocama impuesto atjanayabiama cuento

9 Báseftanga imojtsanjuabná chënga tšabe entšanga innamna ca, pero chë ínÿengbioye imojtsëbuayënja; chíyeca Jesús mëntšá tojanacuntá jabuátambama:

10 “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canÿa yojamna fariseo, y chë ínÿana, canÿe Romocama entšángbioye impuesto atjanayá.

11 Chocna chë fariseo, tsanana Bëngbe Bëtsábioye mëntšá ibojtsecuéntaye: ‘Bëngbe Bëtsá, cbontsatschuaná atše chë ínÿengcá ndoñe quetsatsmënama: atbëbanënga, puerta bacna soye amënga y shémbioye ínÿaftaca íngñayënga; y ni quem Romocama impuesto atjanayacá ndoñe quetsatsmënama.

12 Atše sēnduamana, ácaftaca jencuéntamna, canýe semaniñe uta soye tondaye ntjascá jtsemnana; y lempe stjonýenentsana, bnětsanentsana canýe soye acbiama sēndēquēcjná ca.’

13 Pero chē Romocama impuesto atjanayana, bēnoca yojtsemna, ni celoye ntjontješiy cá, yojt-senócochjantsetaye y mēntšá yojtsichamo: ‘¡Atšbe Bětsá, šmotselastemá, atšajema bacna soye amá tsmēna causa ca!’ ”

14 Chentšana Jesús tojánayana: “Atše cběyana, quem Romocama impuesto atjanayá chabe yeb-noye tojtaná chabe bacna soyēngama perdonaná, pero chē fariseo ndoñe. Er nda cachá bětsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bětsá mochanjábema.”

Jesús, basetémēngbiama Bēngbe Bětsábioye tbojan-impadá

(Mt 19.13-15; Mc 10.13-16)

15 Entšanga imojanamana Jesúsbioye basetémēnga junatsana chauabájajuama, y Bēngbe Bětsábioye chēngbiama chaboimpadama; pero chē uatsjéndayēnga chca tmojáninýe ora, tmojanontsé chē basetémēnga unachayēnga jtsēcácanana.

16 Pero Jesusna chē basetémēnga tojánachembo, y mēntšá tojánayana: “Cachcá mónýaye chē basetémēnga átšbioye chamuabo, y ndoñe matéuyanana; er Bēngbe Bětsabe améndayana endmēna chē mo quem basetemēngcá imomnēngbiama.

17 Ndegombre cběyana, nda Bēngbe Bětsabe soyēnga ndoñe tonjójyēngacñe mo canýe basetemcá

jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

*Canÿe bomna entšá Jesúsbioye tojána
(Mt 19.16-30; Mc 10.17-31)*

¹⁸ Canÿe mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

¹⁹ Y Jesús tbojanjuá: —¿Ndáyeca šcjauyana “tšabia ca”? Tšabia nyë canÿa endmëna: Bëngbe Bëtsá.

²⁰ Aca condëtatšëmbo ntšamo Bëngbe Bëtsá tojanmandacá: “Acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, ndoñe catjuaboínÿena y acbe bëtsëtsata ndoñe stëtšoye catjáquedaye ca.”

²¹ Chora chë boyabása tbojanjuá: —Atše lempe chca básetema orscana sëndocumplina ca.

²² Jesús chca tojanuena ora, tbojaniana: —Cabá canÿe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnějémënga cochtsatšataye; chca, celoca canÿe bëts bomnana cochántsebomna. Chentsana, cochjabo y šcochjuasto ca.

²³ Chë entšá chca tojanuena ora, puerte ngmënaca yojtsemna, er cha corente bomná inamna.

²⁴ Chca ngmená tbojáninÿe ora, Jesús tojánayana: —¡Yapa totcá bomněngbiama entsemna Bëngbe Bëtsabe amëndayoye jamashënguama!

²⁵ Ndegombre, más paselo endmëna canÿe camello chë coshufjentsa atëfñëjana

chauachnëngo, y ndoñe canye bomná Bëngbe Bëtsabe amëndayoye jamashënguana ca.

²⁶ Chora, chë chca imojouenënga tmojánayana: — ¿As nda yochjobenaye atsbocaná jtsemnana ca?

²⁷ Y Jesús tojanējua: —Ndayá entsanga ndoñe mondobena jamana, Bëngbe Bëtsá aíñe endobena jamana ca.

²⁸ Chora Pedro, Jesúsbioye tbojanियana: — Bëngbe Utabná, aca contsonyá, bënga lempe chë fsëndbomna soyënga fsënjéseboshjona, y ácaftaca fsëntsajna ca.

²⁹ Jesús chora tojaněyana: —Ndegombre cběyana, ndánaca Bëngbe Bëtsábioye jaserviama, chabe amëndayama jtsabuayiynayëse, cachcá tojëftseboshjona chabe yebna, shema, catšátanga, bëtsétsanga o básenga,

³⁰ cha mora quem luarentse chë soyëngama más echanjójyëngacñe, y chë inye luarocna, chë nyetsca tescama yomna tšabe vida ca.

Jesús cachiñe tojánayana cha jóbanama y jtayenama

(Mt 20.17-19; Mc 10.32-34)

³¹ Jesús chabe bnëtsana uta uatsjëndayënga barie tojánachembo, y mëntsá tojaněyana: “Smontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oye-buambnayënga, chë Bëngbe Bëtsá Entšá tbojanbemabiama tmojanabemcá;

³² er choca cha chë ndoñe judiëngbe cucu-atšíñe mochanjáboshjona, y mochantšáboyejuana, mochanjójyënguango, mochántsebuashëttoj;

33 y chamojátjanjentšana, mochanjóba, pero unga tianoye cha echántayena ca.”

34 Chë uatsjéndayënga tondaye tonjanësertá, ni montsetátšëmbo ndayá bétsemnana ntšamo Jesús yojtšetsëtsnacá, er chëngbiamá yojamna josértama ndopodena soyënga.

Jesús, Jericó pueblóca canye jtanábioye tbojan-shná

(Mt 20.29-34; Mc 10.46-52)

35 Tojanopasá, Jesús Jericó pueblóye yojtsebéconaye ora, canye jtaná benache juachañe inatbemana, lemošna otjanañe.

36 Entšanga chëjana imojtsachnëjuanama tojanuena ora, yojanotícia ndayá yojtšopasana ca,

37 y chë entšanga tmojanianyana, —Jesús Nazaretocá entsebeconá ca.

38 As cha yojontšé uayebuáchana: —¡Jesús, Davídbentšana Entšá, šmotselastemá ca!

39 Chë natsana imojtsajnënga chë jtaná imojtsácacana, iytëca chaóbemama; pero cha más yojtšáyebuache: —¡Davídbentšana Entšá, šmotselastemá ca!

40 As Jesús tojantsá y tojanmandá cha chamo-betšama. Cha ya bécoñe yojtsemna ora, Jesús tbojantjá:

41 —¿Ndayá cojtseboše atše acbiamá chjamama ca?

Y chë jtaná tbojanjuá: —Atšbe Utabná, atše sëntseboše chašuatabínynama ca.

42 Chora Jesús tbojanianyana: —Matinye, Bëngbe Bëtsábeñe betsošbuachéyeca shnaná contsatšmëna ca.

⁴³ Y cachora cha tšabá ibojtabinÿna, y Jesúsbioye ibojtsěstona, Běngbe Bětsá atschuanaye. Y nÿetsca entšanga, chca tmojáninÿe ora, Běngbe Bětsá imojtsatschuanaye.

19

Jesús y Zaqueo

¹ Jesús Jericó puebloca tojánashjango ora, chě publějana cha yojtsachnějuana.

²⁻³ Chora, canÿe bomna entšá, chě Romocama entšanga impuesto atjanayěngbe aměndayá, Zaqueo ca uabainá, yojtseboše Jesús jinÿama. Pero ndoñe yontsobena jinÿama, bětská entšanga causa y cha becu inamna causa.

⁴ Chcasna, cha betesco natsanoye tojaftsanótjajo y canÿe sicomoro betiyeshoye tojánašěngo, chca, Jesús chějana tojtsachnějuana ora, jinÿama jobenayama.

⁵ Jesús chě betiyeshoye tojánashjango ora, tsbanánoye tojanontješé y Zaqueobioye tbojáninÿe. As Jesús tbojanianyana: “Betsco chocana matastjango, Zaqueo, er měnté chanjá acbe yebnoye jatema ca.”

⁶ Chora Zaqueo betesco tojtanastjango y chentšana puerta oyejuayá Jesúsbioye tbojanofja.

⁷ Entšanga chca tmojáninÿe ora, tmojanontšé Jesusbe contra měntšá ichámuana: “Jesús tonjá canÿe bacna soyěnga amabe yebnentše jatema ca.”

⁸ Chora Zaqueo tojantsá, Běngbe Utabná Jesúscentše, y měntšá tbojanianyana: —Mouena, atšbe Utabná, atšbe bomna soyěnguentšana tsěntsañe ndbomnějéměnga chanjátšataye y nda

más crocénana tijëftseyëngacá, chë ntsachetšá tijëftsefcama canta soye más chantoyiye ca.

⁹ As Jesús tbojaniyana: —Mënté, aca acbe bacna soyënguentšana atsbocaná contsemna, er Zaqueo, ácnaca Abrahámbentšana entšá condmëna.

¹⁰ Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnënga jabétsanguanguama y jabátsebacama ca.

Chë crocenánama cuento
(Mt 25.14-30)

¹¹ Entšanga chë soyënga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

¹² Jesús tojanéyana: “Canye luarentša uámana entšá inye bën luaroye yojá, cachabe luarentša rey chamobemama y chentšana cachábioye jtama.

¹³ Cabá nda ora, chabe bnëtsana oservëngë yojáchembo y bëtská crocénana cada cányabioye yojëftsayentšbuachiye, y mëntšá yojëftséyana: ‘Quem crocenánaca trato šmochjábema atše candëtabëntscuana ca.’

¹⁴ Pero cachabe luarentša entšanga cha imojuáya, as chëngna básefta entšanga imojichamuá chë inye bën luaroca mëntšá chamuayanama: ‘bënga ndoñe queftsátšboše cha bëngbe rey chaotsemnama ca’.

¹⁵ “Pero pronto chë luarentša rey cha imojábema. Y chë luaroye yojtá orna yojamánda chë crocénana yojëftsayentšbuáchënga chamobéconama, jtsetatšëmbuama ntsachetšá cada ona chë crocenánaca yojongánama.

16 Chë natsaná yojáshjango y yojayana: ‘Taita, acbe crocénana bnětsana soye más tonjoboté ca.’

17 Y chë rey ibojojuá: ‘Tša tšabá, tšabe oservená. Aca quem base soyiñe ntšamo tcojamandacá tšabá tcojámayeca, bnětsana pueblentša mandado chacotsemnama cbojayé ca.’

18 Chentšana inŷa yojáshjango y yojayana: ‘Taita, acbe crocénana shachna soye más tonjoboté ca.’

19 Y chë rey ibojauyana: ‘Acnaca shachna pueblentša mandado cochántsemna ca.’

20 “Chorna inŷa yojobeconá y měntšá yojayana: ‘Taita, muentše acbe crocénana entsatsmēna; canŷe pañuelějuañe bonguana sěntsejajo.

21 Atše achiamo uatjana šonjuábuache, er aca canŷe tšátjaye entšá condmēna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’

22 As chë rey ibojauyana: ‘Bacna oservená, cach acbe palabréngaca chanjínŷanŷiye aca ndoñe tšabá tconjamama. Atše chë ndoñe sěndbuajonentšana jocñana y chë ndoñe sěnjajé luarentšana jobuátbanana tsuamanama icojátatšěmběse,

23 ¿ndáyeca ndoñe tconjá chë crocénana bancoca jetsobuájuama, y atše camoye matijtabo ora, maščtoyé chë crocénana y chë chentšana tojoboté crocėnanėnaca ca?’

24 Y chë chentše imojtsemna entšanga yojáuyana: ‘Chë crocénana motseboca y chë bnětsana soye más tojabotėbioye chana motsatšetá ca.’

25 As chěnga imojojuá: ‘¡Pero cha ya bnětsana soye más entsebomna ca!’

26 Y chë rey yojóju: ‘Atše cbëyana, nda tojtsebomnábioye, más mochanjátsetaye; pero nda tondaye tondbomnábioye, chë tojtsejuabná batsatema yobomna sóynaca mochántseboca ca.

27 Y chë atše uayayënga, chë chëngbe rey atše chaitsemnama ndoñe monjánbošëngna, moye mënatsë y atšbe delante šmochtsëbaye ca’ ” –cha chora yojayana.

*Jesús Jerusalenoye tojánashjango
(Mt 21.1-11; Mc 11.1-11; Jn 12.12-19)*

28-29 Chca tojëftsanayana chentšana, Jerusalenoye yojétsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjëndayata tojanichamó,

30 mëntšá jáuyanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínÿena. Chábeñe cabá ndocná tonjenojayé. Sochjuajafjoná y šochjuánatse.

31 Y nderado nda ndáyeca šojtsajafjná ca chacmojátjasna, šochjauyana: ‘Bëngbe Utabná bontsájaboto ca.’ ”

32 Chë uatsjëndayata tbojána y lempe ntšamo Jesús tojanëyancá tbojáninÿena.

33 Y chë burrotema imojtsajafjná orna, chë burrotema nduiñënga tmojanëyana: –¿Ndáyeca chë burrotema šojtsajafjná ca?

34 Chora chata tbojánayana: –Bëngbe Utabná bontsajabótoyeca ca.

35 Chentsana Jesúsbioye chë burrotema tmojanánatse, y chë burrotémbeñe chatbe entsáyá tbojanájatse, y chábeñe Jesús tmojanenjayé.

36 Y cha yojtsachnëjuana ora, entsanga chëngbe entsáyá benachëjana imojtsëtétsatsana.

37 Olivos tjashe tsmanoye yojtsebeconá ora, chë bëtscá entsanga, Jesúsbeñe ošbuáchiyënga, tmojanontsé uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama.

38 Chënga mëntsá imojtsichamo: “¡Corente bendición bonná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga ca!”

39 Chë entsanguentše básefta fariseunga imojtsemnënga, Jesús tmojanianyana: — Buatëmbayá, acbe ústonënga mëcácana chca ndoñe chamondëtsáyebuachama ca.

40 Pero Jesús mëntsá tojanëjua: —Ndegombre cbëyana, mënga iytëca tmojobiamëse, chë ndëtšbenga muanjuayebuáchena ca.

41 Jesús Jerusalén béconana tojánashjango, y chë bëts pueblo tojáninye ora, chentsa entsangbiama tojánenobošachna.

42 Y mëntsá tojánayana: “¡Malaye šmëntsetátšëmbo, nye mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominyama entsëitëmena.

43 Er Jerusalemoca bacna tenga echanjóshjango; chora uayayënga chentsa shëconánëjana canye tapiëse mochantsepórma, mochantsejëtja y nyetsca

juachoicana mochanjontsé tšëngaftanga jtsatsejana,

⁴⁴ y lempe mochantsepochoáca. Muentša oyenënga mochantsëbaye, y ni mo canÿe ndëtšbé inÿebé juatsboca quemochaiseboshjona, chë Bëngbe Bëtsá tšëngaftanga játsebacama tojabo ora, ndoñe chešmatoyeuná causa ca” —Jesús tojánayana.

Jesús, Bëngbe Bëtsabe bëts yebnentšana enënga y obuámnyënga tojtanëbuacna
(Mt 21.12-17; Mc 11.15-19; Jn 2.13-22)

⁴⁵ Chentšana, Bëngbe Bëtsabe bëts yebnoye Jesús tojánamashëngo y tojanontsé chë chentše imojtšenënga chentšana jtëbuacnana,

⁴⁶ y tojanëyana: “Bëngbe Bëtsá chabe uabemana palabrënguiñe tojayana: ‘Atšbe bëts yebna echántsemna átšeftaca encuéntaye yebna ca’, pero tšëngaftangna, atbëbanëngbe oyeníñe chë yebna šmojtsebema ca.”

⁴⁷ Y cada te, Bëngbe Bëtsabe bëts yebnentše Jesús entšanga yojsabuátambaye; y bachnangbe amëndayënga, ley abuátambayënga y chë pueblentša mandayëgnaca imojtsenguaye ntšamo jamëse cha jóbana.

⁴⁸ Pero ndoñe tmonjáninÿena ntšamo, er nyetsca entšanga corente imojtseyeyunana ntšamo cha yojtsoyebuambnacá.

20

Jesusbe obenana
(Mt 21.23-27; Mc 11.27-33)

¹ Canye te, Bëngbe Bëtsabe bëts yebnentše Jesús yojtsabuátambaye, y chë tšabe noticiëngama yojtsabuayiyná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cánÿiñe;

² y Jesús tmojaniyana: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

³ Chora Jesús tojanëjua: —Atšnaca canye soye sëntsebomna tšëngaftanga jatjayama. Smochjojuanga.

⁴ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca?

⁵ Chora chënga tmojanontsé enatsëtsnayana: “ ‘Bëngbe Bëtsá ca’ chamojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’

⁶ Y ndoñe quemuátobena jayanana ‘entšanga ca’; entšanga ndëtsbéngaca buattsébaye, er nyetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.”

⁷ Chcasna, chënga tmojanjuá ndoñe monjántatšëmbo nda Juan tbojanichmó entšanga jubáyama ca.

⁸ Y Jesús tojanëyana: —Asna atše cach ndoñe quebochatëyana ndaye deréchoca chca stsama ca.

*Chë puerta bacna trabájayëngbiana cuento
(Mt 21.33-44; Mc 12.1-11)*

⁹ Chentsana Jesús tojanontsé entšanga jáuyanana, y quem cuéntoca tojanabuatambá: “Canye entšá uvas betiyënga yojáje y chë fshantse

inÿe trabájayënga yojúyentsame, y baytescama bën luaroye yojtsoñe.

¹⁰ Chë uvasësangá juashacama tempo yojobuache orna, chë jajañe nduiño canÿe oservená ibojíchmuá chë trabájayënga jáuyanama ntsachetsá cha ibojtsotocánama. Pero chëngna cha imojtsejantsetaye, y tondaye ntoyiyá imojtichmuá.

¹¹ Chentsana inÿa ibojíchmuá; pero chë trabájayënga cha imojtsejantsetaye, imojtsóyenguango, y tondaye ntoyiyá imojtichmuá.

¹² Chë nduiño inÿa ibojatichmuá; pero chánaca chënga imojtsejantsetaye, imojtselísia, y chentsana imojtábocna.

¹³ “Chora chë nduiño yojeniyana: ‘¿Y mora ntsamo chjama ca? Cach atšbe bonshana uaquiñá chanjíchmuá; nderádose cha aíñe mochanjóyeunaye ca.’

¹⁴ Pero chë trabájayënga, chë uaquiñá imojinÿe orna imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe; motsóbanga y nÿetsca chabe otocana soyënga bëngbiama echanjoquéda ca.’

¹⁵ Chcasna, chë uvas jajañentsana cha imojtsábocna y imojtsóba.”

Chora Jesús tojanatjá: —Y asna, ¿ntsamo šmojtsejuabná, ndayá chë jajañe nduiño chë trabájayëngaftaca yochjama ca?

¹⁶ Cha co echanjá y chë trabájayënga echanjetsëbaye, y chë uvas betiyënga jajañe inÿe trabájayënga echanjárrendaye ca.

Chë entšanga chca tmojanuena ora, tmojánayana: —¿Bëngaftaca ndocna te chca

chaondopasá ca!

¹⁷ Pero Jesús tojanënyänjë y tojánayana: —As ¿ndayama Bëngbe Bëtsabe uabemana palabrënguiñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanësentše entsejájona ca.

¹⁸ Ndánaca chë ndëtsbeñe chaojotsatsá, chëbé bochántsatsacaye; y chë ndëtsbé ndábeñnaca chaojótsatše, polvëshe bochántsebema ca —Jesús tojánayana.

¹⁹ Chë bachnangbe amëndayënga y ley abuátambayënga tmojanenótatšëmbona Jesús chca tojanacuntá jinÿanÿiyama, chënga mo chë puerte bacna trabajayëngcá imojamnama; asna tmojánbošena cachora jishachana, pero entšangbiana imojtsauatja.

Chë Romoca bëts mandadbiama impuesto jtsat-squëcjnyama

(Mt 22.15-22; Mc 12.13-17)

²⁰ Chentšana chënga báseftanga tmojanichamó, mo ndegombre tšabe entšanga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama.

²¹ As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiana tondaye quenatámana nda más uamaná o nduamaná tomnana. Aca contsabuatambá

ndegombre tšabe vida jtsebonnama, ntšamo Bēngbe Bētsá yomandacá.

²² Chcasna, šmēyana, ħtšabá tayojtsemna bēnga, César, chē Romoca bēts mandadbiama, impuesto jtsatsquēcjnayana o ndoñe ca?

²³ Jesús yojtsetátšēmo, ntšamo cha tojayaniñe jisháchichiyama chēnga imojtsebošama; as tojanēyana:

²⁴ —Chē šmatsquēcjná crocénana šminyinyēnga ca; ħndabe jubiá chē crocenániñe yojtsemna, y ntšamo muentše entsabemancá nda chca iuabaina ca?

Y chēnga tmojanjuá: —Césarbe jubiá; cha chca enduabaina ca.

²⁵ Y Jesús tojanēyana: —César šmoctoyiye cha ibotocana soye; y Bēngbe Bētsana cha ibotocana soye ca.

²⁶ Y chca, chē ichmónēnga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanējuama, ojnánánēnga iytēca imojobiama.

Obanēnga jtayenama Jesús tmojantjá

(Mt 22.23-33; Mc 12.18-27)

²⁷ Chentšana, báseftanga saduceo ca uabaina entsanga tmojána Jesús jinŷama. Chēnga imojanjuabná obanēnga ndocna te ntayenana ca. Jesús mēntšá tmojantjá:

²⁸ —Buatēmbayá, Moisés bēngbe leyēnguiñe tojēftsanabema, nderado canŷe boyá tojtsóbana y básēnga ndoñe tonjēftsabáshejuanēsna, canmēna chē uabentsá chē shémaftaca jtobouamayana, chca, chē chabe uabochená obanabiama básēnga jtsabamnama ca.

29 Chcase, canye bēngbentše canysēfta catšátanga monjamna. Chē natsaná tonjanobouamá y tontsanóbana, básenga ntjēftsabashejuancá;

30 chentšana chē inya chē shémaftaca tonjanobouamá, y cachcá tonjanopasá.

31 Chē inye uabentsá chora cháftaca tonjanobouamá, pero tontsanóbana básenga ntjēftsabashejuancá; y cachcá, chē inye uabentsēngnaca cháftaca tmonjanobouamá, pero nyetscanga tmonjanóbana básenga ntjēftsabashejuancá.

32 Cabana, chē shembásanaca tontsanóbana.

33 Y chcasna, chē obanēnga chamojtayena ora, ¿ndabe chē canysēfta catšatanguentsabe shema chē shembása yochtsemna, nyetscanga cháftaca tmojanobouamase ca? —chēnga tmojantjá.

34 Chora Jesús tojanējua: —Quem luarentše boyabásenga y shembásenga mondbétsobouamnaye;

35 pero chē echanjóshjango luaroye jama y obanēnguentšana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye,

36 ni queochátopodena chēnga chamóbanama, y chca, chēnga mochántsemna mo angelēngcá, y Bēngbe Bētsabe básenga mochántsemna, obanēnguentšana mochtayénayeca.

37 Y Moisésnaca, chē yojsángbototjuana betiyetémama tojanábementše, bēnga šontsinyanýná chē obanēnga imnátayenama; chentše Bēngbe Bētsá tojánayana cha yomna

Abraham, Isaac y Jacobëbe Bëtsá ca.

³⁸ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³⁹ Chora básefta ley abuátambayënga Jesús tmojanianya: —Buatëmbayá, tšabá tcjayana ca.

⁴⁰ Y ya ndoñe más montsenñémua inye soyëngama jatstjanayana.

¿Cristo ndabe entsábentšana yomna?

(Mt 22.41-46; Mc 12.35-37)

⁴¹ Jesús tojanatjá: “¿Ndáyeca tšëngaftanga šmnétsichamo chë Uámana Uabuayaná, chë Cristo, Rey Davídbentšana iuabó ca?

⁴² Er cach David, chabe librëšañe Salmos ca uabainëšañe, tojánayana:

Bëngbe Bëtsá, atšbe Utabná Crístbioye tbojanianya: ‘Atšbe catšbioica mótbema,

⁴³ atšbe obenánaca, acbe uayayënga acbe cucu-atšinë chamoquedama chjamëntscuana ca.’

⁴⁴ ¿Ntšámose, Cristo, Davídbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

Jesús chë ley abuátambayëngbiana tojánayana chënga ndoñe tšabá montsama ca

(Mt 23.1-36; Mc 12.38-40; Lc 11.37-54)

⁴⁵ Njëtsca entsanga imojtsuenana, y Jesús chabe uatsjëndayënga tojanéyana:

⁴⁶ “Cuedado šmochtsebomna, y ndoñe šmattsama chë ley abuatambayëngcá; chënga jtsogusetánana bënëna entsayangaca jtsajnana,

y jtsebošana tsáshenañe entsanga beca respétoca chamotsacheuanayama. Chënga chë judiëngbe enefjuana yebnënguenache chë más uámana luarënguiñe jtsetbiámanana, y fiestënguiñe nÿa quëfseroca.

⁴⁷ Pero chë viudángbioye chë tmobomna soyënga jtsabacayana; y entsangbe delante tsabá chacmotsënyama y chënga imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá ínÿengbiama más chënga echanjácastigaye ca” — Jesús tojánayana.

21

*Jesús yojtsënyaye chë crocénana quëcjnyënga
(Mc 12.41-44)*

¹ Bëngbe Bëtsabe bëts yebnentse, Jesús yojtsënyaye chë bomnënga crocénana jtsequëcjnyayana chë crocénana quëcjnyëtémiñe;

² y canÿe viudá ndbomnjëmnaca tbojáninÿe, uta crocénana chëtémiñe yojaftsesegóra.

³ Chora Jesús tojánayana: “Ndegombre cbëyana, quem viudá ndbomnjëjema, Bëngbe Bëtsabiama nÿetscangbiama más beca tonjëftsesegorá;

⁴ er nÿetscanga tmonjëftsesegorá chë yojtsóyentsjamentšana, pero chana, masque tša ndbomnjëjema, cha vida jtsebomnama lempe ntsachetšá yobomncá tonjëftsesegorá ca.”

*Jesús tojánayana Bëngbe Bëtsabe bëts yebna lempe
mochjánpochocama
(Mt 24.1-2; Mc 13.1-2)*

5 Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámana ndëtsbéngaca y chë entsanga imojanamana juambana Bëngbe Bëtsábioye uátšëmbona soyëngaca ca. As Jesús tojánayana:

6—Canÿe tempo echanjóshjango, y lempe ntšamo mora muentše šmontsonÿacá tondaye queochatoquéda, ni mo canÿe ndëtsbé inÿebé juatsboye. Lempe mochantsepochoáca ca.

Ntšamo yochtsemna quem luare jopochócama te chaojtsobeco ora

(Mt 24.3-28; Mc 13.3-23)

7 Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatšëmbuama ca?

8 Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsicamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye.

9 Y tšëngaftanga, entsanga imojtsentsjanama y entsanga mandadëngbe contra imojtsemnana chašmojtsuenana ora, ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátsmëna ca.

10 Y mëntsánaca Jesús tojanéyana: “Canÿe luarentša entsanga, inÿe luaroca entsángaftaca mochántsejtsjanaye; y canÿe amëndayábentša entsanga, inÿe amëndayábioca entsangaftácna.

11 Ba luarënguiñe jabuache echanjuangmëmmana, bëts shëntsana, y entšanga pochócaye šocanënga echanjóshjango; y celoca echántsemna puerta uabouana soyënga y bëts soyënga, entšanga jinÿanÿiyama quem luare ya yochtsopochócama.

12 “Pero cabá ndoñe chca chaondochnëngo ora, tšëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjunatse játsetšenama y cárceloyraca cmochanjútame, y reyënga y mandadëngbióynaca cmochanjunatse, atšbe ústonënga bëtsemna causa.

13 Chca šmochanjapása, ntšamo atšbiana šmotatšëmbcá chënga chašmëyanama.

14 Natsana ndoñe šmatjátsjuabnaye jenëuyanama ntšamo chora jóyebuambayana,

15 er atše chanjama puerta tšabá y osertanáncaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmontsichamo ca, y ndocá jojuama quemochatobenaye.

16 Pero uayayëngbe cucuatšinë cmochanjábashejuana cach tšëngaftangbe bëtsëtsanga, catsátanga, pamíllanga y amiguënga; y tšëngaftanguentšana báseftanga cmochantsëbaye.

17 Y nÿetsca entšanga cmochantsëbuayënja, atšbe ústonënga bëtsemna causa.

18 Pero tšëngaftangbe bestšašentšana ni mo canÿe stjënëja quecmochátabajajo.

19 Tšëngaftanga nÿets tempo átšbeñe ošbuáchiyënga chašmojtsemnëse, chë nÿetsca

tescama yomna tšabe vida šmochántse bomna ca.

²⁰ “Jerusalén nÿets shéconana soldadenga chašmojanÿe ora, šmochtsetátšëmbo Jerusalén jopochócama tojobuáchama.

²¹ Chorna, chë Judeoca oÿenenga batsjabengoye chamotsacheta; Jerusalenentše chamojtsemnënga, chentsana chamuaisebocana; y chë jajenache chamojtsemnënga, Jerusalenoye ndoñe chamondésamashjna.

²² Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrënguiñe endayancá chora echanjochnëgo.

²³ ¡Tša lastema chë tempo shembásenga ngomámanëngbiana o ochóchaye básenga chamojtsabamnëngbiana! Er chora corente ngménana quem luarentše echántsemna, y quem luarentša entsangbiana chë uabouana castigo.

²⁴ Inÿenga espadéjaca mochanjóbana, y ínÿengbioye nÿetsca luarënguëjana utámenënga mochanjunatse; y chë ndoñe judiëngna, Jerusalenoca entsángbioye mochántsatsejaye y mochantsëbaye, chca chaotsemnama Bëngbe Bëtsá tojalesenciantscuana ca” —Jesús tojánayana.

Bëngbe Bëtsá Entsá tbojanbemá quem luaroye echanjësabo

(Mt 24.29-35, 42-44; Mc 13.24-37)

²⁵ Mëntsánaca Jesús tojánayana: “Chora bëts soyënga echantsinÿna shinÿiñe, juashconiñe y estrellënguiñe; y quem luarentša entsanga tša mochántsatuatja, ndayá jamama ntsetatšëmbcá, chë mar béjaye y olëshënga corente echantsefshaue-nana causa.

26 Entšanga echantsabuatēcja tša auatja causa y ndayá quem luariñe yochjopásama enócochinýena causa; er chë quem luarentša tsbanánoca espíritënga obenana bomnënga echanjángmëmana.

27 Y chora entšanga mochanjinýe, chë Bëngbe Bëtsá Entšá tbojanbemá jantšetëshiñe echantsaboye, puerte obenánaca y corente buashinýinýaniñe.

28 Chë soyënga jochnënguama chaojobojatsé ora, añemo šmochjentsetaye y bestšaše játsbanase šmochjarrepára, er chora echántsemna chë tšëngaftangbe atsebacayana ca” —Jesús tojánayana.

29 Mëntšánaca Jesús tojanéyana jabuátambama: “Šmochjinýe canýe higo betiye o ndaye inýe betíynaca.

30 Tojtsaisějotsanama šmojinýe ora, jtsetatsëmbuana chë tšabe tempo ya yojtsaisobecuama.

31 Cachcá, chë soyënga yojtsëchnëjuanama chašmojinýe ora, šmochtsetátšëmbo chë Bëngbe Bëtsabe amëndayana ya yojtsobecuama.

32 “Ndegombre cbéyana, lempe chca echanjochnëngo, morsca entšanga cabá ndóbana ora.

33 Celoca y quem luare echanjopochóca, pero atšbe palabra ndocna te queochaisopochóca.

34-35 “Cuedado šmochtsebomna y ndoñe šmatjaleséncia tšëngaftangbe ainana bacna juabnëngaca chaotsemnama, jenomándama ntsobencá mocá enobuena causa, tmoye causa y nýe quem luarentša soyëngama enócochinýena causa; y tšëngaftanga prontánënga šmochtsemna, nýe ndeolpe chë te chaojobuache ora; y tšëngaftanga ndëprontánënga ndoñe

chašmondétsemna, mo tšëngaftangbiana canÿe uachmaniñe cuaftsemncá. Er nÿetsca quem luarentša entsangbiana chca echántsemna.

³⁶ Cuedado šmochtsebomna y yejuana šmochtsantješna; nÿe ntseco órnaca Bëngbe Bëtsáftaca šmochtsencuéntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojanéyana.

³⁷ Jesús, bnété Bëngbe Bëtsabe bëts yebnentše yojánabuatambaye, y ibetna, Olivos uabaina tjashoye yojánaye joquédama.

³⁸ Y nÿetsca entsanga cabá cachëse Bëngbe Bëtsabe bëts yebnoye imojánajna Jesús joyeunayama.

22

Entšanga tmojanjuabó ntšamo jamëse Jesúsbioye jishachama

(Mt 26.1-5, 14-16; Mc 14.1-2, 10-11; Jn 11.45-53)

¹ Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama.

² Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entsangbiana imojtsauatja.

³ Chora Satanás, Judas chë Iscariote ca uabobuatmabe ainaniñe bacna juabnënga tojanjajó. Chánaca yojamna chë bnëtsana uta uatsjendayënguentsá;

⁴ y tojána, chë bachnangbe amëndayënga y Bëngbe Bëtsabe bëts yebnocá soldadëngbe amëndayëngaftaca jencuéntama, ntšamo Jesús chëngbe cucuatšifne jayentsbáshejuanama.

⁵ As chënga imojóyejuaye, y Judas tmojanšbuachená crocénana chama jtatšetayana.

⁶ Y Júdasna aíne ca tojánayana; y cach orscana cha yojtsenguaye ntšamo jamana y ndëmua ora Jesús chëngbioye jayentsbáshejuanama, ndocna entšanga ora.

Jesús chabe uatsjéndayëngaftaca Bashco saná tojanse

(Mt 26.17-29; Mc 14.12-25; Jn 13.21-30; 1 Co 11.23-26)

⁷ Chë Bashco fiesta ora tojanóshjango, chë levadúraca ndëpormana tandëše sayté; chë te yojamna, Bëngbe Bëtsá jëtschuayamna canye oveshá jóbana chora jasama.

⁸ As Jesús, Pedro y Juánbioye tojanéyana: —Motsata y saná šochjapróna Bashco fiestama bënga mochjasama ca.

⁹ Chora chata tbojantjá: —¿Ndëmoca cojtseboše chë saná fchjapróntama ca?

¹⁰ Y Jesús tojanějua: —Jerusalenentše chašojámashëngo ora, canye bacó cmochanjóbiatše, matbajiñe búyeshe echantsabuyambaye. Cha šochjuasto, y šochtsonyaye ndëmuanye yebnentše cha yochjámashënguama;

¹¹ y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjéndayëngaftaca jasama ca?’ ”

12 As cha cmochanjínjanyíye canye bëts tsañe, tsbanana pisoca; ya lempe echántseprontana, y chentše, Bashco fiestama saná šochjapróna ca.

13 As chë útata tbojána, y tbojáninýena lempe ntšamo Jesús tojanëyancá, y chentše chë Bashco saná tbojanprontata.

14 Jasama tojanobuache ora, Jesús mesëshentše tojanótbema chabe uatsjédayëngaftaca, chë cachënga más chcoye chabe ichmónënga ca uabáinënga.

15 Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufrí ora.

16 Muentšana ndoñe más quemëntša saná quicháise, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

17 Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbëyana,

18 chë uvas betiyentša shajuanentšana obocniye ndoñe más quichaisofšiye, Bëngbe Bëtsabe amëndayana candóshjanguëntscuana ca.”

19 Chentšana, tandëse tojanca y Bëngbe Bëtsábioye tbojtanchuá; tojanjatá, tojanatsatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

20 Tmojansentšana, chë coptémaca tojanma cachcá ntšamo chë tandëšeca tojanmcá y mëntšá tojánayana: “Quem coptema vínoye entsemna

chë Bëngbe Bëtsabe tsëm trato entsángaftaca. Atsbe buiñe echanjuábuashana, tsëngaftanga chašmotsetatsëmbuama ntšamo Bëngbe Bëtsá entsanga tojanašebuachenacá ndegombre yochjochnënguama. Chë buiñe tsëngaftangbe tsabiama echanjuábuashana.

21 Pero chë uayayëngbe cucuatšiñe šochjaboshjoná, mesëshentše átšeftaca entsemna.

22 Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tša lastema chë bochjáboshjonabiama ca!” —Jesús tojánayana.

23 Chorna chë uatsjëndayënga tmojanontsé entjanayana, chënguentšá nda chë boshjuaná bétsemnana.

Nda chë más uamaná yomna

24 Chë uatsjëndayënga imojtsenatsëtsnaye chënguentšá nda chë más uamaná bétsemnana.

25 As Jesús tojanéyana: “Chë ndoñe judiëngbeñe, chë reyënga chëngbe entsángbioye nýe ntšámnaca jtsamëndayana, y chentša amëndayënga jtsamana, entsanga chëngbioye tsabe soye amënga ca chamotsëboboátmama.

26 Pero tsëngaftangbeñe ndoñe chca chaondëtsemna; chamna, tsëngaftangbeñe chë más uamaná mo chë más basacá chaóbema, y chë mandayá mo chë oservernacá.

27 Er, ¿ndase chë más uamaná yomna, chë mesëshentše jasama tojotbemá o chë uajuatšnáyá? Ndegombre co chë mesëshentše tojotbemá; pero atšna tsëngaftangbeñe sëntsemna mo chë oservernacá.

28 “Atsbe padecéniñe tsëngaftanga sempre átseftaca šmondétsemna.

29 Chíyeca, atsbe bariëna, canye amëndayana cbochanjátšataye, ntšamo atsbe taitá canye amëndayana šojatštacá;

30 chca, atsbe amëndayoca mesëshentše átseftaca šmochanjase y šmochanjofšiye, y uámana tbemaniñe mo reyëngcá šmochanjotbiamá, chë Israeloca bnëtsana uta pamíllanga entsangbiamá chašmuayanama tsabá o ndoñe tsabá chënga tmonjamama ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama

(Mt 26.31-35; Mc 14.27-31; Jn 13.36-38)

31 Jesús mëntsánaca tojánayana: —Simón, Simón; cochtsetátšëmbo, Satanás obenana tonjotjañe tsëngaftangaftaca nye ntšámnaca jamama, mo chë trigo matënga tcojtsashatiyeynacá;

32 pero atšna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nyets ošbuáchiyana átšbeñe chacojtsatsbomna ora, chë inye ošbuáchiyënga cochjújabuache átšbeñe sempre chamotsošbuáchema ca.

33 Chora Simón tbojaniyana: —Bëngbe Utabná, atše sëntseprontana ácaftaca cárceloye jámnaca y jobanámnaca ca.

34 Y Jesús tbojaniyana: —Pedro, atše cbëyana, cam ibeta bínyanoye, ngallo cabá ndécánta ora, aca unga soye cochanjayana ndoñe šconduabuatma ca.

Chë más jabuache ora yojtsobeco

³⁵ Chentšana Jesús tojanatjá: —¿Chë ni shecnájaca, ni crocenánaca, ni shecochëtjonësheca tcbonjanichamó ora, nderado ndayá tcmojanabuáshebena ca?

Y chënga tmojanjuá: —Tondaye ca.

³⁶ Chora tojanëyana: —Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe quësaíya chaotsatábuiye y canye espadëja chauatobuámiñe.

³⁷ Er cbëyana, entseyta átseftaca chaopasá, ntšamo Bëngbe Bëtsabe uabemana palabrenguiñe atšbiana iuayancá, mëntšá: “Y chábioye tmonjáninye mo chë puerte bacna soye amënguentsá canya cuaftsemncá ca.” Y lempe ntšamo atšbiana iuabemancá, mora ya echanjochnëngo ca —Jesús tojanëyana.

³⁸ As chënga tmojaniana: —Bëngbe Utabná, muentše uta espadëja entsemna ca.

Y japochócamna cha tojánayana: —Nye nyetsá ponto ca.

Getsemaní luarentše, Jesús Bëngbe Bëtsáftaca tbojanencuentá

(Mt 26.36-46; Mc 14.32-42)

³⁹ Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto.

⁴⁰ Choca tmojánashjajna ora, Jesús tojanëyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

⁴¹ Y chë uatsjëndayëngbentshana yojoluára, mo canye ndëtsbé jutšenëntscoca nyetsá,

y yojoshēntsamentsiye Bēngbe Bētsáftaca jencuéntama.

⁴² Jesús mēntsá tojánayana: “Taita, aca tcojtsebošese, moma atše ndoñe chašondětsemna chca jasúfriana. Pero ntšamo atše stsebošcá ndoñe chaondětsemna, sinó ntšamo aca cojtsebošcá ca.”

⁴³ Chca orna celocana canye ángel tbojánebēbocna, añemo chaotsebomnama juajabuáchama.

⁴⁴ Jesús tša ngméniñe yojtsemna, y Bēngbe Bētsáftaca más ibojtsencuéntaye. Y chabe bosesse yojtsemna mo fshantsiñe buiñe cuaftsebuastētjuancá.

⁴⁵ Bēngbe Bētsáftaca jencuéntama tojanpochocá ora, tojtantsbaná y chabe uatsjéndayēnga imojtsemnoye tojána; y chēnga inmētsomañe, tša ngménaca imojtsemna causa.

⁴⁶ Chora tojanēyana: “¿Ndáyeca šmotsomañe? Motsbananga y Bēngbe Bētsá šmochtseimpadana, bacna soye jamama ndoñe chacmondócochēnguama ca.”

Uayayēnga Jesús tmojánishache
(Mt 26.47-56; Mc 14.43-50; Jn 18.2-11)

⁴⁷ Jesús cabá yojtsóyebuambnantscuana, ba entšanga chentše tmojánashjajna. Chē Judas ca uabainá, canya chē bnētsana uta uatsjendayēnguentsá, chē entšangbe natsana yojtsaye. Cha yojobconá Jesús juamóchama;

⁴⁸ pero Jesús tbojaniyana: “Judas, ¿canye juamochese chē Bēngbe Bētsá Entšá tbojanbemá uayayēngbe cucuatšiñe cochjaboshjona ca?”

49 Chë Jesúseftaca imojtseemnënga tmojáninÿe ntšamo chora yochjanopásama; as tmojaninyana: — Bëngbe Utabná, ¿espadějaca fšcotsatsejaye ca?

50 Y canÿa chënguentšá, chë bachnangbe más uámana amëndayabe bochichnayábioye catšbioica matscuaše tbojtsantëtše, y tbojtsanëštjango.

51 Chora Jesús tojanëyana: —Cachcá monÿá; nÿe nÿetsá ponto ca.

Y chë bochichnayábioye chë matscuaše tbojánbojajo y tbojanshná.

52 Chentsana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanëyana: “¿Ndáyeca espadëjangaca y ngarotbéngaca šmojabo atše jishachama, mo atše canÿe bacá uamana entšá cuaftsemncá ca?

53 Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmánanbojajo. Pero ora tocjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanëyana.

Pedro tojánayana Jesúsbioye ndoñe bon-janabuátma ca

(Mt 26.57-58, 69-75; Mc 14.53-54, 66-72; Jn 18.12-18, 25-27)

54 Chentsana Jesús tmojánishache, y chë bachnangbe más uámana amëndayabe yebnoye tmojanánatse. Y Pedro bënocana ibojtsëstona.

55 Choca, chashja tsëntsaca, canÿe íñeshe tmojanangbotjó y entšanga chë shëconana

imojtsetbiámána; y Pédrénaca chentše chěngaftaca yojótbema.

⁵⁶ Chora, canye shembása chentša oservená, Pédrëbioye tbojáninýe chë iñe juachaca yojtsetbema; tbojanonýinýé y tojánayana: —Muánaca cháftaca endánmëna ca.

⁵⁷ Pero Pedro ndoñe ca tojánayana, y chë shembásabioye mëntšá tbojaniyana: —Sobrená, atše cha ndoñe quetsatabuatma ca.

⁵⁸ Ndoñe yapa bën y inya chábioye tbojataninýe y tbojaniyana: —Acnaca chë uatsjendayënguentšá condmëna ca.

Pero Pedro tbojanjuá: —Bacó, atše ndoñe quetsátsmëna ca.

⁵⁹ Chentša benëntscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

⁶⁰ Y Pedro tojánayana: —Bacó, ndayama cojt-sichámuama ndoñe quetsátstatšëmbo ca.

Cachora, y Pedro cabá yojtsóyebuambnantscuana, canye ngallo yojacánta.

⁶¹ Chora Bëngbe Utabná yojobuértana y Pédrëbioye tbojanonýinýé; y Pedro chora yojenójuaboye ntšamo Bëngbe Utabná tbojaniyanama: “Cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuatma ca.”

⁶² As Pedro shjoye tojánbocna, y corente ngmënaca yojtsenóbošachna.

*Jesús imojtsáboyejuana
(Mt 26.67-68; Mc 14.65)*

⁶³ Chë Jesús imojtsebojanýá entšanga cha imojtsáboyejuana y imojtsejantšetaye;

⁶⁴ y jtsabuchëntsacjuase, imojtsetjanaye: “¡Momalisiá, nda tcmënjajantšeta ca!”

⁶⁵ Y imojtsóyenguaye, nÿe mocá soyënga jtsatsëtsnayëse.

*Jesús, chë judiëngbe uámana mándayëngbe delante
(Mt 26.59-66; Mc 14.55-64; Jn 18.19-24)*

⁶⁶ Tojanbinÿna ora, chë bëtsëjemëngcá amëndayënga, bachnangbe amëndayënga y ley abuátambayënga tmojánenefjna, y chëngbioye Jesús tmojanánatse. Choca tmojantjá:

⁶⁷ —Smëyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanëjua: —Aíñe ca tcojojáuyanëse, tšëngaftanga chama átšbeñe ndoñe quešmochatošbuáchiye.

⁶⁸ Y nderado tcojótjasna, tšëngaftanga ndoñe quešmochatojuá ca.

⁶⁹ Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nÿets obenana bomnabe catšbioica echántšatsbemana ca.

⁷⁰ Chora nÿetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanëjua: —Cach tšëngaftanga chca šmontsichamo; atše cha sëndmëna ca.

⁷¹ As chora chënga tmojánayana: —¿Ndayama más entsanga šochjátëjaboto Jesusbe contra chamuayanama? Er cach bënga chabe uayášentsana chca tmonjouena ca.

23

*Jesús, Pilatbe delante
(Mt 27.1-2, 11-14; Mc 15.1-5; Jn 18.28-38)*

1 Nÿetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse.

2 Y chentše tmojanontsé cha mal jaquédana, mëntšá: —Bënga fsënjínÿena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquëcjnyana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canÿe reycá ca.

3 Chora Pilato Jesúsbioye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

4 As Pilato, chë bachnangbe amëndayënga y entsanga tojanëyana: —Atše ni mo canÿe soye chiyátinÿena, quem boyabása castiganá chaotsemnama jayanama ca.

5 Pero chënga más tmojanáyebuachena: —Nÿets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroca chca tonjabojatsé y mora moca Judeócnaca cachcá entsama ca.

Jesús Rey Heródesbe delante

6 As Pilato, Galilea luarama vojouena ora, tojanatjá Jesús Galileocá tajojamnama.

7 Y Jesús aíñe Galileoca yojamnama cha tojántatsëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna.

⁸ Herodes Jesúsbioye tbojáninÿe ora, corente tojanoyejuá. Chana tempscana inaboše Jesús jinÿama. Cha ba soyënga Jesusbiana tojanuena, y yojtseboše jinÿama Jesús jamana canÿe bêts soye, Bëngbe Bëtsabe obenánaca.

⁹ Heródesna ba soyënga tbojantjá, pero cha ndocá tbonjanjuá.

¹⁰ Y chéntšnaca, chë bachnangbe amëndayënga y judiëngbe ley abuatambayënga imojtsemna, y Jesús corente mal imojtsequédaye.

¹¹ Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entšayangá tmojanichëtjo, mo canÿe reycá; chentšana cachiñe Pilátbioye tmojesanichmó.

¹² Cach te Herodes y Pilato tbojtanenatsëtsaye; tempna chata ibojenáyata.

Jesusbiana chaóbana ca tmojánayana

(Mt 27.15-26; Mc 15.6-15; Jn 18.39-19.16)

¹³ Chentšana Pilato, chë bachnangbe amëndayënga, chë pueblentša amëndayënga y nyetsca entšanga tojánachembo,

¹⁴ y mëntšá tojanëyana: —Tšëngaftanga quem entšá átšbioye šmojuánatse, mo bacna soye entšángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiana šmonjayana, pero atšna ni mo canÿe soye chiyátinÿena, quem boyabása castiganá jtsemnama ibojtsemna ca jayanama.

¹⁵ Herodes cach ndoñe, chíyeca cachiñe bëngbioye cha tbojesichmó. Quem boyabása

ni mo canye ndoñe tonjobuachjanguá jóbanama chabotsemnama.

¹⁶ Chcasna, jabuache chamotsecastigá y chentsana chanjétsboshjona ca —cha tojánayana.

¹⁷ Yojamna canye utamená jétsboshjonana, ntšamo Bashco fiesta ora jamana imojanamancá.

¹⁸ Pero chora entsanga cányiñe tmojanáyebuachena: —¡Jesús chaóbana! ¡Barrabás matsboshjona ca!

¹⁹ Barrabás inautámena, mandadéngbioye ndétsayaunanama chë bëts pueblentse entsanga tojánenautanama y entsá óbanaye causa.

²⁰ Pilato cachiñe tojánayana Jesúsbioye jétsboshjonama yojtsanboše ca;

²¹ pero entsangna más tmojtétanayebuachena: —¡Motsecrucificá! ¡Motsecrucificá ca!

²² Pilato ya unga soyama tojtétanayana: — ¿Ntšamo bacna soye mua tojobuachjanguá ca? Ni mo canye bacna soye chiyátinÿena, mua jóbanama chabotsemnama. Chcasna, chanjacastíga y chora chanjétsboshjona ca.

²³ Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entsangbe jabuache chembumbuanánaca, Pilato tmojanëyëñaná Jesús chamóbama.

²⁴ As Pilato tojanmandá ntšamo chë entsanga imojtsotjanañcá chaotsemnama;

²⁵ as chora Pilato, Barrabásbioye cachcá tbojtanboshjona, chë nda inautámena mandadéngbioye ndétsayaunanama entsángbioye tojánenautanama y

entšá óbanaye causa. Y Jesusna entšangbe cucu-atšíñe tbojánboshjona, ntšamo chënga tmojtsebošcá chamomama.

Jesús tmojanrucificá

(Mt 27.32-44; Mc 15.21-32; Jn 19.17-27)

²⁶ As jacrucificama Jesús tmojanánatse. Chora jajocana inátaboye canýe boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

²⁷ Y banga chë pueblentša entšanga imojtsëstona; y chë shembásenga imojtsëstonëngna imojtsayošachiye y ngménaca imojtsanioye, Jesús chca yojtsepásama.

²⁸ As Jesús chëngbioye tojanobuértana y tojanéyana: “Jerusalenentša shembásenga, atšbiamá ndoñe matošachena; cach tšëngaftangbiamá y tšëngaftangbe básengbiamá šmochjenóbošachna.

²⁹ Canýe te echanjóshjango y chë te šmochántsičhamo: ‘Tša tšabá chë shembásenga šešona ndbomnëngbiamá, chë quem luaroye šešonga ndoñe tmonjëftsëshejajnëngbiamá, y chë šešonga ndoñe tmonjëftsabachengbiamá ca.’

³⁰ Chora entšanga jetsóitanama mochántseboše y mochanjontšé ichámuana: ‘¡Tjashënga šmotsëtebuantsá y batsjabenga šmotsaitame ca!’

³¹ Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojtsamëse, ntšamo chë tojtsebuashá betíyeca mochjama ca?” —cha tojanéyana.

³² Jesúseftaca cruciñe jóbanama, útata bēts bacna soyēnga ochjajnayátnaca imojtsēnachaye.

³³ Chē “Obanabe Bestsashe ca” uabaina luaroye tmojánashjajna ora, Jesús tmojanrucificá y chē bēts bacna soyēnga ochjajnayátnaca, canya chabe catšbioica y chē ínÿana chabe uañicuayoica.

³⁴ Chora Jesús mēntšá tojánayana: “Taita, mēngbe bacna soye motsaperdónaye, er ntšamo montsamama chēnga ndoñe quemátstatsēmbo ca.”

Chē soldadēnga Jesusbe entšayamna, tsbanánoye tmojanētšena, chēnga jtenájatayama.

³⁵ Entšanga chentše imojtsemnēnga chca imojtsonÿaye, y chē pueblentša mandayēngnaca Jesús imojtsáboyejuana y mēntšá imojtsenatsētsnaye: “Inÿengna aíñe tojēftsatsebacá; mora cachá chauentsbocá, cha ndegombre Cristo, chē Bēngbe Bētsabe Uámana Uabuayaná tomnēse ca.”

³⁶ Soldadēngnaca Jesús imojtsáboyejuana; tmojanobeconá y untja vínoye imojtsefsēšnaye,

³⁷ y mēntšá imojtsatsaye: “¿Chē judiēngbe Rey tcomnēsna, cach aca mentsbocá ca!”

³⁸ Jesusbe bestšaše juatsboicna canÿe uabemana soye tmojananjo; chiñe mēntšá yojtsanábemana: MUA CHĚ JUDIĚNGBE REY ENDMĚNA ca.

³⁹ Canÿe bēts bacna soyēnga ochjajnayá yojtse-crucificaná, Jesúsbioye mēntšá tbojanóyenguango: —Chē Bēngbe Bētsabe Uámana Uabuayaná tcomnēsna, mentsbocá y bēndátnaca šmatsebocá ca.

⁴⁰ Pero chē inÿe bēts bacna soyēnga ochjajnayana mēntšá tbojanácacana: —¿Ni mo

Bëngbe Bëtsá ndoñe condërrespectana? Bëndátnaca bontsamna chacá jóbanama.

41 Ndegombre bëndata muentše bontsemna bëts bacna soyënga ochjajnaye causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjanguá ca.

42 Y chorna, quem bëts bacna soyënga ochjajnyá Jesúsbioye tbojaniyana: —Jesús, atšbiama cochtenójuaboye aca reycá jabomándama chacojtabo ora ca.

43 Y Jesús tbojanjuá: —Ndegombre cbëyana, mënté átšeftaca celoca, chë nyetscanga oyejuayënga mondbetsemnoca, aca cochantsatsmëna ca.

Jesús tojanóbana

(Mt 27.45-56; Mc 15.33-41; Jn 19.28-30)

44 Nyëtsto orscana las tresëntscoñe nyëts quem luare yojtseibétata.

45 Y shinye yojtsajbaná binynayana, y Bëngbe Bëtsabe bëts yebnentše yojújonýana entšējua tsëntsaca yojtsenájataye. Chējua bënëjua inauamna y chë tsatsëntsaca inaújonýana.

46 As Jesús tojanáyebuachena: “Taita, atšbe espíritu acbe cucuatšinë šcoboshjona ca.”

Y chca jayanama tojanpochocá ora, tojanóbana.

47 Chë romano soldadëngbe amëndayá chca tojáninýe ora, Bëngbe Bëtsábioye tbojtánadorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

48 Nyëtscá entšanga chë soye jinýama tmojánabënga, chca tojanopasama tmojáninýe ora, tmojanontšé jtangana enocochjantšetaye, ngmënama.

49 Pero Jesusbe n̄yetsca ubuátmēnga y chē shembásenga Galileocana tmojanastēngna, chaboca tmojanoquedá chē soyēnga on̄yayiñe.

Jesús tmojanatbontsá

(Mt 27.57-61; Mc 15.42-47; Jn 19.38-42)

50 Yojanmēna can̄ye boyabása, José ca uabainá, can̄ye Judeoca pueblócá, Arimatea ca uabaina; cha inamna can̄ya chē pueblentša uámana amēndayēnguentšá y can̄ye tšabe entšá y n̄yetsca soyēnguiñe tšabá amá.

51 Chánaca yojanobátmana chē Bēngbe Bētsabe amēndayana chaóshjanguama, y tondaye tbonjanogustá ntšamo chē in̄ye amēndayēnga tmojanjuabó y Jesúseftaca tmojanmcá.

52 Cha Pilátbioye tojána y Jesusbe cuerpo tbojanotjañe.

53 José chē cruzocana Jesusbe cuerpo tbojtanēstjango, can̄ye lino entšējuaca tbojanandmaná y can̄ye cuevēshiñe, peñēshiñe pormániñe, tbojanjajó. Chentše cabá ndocná mondējajo.

54 Yēfsana ochnayté bétsemnayecna, cach te yojanotocana saná japróntana chē yēfsana jasama; y chē ochnayté ya yojtsebín̄yana.

55 Chē shembásenga, Galileocana Jesús tmojantjēmbabanga, tmojána y chē cuevēshe tmojánin̄ye, y tmojanrrepará ntšamo Jesusbe cuerpo tmojanjajoma.

56 Yebnoye tmojtaná orna, tmojanprontá botamana uanguētše bėjayēnga y soyēnga chē cuerpiñe janētjuama.

Chē ochnaytena chēnga tmojanochná, ntšamo Moisesbe leyíñe yojanmandancá.

24

Jesús tojtanayena

(Mt 28.1-10; Mc 16.1-8; Jn 20.1-10)

¹ Y tmengo, chë inÿe semana bojatséntena, cabá cachëse, Jesús tmojanatbontsá cuevëshoye chë shembásenga tmojána, y tmojanamba chë tmojanprontá botamana uanguëtše soyënga.

² Pero choye tmojánashjajna orna, tmojáninÿena chë cuevëshoye amashjuanentša ndëtsbé chentšana juanániñe,

³ y choye tmojánamashjna ora, Bëngbe Utabná Jesusbe cuerpo ndoñe tmonjáninÿena.

⁴ Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinÿinÿana entšayá uichëtjonata chentše tbojabántsaye.

⁵ Y chë shembásenga tmojanëuatjanama y fshantsoye imojtsatsejbénama, chata tbojanëyana: “¿Ndáyeca obanëngbentše chë vida totsobomñá šmojtsenguá ca?

⁶ Muentše cha ndocná quenátsmëna, er cha ya tontayena. Menójuabonga ndayá cha tmojanëyanama, cha cabá Galileoca enjamna ora. Cha tonjánayana:

⁷ ‘Chë Bëngbe Bëtsá Entsá tbojanbemá bontsemna bacna soye amëngbe cucuatšifne chamoboshjonama, chamocrucificama y unga tianoye cháuatayenama ca’ ” –chata tbojánayana.

⁸ Chora chë shembásenga Jesusbe palabrëngama imojtenójuaboye,

⁹ y chë cuevëshentsana tmojtaná ora, chë tšabe noticiënga chë bnëtsana canÿe uatsjëndayënga y inÿe entšángbioye tmojanacuntá.

¹⁰ Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inÿe shembásenga chëngaftaca imojamnënga.

¹¹ Pero chë uatsjëndayëngna mëntšá chë shembásengbiama imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyiñe ndoñe montsanošbuaché.

¹² Pero chentšana, Pedro tojëftsantsbaná y ochamanana chë Jesús tmojanjájó cuevëshoye tojána. Y choca yojtsemna ora, yojotsejbéna tsoye jontješiyama, pero nÿe ena entšëjuangá yojuinÿe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

Chë Emaús puebloye benachiñe

(Mc 16.12-13)

¹³ Cach te, uta uatsjëndayata Emaús puebloye ibojtsaye. Emaús yojamna Jerusalenocana bnëtsana canÿe kilómetroca.

¹⁴ Chata ibojtsayencuéntaye lempe ntšamo tojanopasama.

¹⁵ Y tojanopasá, ibojtsencuéntaye y ibojtsentsëtsnayëntscuana, cach Jesús tojanobeconá y chátaftaca cánÿiñe yojtsaye;

¹⁶ mas que imojtsonÿaye, ndoñe ibontsobena cha jótëmbana.

¹⁷ Jesús tojanëyana: —¿Ndayama benachiñe šuabanencuéntaye ca?

As chata ngménaca ibojotsaye,

¹⁸ y canya, Cleofás ca uabainá, tbojaniyana: — ¿Nye aca cojtsemna, inye luarocana ashjanganá Jerusalenentse oyená, ndayá chentse quem dienga yopasánama ndëtatšëmbuá ca?

¹⁹ Chora cha tojanéyana: —¿Ndaye soyënga ca?

Y chata tbojaniyana: —Chë Jesús Nazaretocáftaca tonjopasá soyëngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nyetsca entšangbe delante.

²⁰ Y ntšamo, chë bachnangbe amëndayënga y chentša mandadënga ínÿengbe cucuatšinë tmonjáboshjona, jóbanama ibojtsemna ca entšanga chamuayanama y chamocrucificama.

²¹ Bënga chabiamá fsënjanoátmana, Césarbe cucuatšentšana Israeloca entšangbe atsebacayá chaotsemnama; pero morna ya unga te entsemna chca tonjopasá.

²² Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevëshoye tmonjá,

²³ y chabe cuerpo ndoñe tmonjínÿena; as chora chënga bëngbioye tmontabo y montsabíchamo angelënga tmojëftsanÿe y chënga catmënjayana cha ainá yojsatsmëna ca.

²⁴ Bëngbentsana baseftángnaca chentšana chë cuevëshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmonjëftsinÿe ca —chata ibojtsichamo.

25 As Jesús chata tojaněyana: —¡Tša juabna nd-bomněnga y tša uenana jošbuáchiyama, chě Běngbe Bětsabe juabna oyebuambnayěnga tmojánayana soyěngama!

26 ¿Mo ndoñe yonjamna chě Uámana Uabuayaná chě soyěnga chaosufrima, y chentšana nyetsca entšanga corente cha chamuatschuama ca?

27 Chentšana Jesús tojanontsé chata jábuayenana, lempe ntšamo chabiana yojanoyebuambnacá chě Běngbe Bětsabe uabemana palabrenguiñe; yojontsé Moisesbe libréšangañe y chě Běngbe Bětsabe juabna oyebuambnayěngbe libréšangáñnaca.

28 Chě ibojétsaye puebloye imojtsebeconá ora, Jesús tojanma mo más chcoye cuaftsacá.

29 Pero chatna tmojanatarié chentše chaotso-quedañama, měntšá jauyaněse: —Běndátaftaca mot-soquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe.

30 Chentšana tojanopasá, juasama mesěshentše imojtsetbiámama ora, Jesús chě tanděse tojanca, Běngbe Bětsábioye tbojtanchuá, chě tanděse tojan-jatá, y chata tojanatšatá.

31 As, chora chě uatsjéndayata ibojobenaye Jesús jótěmbana; pero chana nýe ndeolpe yojuenatjěmba.

32 Chora chata ibojtsenatsětsnaye: “Chě benachiñe Běngbe Bětsabe uabemana palabrengama šondabuayiyná ora, ndegombre běngbe ainaniñe más bontseboše cha más chašotsabuayiynama, ¿ndoñe chca ca?”

33 As, cachora tbojěftsantsbanata y Jerusalenoye tbojtanata; choca tmojáninýena chě bnětsana

canÿe uatsjéndayënga cánÿentse imojtsemna y chëngbe enutëngnaca;

³⁴ y mëntsá imojtsichamo: —¡Ndegombre Bëngbe Utabná tojtayena; Simónbioye tbojébëbocna ca!

³⁵ As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótëmba, chë tandëse tojanjatá ora.

*Jesús chabe uatsjéndayënga tojánebëbuacna
(Mt 28.16-20; Mc 16.14-18; Jn 20.19-23)*

³⁶ Chë uatsjéndayënga chë soyëngama cabá imojtsencuéntantscuana, Jesús chëngbe tsëntsaca tojabántsaye y mëntsá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

³⁷ Pero chënga tša auatjanánënga imojtsemna, y canÿe añemëse imojétsonÿaye ca imojtsejuabnaye.

³⁸ Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca?”

³⁹ Atšbe cucuatšënga y atšbe shecuatšënga minÿënga; šmobjajo y šmochanjinye. Cach atše sëntsemna. Canÿe añemësna, ni mëntsëna ni betašënga ntsebomnana; pero tšëngaftanga šmontsonÿá, atšna aíñe ca” —tojanëyana.

⁴⁰ Chca yojtsichámëse, chabe cucuatšënga y chabe shecuatšënga tojaninÿanÿé.

⁴¹ Y chënga cabá ndoñe montsanošbuaché, chca noticiama corente imojtsóyejuama y tša ojnanánënga imojtsemna causa; as Jesús tojanatjá: “¿Muentse ndayá jasama quešmëbomna ca?”

⁴² As canÿe tabena buana beonbiana tmojanoyé;

⁴³ Jesús tojanocñe y chëngbentse tojanse.

44 Chentsana Jesús tojaněyana: “Quem palabrěnga entsemna ntšamo cabá tšěngaftangaftaca sěnjamna ora tcbonjaněyancá: Entsemna, lempe chaopasá ntšamo atšbiana iuabemancá, Moisesbe leyěnguiñe, chě Běngbe Bětsabe juabna oyebuambnayěngbe uabemana librěšangañe y Salmos librěšañnaca ca.”

45 Y chora chě uatsjěndayěnga, Jesúsbeyeca tmojanobená chě Běngbe Bětsabe uabemana palabrěngama josértana.

46 Chentsana Jesús tojaněyana: “Ntšamo atšbiana iuabemancana yomna, chě Běngbe Bětsá Entšá tbojanbemá chaosufrí y unga tianoye chauatayena ca.

47 Y morna atšbe uabaina jayaněse, átšbeñe betsošbuáchema, nyets quem luarentše šmochjontša entšanga atšbiana jábuayenama, bacna soyěnga amana chamuajbanama, as chca, Běngbe Bětsá chěngbe bacna soyěngama cháuperdonama; chě soyěnga Jerusalenentše chaobojatšé.

48 Tšěngaftanga atšbiana soyěnga šmonjině y šmondětatsěmbo.

49 Atšbe Taitabe šbuachenaná, tšěngaftangbiana chanjíchmuá. Pero morna camuentše Jerusalenentše moquedanga, Běngbe Bětsabe obenana chašmóyěngacñěntscuana ca” —cha tojaněyana.

Jesús celoye tojtantsjuá

(Mc 16.19-20)

50 Chentsana, Jesús chabe uatsjěndayěnga ínյoye tojaněnatse, Betania pueblo béconana. Y chabe buacuatšěnga játsbanase, Běngbe

Bëtsá tbojanimpadá chë uatsjédayënga tšabe bendicionënga chamóyëngacñama.

⁵¹ Chca yojsamëntscuana, cha chëngbentsana tojanoluaré y tojanontsé celoye játsjuana.

⁵² Chë uatsjédayëngna, Jesús tmojtanadorá chentšana, Jerusalenoye oyejuayënga tmojtaná;

⁵³ y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9